

WAN TUK

NIUSPEPA BILONG YUMI OL PAPUA NIUGINI STRET! 27 YIA NAU

32 pes

Namba 1,320

Wik i stat long Fonde Octoba 14, 1999

70t

Top Jas tok strong long rispektim yumen raits lo

JASON TAU i raitim

SIEF Jas Sir Arnold Amet i tokim ol politisen, sinia publik sevans na ol plisman long tingting gut na noken brukim lo we i banisim fridom bilong wanwan manmeri.

Sir Arnold Amet i tok gavman long rausim wanem kaini kontrak agrimen we ino gat gupela as na ol plisman long ronim na rausim ol maket manmeri arere long rot em sampela pasin bilong brukim lo i banisim fridom bilong ol manmeri o yumen raits.

Em i tok gavman i bin baim moa long K14 milien long 1994 inap nau bikos long gavman i brukim kontrak na nogat gupela as na ol plisman i bagarapim ol samting bilong ol manmeri.

Olsem na Sir Arnold i askim ol politisen, sinia gavman opisa na ol plis-

man long skelim gut wok bilong ol na mekim samting.

Sir Arnold i tok ol plisman i ronim ol manmeri long strit na kukim ol samting bilong ol i brukim tru lo bilong yumen raits we i nogat gupela as long en.

Em i mekim tok piksa long ol plisman long Mosbi we i wok long ronim na brukim na kukim ol samting bilong ol manmeri long Gordons maket na Taun eria long Mosbi siti.

Em i tok nogat wanpela man i bin stap long hap long banisim rait na fridom bilong ol dispela lain manmeri.

Long dispela taim tu Sir Arnold Amet i tokaut olsem planti taim nau gavman i wok long holim planti konferens klostu klostu long bringim sevans na helpim long ol pipel tasol ol dispela plen i no wok gut bikos ol lida yet i no karimaut ol dispela plen.

Sir Arnold i tok mani na rot bilong ranim kantri i nogat hevi long en. Tasol em i tok hevi i stap long ol lida em; i nogat wok klia long soim ol samting long pasin bilong na bilip bilong ol lida long mekim wok bilong sevim pipel.

Pipel bai lusim mani wantaim ol kwik mani bisnis

VERONICA HATUTASI i raitim

PLANTI pipel long kantri husat i putim mani bilong ol insait long ol kwik mani bisnis bai kisim taim nogut na wari taim ol dispela mani bisnis i pondaun, Menesing Dairekta bilong Beng bilong Saut Pasifik na Siaman bilong Komesel Benkas Asosiesen (CBA) Noel Smith i tok.

Dispela em ol skim olsem Money Rain, Coral Pacific International

(Wjndfall), U-Vistract Corporation Ltd, Millenium Corporation Ltd, Nekong International Investment Corporation Ltd, Money Rain na ol arapela moa.

Ol dispela kwik mani bisnis i bin kam insait long kantri klostu long pinis bilong las yia na stat bilong dispela yia.

Bikos ol dispela skim i givim bikpela intres long ol kastoma, olsem 100 pesen o moa mak antap long mani we ol (kastoma) i putim, planti grasrut pipel na tu ol arapela i putim mani bilong ol insait long ol

bisnis ya. Wanpela samting tu em pe bilong ol samting long ol stoa i go antap taim strong bilong Kina i go daun. Na taim ol pipel i bungim hevi, ol i painim rot long traim pulim mani long helpim ol yet na ol famili bilong ol na olsem ol i go insait long kwik mani bisnis.

Bikos long wari we planti pipel husat i putim mani bilong ol wantaim ol skim i kamap taim ol skim i nowok long peim aut ol mani na ol profit, Nesenel Gavman long mun Ogas i bin givim tripela mun long ol skim long wokim peiaut i go long ol kastoma. Bipo gavman i tokaut long dispela, em bin sindaun wantaim ol lain husat i go pas long ol mani skim na ol i paitim toktok, glasim na skelim ol samting we i sut long ol dispela skim.

Nau yumi stap long namba tu mun bilong detlain na ol kastoma i no kisim yet ol peiaut bilong ol. Deltain bilong ol skim long peim ol kastoma bai i pinis long neks mun, Novemba.

Sampela ol skim i wok long stretim ol pepawok na putim ol infomesen rekot i go long ol kompyuta long dispela taim. Na ol i tokim ol kastoma bilong olsem taim ol dispela pepawok na ol infomesen deta i pinis, ol bai wokim peiaut. Na ol pipel i wetim dispela tasol.

Planti ol grasrut kastoma i wari bikos ol bin putim ol laip sevings bilong ol i go insait long ol bisnis ya.

Nau yet, planti pipel i paul long ol toktok olsem ol komesel beng i pasim mani bilong ol skim ya na dispela i wanpela long ol as watpo ol skim i no wokim ol peimen.

Mista Smith husat i siaman bilong ol CBA i tok ol bisnis ya i nogat mani bilong ol i stap wantaim ol Komesel beng long dispela taim.

Wanpela beng tasol we i larim ol



PNG redi long salim Tuna long Australia - Minista bilong Fisheries Ron Ganarafa i sekim tupela tuna pis long nupela bris. Dispela ol pis bai ol i salim i go long Australia we i gat maket. Siaman bilong PNG Fishing Industry Asosiesen Maurice Johnbrown i lukluk. Poto i kam long opis bilong Praitim minista Media Unit.

To page 3

INSAIT

Ol kompleknesim sekyuriti long stua
- pes 2

Straik bilong ol Yuni studen
- pes 3

Plis bagarapim 10-pela man long Henganofi
- pes 7

Wau Bulolo vot nogat bilip
- pes 9

KULCHA YUMI-FM
5.00 PM MON TO FRI

MUTRUS

PROUDLY SPONSORING LOCAL PNG MUSIC

GOVERNMENT WARNING SMOKING IS DANGEROUS TO HEALTH

PLIS RIPOT

MADANG: Gavman i lusim planti million kina long plis fos long ol yia i go pinis i kam inap nau bikos long pasin nogut ol plis i save mekim na ol pipel i save kotim ol plis, Sief Jastis, Sir Arnold Amet i tokim ol save manmeri bilong lo insait long 'Pacific Law Officers' Miting long Madang.

Em i tok pasin nogut ol plis i save mekim i kamap olsem K26 milion olgeta stat long Epril 1992 i kam inap tude.

Sir Amet i sutim tok long ol plis long ol pasin nogut ol i save mekim long ol pipel we i go agens long rait bilong man. Kain ol pasin olsem bagaram ol samting bilong ol pipel na paitim ol pipel.

Sir Amet i tok i no long taim i go pinis ol plis i kukim daun ol seken han klos ples, na troimoi ol samting bilong ol lain i maket nabaut long Mosbi.

"Nogat wanpela man o meri i opim maus na sapotim ol pipel long kain pasin nogut ol plis i mekim," em i tok.

GOROKA: OL raskol i stilim ka bilong wanpela konstraksen kampani bos, Sandy Karl long pinis bilong las mun. Mista Karl husat i holim wok olsem Menesing Dairekta bilong Buss Nambiss Enterprises i tok ol raskol i holim pas em wantaim ol famili bilong em long Famo bris insait long Kainantu Distrik na stilim olgeta samting bilong ol wantaim ka.

Long dispela as em i singautim Memba bilong Kainantu Baki Reipa long baim K80,000 long sin pasin ol pipel bilong ilektoret bilong Mista Reipa i mekim.

KEVIENG: OL plis long Kavieng i kisim bikipela tok salens olsem ol i no mekim gut wok na olsem pasin nogut i go bikipela insait long provins.

Kavieng Plis Stesin Komanda, Samuel Niba i tokaut long dispela taim em i givim toktok long ol memba bilong 'Chamber of Commerce' na ol Memba long St Peter Torot Senta las wik.

Mista Nipa i tok pasin bilong salim ol spak brus i go antap na ol hevi bilong spak tu insait long ol wik i kam i sut i go antap. Olsem na em i askim ol pipel long komyuniti long skulim ol yut husat i stap long ol setelmen na tokim ol wanem kain birua inap kamap sapos ol i mekim ol kain pasin nogut.

KEREMA: Plis Komisina John Wakon i bin go lukluk raun long Kerema tripela wik i go pinis bilong glasim hevi bilong ol plis insait long provins.

Gavana Riddler Kimave i askim Mista Wakon long go long Kerema na glasim sindaun bilong ol plis long provins bilong em.

Mista Wakon i bin go lukluk raun long Kerema, Baimuru, Kikori, Kaintiba, Ihu na Malalaua.

Em i go lukluk raun tu long Gobe marin sait we gavman i gat tingting bilong kirapim bes kem bilong salim wel long PNG i go long Queensland long Australia.

Insait long dispela lukluk raun Mista Wakon i painim aut olsem planti ol samting bilong ol plis i bagarap tru na ol i mas senisim ol o wokim o baim ol nupela samting bilong helpim ol plis i mekim gutpela wok.

Ripot bilong Sekyuriti sekim ol kastoma Plis Komisina egensim sekyuriti sekim bodi bilong ol kastoma

PLIS Komisina John Wakon i egensim tu pasin bilong ol sekyuriti gad long ol stua i sekim bilum na bodi bilong ol manmeri i kam aut long ol stua.

Mista Wakon i tok dispela pasin bilong sekim na tasim skin bilong ol manmeri i no gutpela na i brukim lo we dispela man o meri i ken kotim husat i mekim dispela kain pasin long em.

Mista Wakon i mekim dispela toktok long sapotim singaut i kam long Katolik Asbisop bilong Rabaul Carl Hesse long ol manmeri i mas kotim husat sekyuriti gad na stua i save

holim skin bilong ol manmeri long sekim ol taim ol i laik lusim stua na go ausait.

Plis Komisina John Wakon i tok ol plis tasol i gat rait o pawa long sekim ol samting long haus o wanem hap plis i gat strongpela bilip olsem stil samting i stap. Na i no ol sekyuriti gad nabaut.

Mista Wakon i askim ol manmeri long ripot long plis stesin long wanem sekyuriti gad o wanem stua i mekim dispela kain pasin long ol.

Mista Wakon i tok i gat lo i stap we i tok narapela manmeri i nogat rait long tasim

o holim samting o skin bilong narapela man. Man i mekim dispela kain pasin i brukim lo na bai i mas kisim sas long brukim lo.

Mista Wakon i askim ol meri husat i bungim dispela kain hevi pinis we ol sekyuriti gad o wokman bilong stua i holim ol na tasim ol skin bilong ol na sekim ol samting long i mas ripot long plis.

Em i tok tru olsem ol stua i gat rait long was long ol samting bilong ol long i noken lus. Tasol ol i nogat rait long mekim tasim bodi o skin bilong ol kastoma we i mekim sem long ol.



Post PNG luksave long ol meri... • Post PNG, kampani husat i bosim olgeta pos opis long kantri i givim luksave i go long ol wokmeri bilong em. Kampani i wok long kamapim ol rot bilong dispela ol meri long kisim moa save na mekim wok bilong ol long wanwan pos opis. Moa long 24 ol sinia opisa bilong pos opis i stap insait long dispela kos we wanpela saveman bilong Intenesenel Pos Opis Skul long Tailan i kamapim. Foto: Bot Siaman bilong Pos PNG Moses Taian i givim setifiket i go long Lolo Wartovo, asisten Kastoma Sevis menesa bilong Rabaul pos opis. Tupela poro bilong em Ellyn Mark, asisten Kastoma Sevis bilong Kavieng wantaim Susan Kasi asisten Kastoma Sevis menesa bilong Wewak i lukluk i stap.

Pipel komplek long sekyuriti sekim ol bilum

MATHIAS MALE i raitim

PLANTI manmeri nau i no amamas long ol kain wok na pasin we ol sekyuriti gad i mekim long ol bikipela stoa na long ol Supa Maket.

Planti pipel i no amamas bikos planti ol mani na kain liklik hait samting bilong ol kastoma i save lus long bek bilong ol taim ol sekyuriti holini oi.

Wanpela meri em Maria Kari i tok, long las wik em i go soping na em i no laik givim nem bilong stoa ya tasol em i tok em i lusim K63. Taim em i wokim soping pinis na kam ausait na lukluk olsem dispela K63 senis mani we em putim long bek i lus. Dispela em i painaimaut bihain long ol sekyuriti i sekim bek long dua.

Dispela pasin i no Misis Maria tasol i lukim em ol planti manmeri save komplek long ol kain pasin we ol sekyuriti i save mekim long ol kastoma.

Planti ol pipel i tokim Wantok Niuspepa olsem ol i no laikim ol sekyuriti long putim han go insait long ol bek na sekim, bikos ol i bilip na ting olsem taim ol i sekim insait ol i

lukim mani stap ol i save rausim kamaut wantaim han bilong ol.

Ol pipel i tok tu olsem, ol bos bilong ol stoa na tu ol bos bilong ol sekyuriti tu mas givim sampela skul na toksave long ol sekyuriti olsem ol i mas noken sekim ol liklik bek bikos planti save karim mani long ol dispela bek.

Long dispela pasin tasol, Mista David Koima em wanpela bisnisman i tok, ol kastoma kam long ol stoa long wokim soping na ol sekyuriti ol i lukim olsem ol i karim bikipela han bek o bilum, orait ol sekyuriti ken tokim ol long lusim beg wantaim ol tasol liklik bek noken lusim wantaim ol sekyuriti.

Na tu Mista Koima tok nau planti long ol bikipela Supa Maket Stoa i gat alam i stap na em i isi long holim ol sapos ol i stil. "nogat noken sekim bek bilong ol bikos planti komplek olsem ol propeti o samting bilong ol i lus," Mista Koima tok.

Dispela pasin i no long ol bikipela siti tasol olsem Mosbi, Lae na Hagen, em long olgeta hap long PNG.

"Long dispela tok yet, ol sekyuriti gad i mas mekim gut ol wok bilong ol na lukautim ol kastoma gut taim ol kam insait long mekim soping bilong ol," Mista Koima i tok.

Bisop egensim ol stua i sekim ol kastoma

YAKAM KELO i raitim

KATOLIK Bisop long PNG i no laikim tru pasin ol wokman bilong stua i save mekim long sekim kolos na skin bilong ol manmeri i kam aut long stua.

Asbisop Karl Hesse bilong Rabaul i toktok strong egensim dispela pasin olsem ol stua kipa i nogat rait long holim na sekim bodi na ol samting bilong ol kastoma na ol i nogat rait tu long hatim ol meri na tasim skin bilong ol long dispela pasin.

Asbisop Hesse i tok ol stua i gat rait long banisim ol kago na samting bilong ol long i no ken lus long stil pasin, tasol ol i no ken yusim dispela rait bilong long mekim ekstra pasin long ol kastoma bikos ol kastoma i gat rait long bilum, hanbek, kolos na bodi bilong ol.

Asbisop Hesse i mekim dispela strongpela toktok bihain long wanpela nius program i bin kamap long EMTV we i soim ol stua kipa i sekim bilum, kolos na tu tasim skin bilong ol manmeri wantaim.

Asbisop Hesse i tok em i bilip ol manmeri i ken pait egensim dispela kain pasin. Ol i ken kolim ol stuakipa i mekim dispela kain pasin long ol, kolim nem bilong ol bisnis o stua we ol i save sekim na tasim bodi bilong ol man na mekim ol meri i sem na pasim tok na noken go baim kaikai long stua we i save mekim kain pasin olsem long ol kastoma.

Pablik Solisita Chronox Manek i bin tokaut tu long ol pablik husat i bungim dispela kain hevi o sem i mas go lukim ol na kisim sampela helpim bilong ol loya.

Mista Manek i tok sapos ol stua kipa i bin sekim ol bilum na tasim skin bilong ol man o meri we i mekim ol i sem na ol i no pilim gutpela, ol i mas go lukim ol loya bilong em long Garden City opis long 2nd floa long Mosbi.

Asbisop Hesse i tok sapos wanpela meri i bungim dispela kain pasin i kamap long em, em i ken go kotim dispela sekyuriti gad na dispela bisnis i mas kisim sas long kamapim dispela kain pasin long ol kastoma.

Mi askim ol meri long toktok namel long ol yet na soim dispela stua we i save mekim dispela kain pasin. Na ol meri i ken pasin tok long i no ken go baim samting long ol dispela kain stua moa, em i tok.

Asbisop Hesse i tok sapos ol meri i pasim tok namel long ol yet na famili bilong ol na mekim olsem, bai ol bos bilong dispela stua ken senisim pasin bilong em long soim rispek long ol meri na olgeta kastoma wantaim.

WANTOK

All departments, Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

General Manager and Group Editor in Chief:
Anna Solomon.
Acting Advertising Manager:
Jocko Oberleuter.

Papers distributed by air throughout PNG.
Available by air mail subscription within Papua New Guinea and overseas.
Email address:
word@global.net.pg

Advertising deadlines, Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

Ol yunivesiti studen i straik yet

RICHARD MANDUI i raitim

EDUKESAN Minista Profesa John Waiko i askim olgeta studen bilong yunivesiti long go bek long skul na redim ol yet long bikipela tes bilong ol.

Profesa Waiko i tokim ol studen long Yunivesiti long Mosbi olsem hevi bilong mani long kantri bai mekim hat long gavman long apim baset bilong yunivesiti long neks yia. Olsem na baset bilong skul long dispela yia bai wankain yet long yia 2000. Em i bin go toktok wantaim ol yuni studen bihain long ol bin straik na lusim skul bikos skul i laik apim skul fi i go antap long 25 pesen (%) long neks yia. Nogat skul 8-pela de na.

Profesa Waiko i tok wanpela pepa em i bin mekim long traime apim fi bilong skul i go antap aninit long Yusa Pe Polisi i no inap kamap bikos gavman i no luksave long en yet.

Gavman i tingim taim nogat planti manmeri long kantri i bin bungim long taim bikipela drai na ais i kukim PNG long 1997. Olsem na skul fi bilong ol studen i stap yet long 10 pesen (%) mak olsem long 1997.

Profesa Waiko i tokim ol studen olsem em i no inap senisim wanem samting ol studen i sanap na pait long en, bikos em hevi namel long ol studen na administresen

bilong skul yet.

Tasol em i tok 7-pela de ol studen i bin lusim klas i no lus nating bikos singaut bilong ol i kamap long gavman na em i mas kisim sampela taim long traime stretim dispela hevi bilong ol studen.

Em i tok gavman i no lukluk yet na toktok long dispela Yusa Pe Polisi na toktok bilong apim skul fu o daunim skul fi long neks yia. Bikos gavman i luksave tu long hevi ol studen bai bungim long painim skul fi mani we ekonomi na hevi bilong mani i bikipela nau long kantri. Olsem na skul fi bilong ol studen bai istap wankain yet olsem long 1997. Tasol Profesa Waiko i tok em i bilip

ol disisen bilong gavman long stretim ol dispela toktok bilong skul fi na Yusa Pe Polisi bai gavman i kamap wantaim disisen long narapela tupela mun bihain.

SRC presiden bilong Yunivesiti Benny Tanda i tok amamas long gutpela toktok bilong Profesa Waiko na em i askim sapos ol lida i ken sanap long kain hevi bilong ol studen bikos dispela hevi bilong skul fi i mekim wari tru long ol nupela na olpela studen olgeta. Na hevi bilong skul fi tu i save givim bikipela wari long ol papamama na famili olgeta, em i tok.

Inap aste, ol studen bilong yunivesiti i no go bek yet long

klas. Tasol Akedemik Bod Stending Komiti (ABSC) i tokaut olsem sapos ol studen i no go bek long klas nau, bai ol tisa i stapim tem 3 long Oktoba 8, 1999. Na sapos ol i rausim tem 3, bai i nogat sans tumas long ol studen i go bek long skul neks yia.

Ol nupela studen long dispela yia bai painim hat bikos bai i gat nupela studen bilong neks yia tu bai i kam long yuni, bai i nogat greduesen neks yia bikos ol fainel yia studen i no pinisim tru skul bilong ol; ol ovasis studen husat i skul long hia bai baim ekstra fi gen neks yia long mekim kos bilong dispela yia na ol arapela hevi moa.

Pipel bai lusim mani wantaim ol kwik mani bisnis

i kam long pes 1

skim i putim mani bilong ol em Papua Niugini Benking Koporesen (PNGBC).

Em i tok long save bilong em olsem siaman bilong CBA, Wespac, BSP, ANZ beng na Maybeng ol i no holim ol akaun bilong ol mani skim.

Em i tok taim operesen bilong ol skim i bin kamaut long ples klia long mun Epril, ol komesel beng i bin-pasim ol akaun bilong ol skim na larim ol (skim) i kisim bek mani bilong ol. Na i no stret long ol skim i paulim ol kastoma taim ol i tokim ol olsem mani bilong ol i stap tasol ol beng i holim pas long mani bilong ol.

Em i tok em ol arapela bikman long ol komesel beng i no amamas long pasiir we PNGBC i wokim long no bihainim rot ol i kisim long stapim ol akaun bilong ol skim, tasol i go het na larim ol (skim) i beng yet wantaim ol.

Wantok i bin ring planti taim long opis bilong wan-pela bikman bilong PNGBC long kisim sampela tok klia long dispela samting tasol bos ya bin stap long miting na Wantok i no toktok long em.

Mista Smith i tok bihainim bung bilong ol Sief Eksekutiv opisa bilong ol CBA long kantri wantaim Beng bilong PNG Gavana, Asosiesen i bin putim wanpela tok lukaut i go long pablik olsem ol dispela kwik mani skim bai i pundaun na ol pipel bai lusim mani bilong ol.

"Pablik tok lukaut we i sut long ol piramid o kwik mani skim i operet insait long kantri i bin go aut. Ol dispela skim bai pundaun, olsem tru nait i save bihainim de, ol bai pundaun.

"Ol konman husat i statim ol dispela skim i pila pilai long ol pipel husat i no klia tumas olsem samting ol i go insait long en na putim mani bilong ol i no seif. Em i olsem pilai laki.

"Pablik i stop na tinging tu olsem hau bai ol skim ya i givim bikipela intres i go long ol? Ansa em long operet na baim ol kastoma, ol mas pulim ol nupela investa long putim mani bilong ol na ol i ken peim ol dispela husat i putim mani bilong ol pastaim wantaim ol. Na sapos ol pipel i stop long putim mani i go insait long ol skim, ol (skim) bai pundaun.

"Ol lain husat i putim mani bilong ol pastaim bai kisim bek mani na intres bikos planti pipel i wok long putim mani bilong ol i go insait tasol ol dispela i kam bihain i popaia taim skim i pundaun.

"Mipela (ol komesel beng) i bin rausim ol akaun bilong ol skim na tu putim tok lukaut bikos mipela i no bin laik kisim ol tok sut long pablik taim ol i lusim mani bilong ol," Mista Smith i tok.

Em i tok ol komesel beng i bin pasim tok long noken larim ol skim i putim mani bilong ol wantaim ol inap ol i gat laisens long operet.

Mista Smith i tok ol dispela bisnis i ken bagarapim ikonomi, sosaiti na kantri, wankain olsem long ol kantri long Isten Yurop na Albania i wanpela long ol. Tasol em i tok dispela i no inap long kamap long PNG bikos gavman i bin go insait na putim kontrol bilong em. Na tu ol komesel beng husat i wari long ol hevi we ol pipel i bungim i bin putim ol tok lukaut long pablik long noken go insait long ol bisnis ya.

Tasol em i tok planti pipel, moa yet ol papa bilong ol skim na ol sapota i bin wokim planti tok kros egen-sim em na sanap bilong ol komesel beng. Ol bin sutim tok long ol olsem ol beng i jeles long bikipela intres mak we ol skim i peim ol kastoma na tu ol i wari bikos planti pipel i wok long autim mani bilong ol long ol beng na putim long ol bisnis.

Bihainim dispela, em i tok planti grasrut pipel bai bungim hevi bikos ol no kisim mani bilong ol yet. Na i luk olsem ol bai lusim ol mani bilong ol olgeta.

Tok lukaut long ol pasindia na kago sip

SHIRLEY IANA i raitim

TOK lukaut i go long olgeta sip i save karim pasindia na kago long lukaut gut na bihainim stret ol lo.

Dispela singaut i kam long Marine Divisen long Madang we Sevis Kontrola Francis Toovey i askim olgeta pasindia na kago sip long i noken pulapim ol samting abrusim mak bilong sip.

Mista Toovey i tok olgeta sip i no ken karim ol kago na pasindia abrusim mak na skel bikos dispela bai putim

laip bilong ol pasindia na ol wokman bilong sip long birua.

Em i tok olgeta papa bilong sip i bin rejista i kisim pinis PNG Survey Safety setifiket we i tokaut long sip bilong ol i bikipela o liklik na i mas karim kago o pasindia bihainim wanem mak we i stret long sip. Tasol dispela lo i no bin wok bikos planti sip i save pulapim kago na pasindia long laik tasol, Mista Toovey i tok.

Lo bilong marin sevis i tok tu olsem namba bilong ol

laip jaket na laip raf i stap long sip i bihainim namba bilong ol pasindia stret.

Mista Toovey i tok sapos Marine Sevis i holim wanem sip i brukim dispela lo, bai ol i sasim dispela kepten na papa bilong sip tu wantaim.

I gat sas bilong K500 na K10 sas bilong wanwan pasindia antap long sip.

Mista Toovey i tok i nogat lo i karamapim ol banana bot na dingi long Madang tasol ol liklik bot long hap olsem Milen Be na Is Nu Briten provins tasol i gat lo i banisim ron bilong ol.

NCDC makim K250 milien long edukesen na rot

NESENEL Kapitela Distrik Komisn (NCDC) i lukluk nau long tromoi K20 milien olgeta yia i go long stretim ol skul insait long Mosbi siti. Na tu NCDC i laik strongim wok bilong stretim ol rot insait long siti we bungim wantaim skul bai i kos olsem K250 milien long 5-pela krismas program.

NCDC i kamapim tupela bikipela samting ya bihain long Praisin Minista Sir Mekere Morauta i askim long NCDC i mas glasim gen na stretim gut baset bilong ol we i mas sut long ol bikipela program o wok na igo daun long ol liklik.

Provinsal na Lokol Gavman Afeas Minista Andrew Kumbakor i tok edukesen bilong ol pikinini long Mosbi bai kisim bikipela sapot na senis tru long bihain taim dispela lukluk bilong NCDC i kamap.

Dispela K20 milien inap helpim ol skul wantaim ol mentenens wok bilong stretim ol klasrum na arapela skul wok moa long bihain, Mista Kumbakor i tok.

Mista Kumbakor i tok insait long dispela program tu bai dispela mani i ken baim ol

kompyuta bilong ol hai skul na nesanel hai skul long Mosbi bai ol sumatin i ken laikim kompyuta lesen long skul.

Mista Kumbakor i tok kompyuta nau i mekim planti wok insait long wol tude olsem na gavman i mas bringim ol dispela kompyuta program i kam long ol studen bilong tude i ken save long wok wantaim kompyuta.

Minista Kumbakor i tok rekot bilong olpela menesmen bilong NCDC long sait bilong edukesen sapot i tambolo tru bikos mani i save go nating na pasin bilong paulim samting o bagarapim wok i kamap bikipela tru insait long siti administresen.

Long givim K20 milien olgeta yia long skul bai ol skul i kisim gutpela senis tru na ol hevi bilong stretim ol skul bai i go daun, em i tok.

Mista Kumbakor i tok NCDC i save kamapim olsem K100 milien olgeta yia long baset bilong em. Tasol bikipela mani i save go nating long ol eria we nogat gutpela samting bai kamap long en.

Long sait bilong rot mentenens o rot program, Mista Kumbakor i tok bai NCDC i brukim K30 milien olgeta yia long hevi na wok bilong rot tasol. Long 5-pela yia bihain, bai NCDC i tromoi olsem K150 milien long ol rot program insait long siti.

Minista i tok olpela menesmen bilong NCDC i no bin mekim plen long ol senis bai kamap bihain long komyuniti na ol samting long siti.

Em i tok em i gat bilip olsem bai NCDC i sanap strong long karimaut ol dispela plen na tu wok hat long rausim ol pasin stil, hait pasin, bagarapim ol wok na planti paul pasin i go aut olgeta.

Minista i tok dispela tupela bikipela program bai givim ol manmeri long Mosbi siti gutpela helpim na sevis long sait bilong edukesen bilong ol pikinini na sindaun bilong ol long komyuniti.

Mista Kumbakor i tok em bai liklik taim tokaut long ol bikipela wok program bilong stretim tu tupela bikipela sevis olsem helt na lo na oda insait long siti.



WANTOK

NIUSPEPA BILONG OL PAPUA NIUGINI

Ol stua i mas senisim pasin

BIKPELA toktok i kamap pinis long pasin sampela sekyuriti gad i save mekim long sekim ol bilum na poket na tasim skin bilong ol manmeri long stua taim ol i laik kamaut long stua.

Bikpela komplem tru em ol sekyuriti i save laik tasim skin bilong ol meri na ol man we long piksa bilong EMTV i soim ples kliia tru ol sekyuriti i tasim tupela man long ples bilong sem tru. Ating planti meri i pilim dispela sem pinis tasol ol i no save tokaut.

Sapos dispela em strongpela lo bilong ol stua long sekim ol kastoma taim ol i go aut, wanpela gutpela rot em yumi ken lukim long ol bikpela stua olsem TST, Papindo, Steamship na arapela moa we ol i gat masin i stap long dua. Na ol bai krai sapos ol kastoma i kisim wanpela samting i kam aut na masin i no klinim mak long en. I gutpela olgeta stua i mas gat dispela kain masin o rot bilong sekim ol kastoma na i no bilong holim skin bilong ol putim han i go insait long bilum na poket bilong ol.

Plis i tok ol bai holim ol sekyuriti na papa bilong stua husat i mekim dispela kain pasin. Olsem na sapos yu husat kastoma i pilim olsem dispela samting i mekim sem long yu pinis, orait yu mas go stret na kotim ol.

Pablik Solisita tu i laik save long ol kastoma husat i bungim dispela kain hevi na ol manmeri i ken go lukim ol.

Sios i tok dispela pasin i brukim lo bilong fridom bilong ol manmeri. Na plis i tok plisman tasol i gat pawa long sekim ol manmeri na i no ol sekyuriti nabaut.

Ol stua i gat rait long banisim ol samting bilong stua bikos ol i wokim bisnis. Olsem na ol i mas mekim sampela rot long dispela sem pasin i no ken kamap long ol kastoma. Bai ol kastoma i amamas long go kam long stua, na nogat stil pasin bai kamap long ol stua tu.

Referendum vot bai statim wok long stretim Bogenvil

VERONICA HATUTASI i raitim

PAPA bilong ol Bogenvil Revoluseneri Ami Francis Ona bai kamaut sapos nesenel gavman i givim tok promis (garanti) olsem referendum bai kamap long Bogenvil, Vais Presiden bilong Bogenvil Pipels Kongres James Tanis i tok.

Mista Tanis i bin wokim dispela toktok long Mosbi tupela wik i go pinis. Dispela em taim ol BPC memba na ol arapela lida bilong Bogenvil i bin kam long Mosbi taim palamen i wokim disisen long skruim Bogenvil Provinsal Gavman long sikspera mun gen.

Mista Tanis i bin wok olsem namba wan seketeri bilong Mista Ona long Panguna insait long faivpela krismas.

Em bin tok Mista Ona i wok long glasim

na skelim ol wok we i kamap nau long Bogenvil. Dispela em ol samting we i karamapim ol wok long painim gutpela sindaun na tu sait bilong politiks.

Em bin tok bipo long Mista Tanis na lain bilong em i bin kam long Mosbi, wanpela bung i bin kamap we Ona i bin salim fiavpela man i makim em. Na ol bin tok olsem bikman ya i laikim olsem referendum vot i mas kamap long givim sans long ol pipel bilong Bogenvil i autim laik na tingting bilong ol.

Mista Tanis i bin tok em no laik wokim ol politikel stemen tasol long stretim laik bilong olgeta grup long Bogenvil we tingting bilong ol i no wankain, BPC i laikim referendum.

"I gat foapela grup long Bogenvil. Ona wantaim lain bilong em i stap hait yet. Na ol no stap insait long wok bilong painim gutpela sindaun. Leitana grup long Buka

Ailan i laikim PNG Gavman long givim moa pawa long Bogenvil. Ol pipel i stap long namel.

I gat ol grup olsem BPC, BRA, resistens, ol sios grup, ol meri grup we i karamapim ol meri i memba long Bogenvil Fridom Muvmen na Provinsal Kaunsil bilong ol meri na ol indjinis grup olsem kago kalt grup bilong Damien Damen. Olsem na samting we BPC i laikim em long kisim tingting bilong olgeta Bogenvil pipel insait long referendum vot, " Mista Tanis i bin tok.

"Sapos gavman i givim tok orait bilong em long givim referendum long Bogenvil nau o wanpela, tupela mun o krismas bihain, em bai orait tasol. Na gutpela o bagarap bilong ol toktok long bihain taim bilong Bogenvil bai stap long tok promis long referendum vot," Mista Tanis i bin tok.



• Ol yangpela meri tolai i raun long Rabual taun.

Ol bikhet manki bagarapim komyunikesen long Siwai Distrik

ROT LONG salim toktok i go i kam insait long Siwai Distrik, sautwes Bogenvil i bagarap bihain long ol sampela bikhet manki i stlim ol sola penel na VHF radio long distrik edministresen het opis long Tonu.

Ol ripot i kam long Buka i tok ol bikhet manki i bin go long Tonu distrik hetk opis na stilim VHF radio we edministresen i save yusim long salim na kisim toktok long Buka na tu long narapela hap bilong PNG.

Ripot i tok tu olsem ol bikhet lain i stilim ol sola penel bilong nupela satalait telipon sistem we Telikom i bin putim long Siwai Distrik long las mun tasol.

Telikom wantaim Nu Silan i bin kari-maut wanpela join projek bilong putim ol satalait telipon long olgeta distrik insait long bikailan Bogenvil. Na ol bin kisim samting olsem wanpela mun long wokim dispela. I no longpela taim nau na nius i kamap olsem ol bikhet lain i bagarapim dispela gutpela sevis long Siwai.

Taim Wantok i kisim ripot, mausman long Buka i no bin kliia husat lain i kari-maut dispela bagarap na stil pasin na long wanem as tru.

Em i tok ol plisman i bin stap tu long stesen tasol bikos ol bikhet lain i holim ol gan na karimaut stil pasin ya, ol no bin inap long wokim wanpela samting long stapim ol.

Ripot i tok dispela kain samting i pondau gen long isu bilong disamamen we ol lain i holim ol samting bilong pait long Bogenvil i mas lusim ol.

WANTOK

NIUSPEPA BILONG OL PNG STRET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

PLES	AIR
PNG	K 60.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00

Skelim gut ol samting na wokim disisen long Bogenvil

HEVI long Bogenvil em i wanpela bikpela eria na gavman na ol lida husat i stap insait long wok bilong daunim hevi i mas glasim na skelim ol samting gut taim ol i mekim ol disisen.

Dispela em toktok bilong olpela bos bilong ol plisman insait long Niugini Ailans rijen, Toguata, husat i bin pinis long wok olsem Ailans Divisenel Plis Komanda long sikspera krismas.

Mista ToGuata em i amamas long tokaut olsem em bin wanpela long ol man husat i bin gat bikpela wok long mekim long traime stretim hevi taim em i holim posisen olsem bos bilong ol NGI rijen.

Em i tok em bin stap insait long wok bilong painim gutpela sindaun na em bin stap insait long olgeta bikpela wok long nesenel, rijinel na provinsal level.

Bikpela tingting bilong em i tok, em

long lukim hevi long Bogenvil i pinis na sindaun bilong ol pipel i stret.

Em i tok " ol pipel bilong Bogenvil em ol spesel grup na hevi i kamapim long ples kliia olsem ol li strong long kisim samting we ol i laikim". Em i tok long dispela samting tasol na nesenel gavman na ol lida insait long Bogenvil i mas skelim na glasim gut ol samting bipo ol i go het long wokim ol disisen. Wanpela bikpela samting we Mista ToGuata i wok long strong long en taim em bin stap olsem bos bilong ol plis long NGI em long lukim disamamen o pasin we ol grup husat i bin pait na birua long Bogenvil i lusim ol samting bilong pait. Dispela em long ol BRA na resistens grup. Em i tok long trupela gutpela sindaun i kamap long Bogenvil, ol grup long Bogenvil husat i holim ol gan samting i mas rausim ol.



Pamuk pasin long Is Nu Briten go antap bikos nogat luksave long famili

Bruk daun bilong ol tumbuna pasin, tambu na luksave we i karamapim sosel sait na famili em bikpela as long hevi bilong pasin pamuk i go antap insait long Is Nu Briten provins, John ToGuata, man husat i bin holim wok olsem Divisenel Plis Komanda insait long Niugini Ailan rijen insait long sikspera krismas tasol i pinis long wok long dispela wik i tok.

Mista ToGuata i tok tu olsem narapela as long dispela kain hevi i go antap long provins long dispela taim em long hevi bilong mani we ol pipel i bungim taim pe bilong ol samting i go antap. Dispela i wokim na moa yet, ol meri i no wari o givim bikpela tingting long sekyuriti bilong ol. Na ol i save wokabaut i go long ol gaden bilong ol long longwe long painim kaikai na bungim birua.

Long dispela taim, Is Nu Briten provins i wok long gat planti hevi long pamuk pasin. Planti ripot na kot i kamap we papa i bagarapim na givim bel long pikinini meri bilong en,

mama i slip wantaim pikinini man, ankel i wokim pasin nogut na givim bel long kandre na ol dispela samting i kamap bikpela insait long Is Nu Briten.

Mista ToGuata i tok em i luksave tu olsem bihain long maunten paia long Rabaul, ol pipel i go stap long narapela hap we ol pipel i stap klostu long wanpela arapela. Olsem na planti i kisim tingting nogut na ol dispela kain pamuk pasin i go antap.

Em i tok em i hat long plis long daunim na helpim long stretim dispela kain hevi bikos em no save kamap long ples kliia. Na ansa long dispela em long komyuniti i wok wantaim ol plis na welfea na ol kaunseling opisa.

Mista ToGuata i tok tu olsem Niugini Ailans em wanpela rijen we kraim i no bikpela olsem ol arapela rijen insait long kantri. Tasol em i tok long dispela taim, hevi bilong drags i wok long go antap na ol plisman i mas wok hat long daunim ol hevi.

FPCD go long Sandaun

ADAM ELLIOT i raitim

WANPELA non-gavman ogenaisesen insait long kantri 'Foundation for People and Community Development' (FPCD) i go het long helpim ol pipel bilong Aitape.

Las wik Fraide ol i salim Eksekutiv Opisa bilong ol, Yati Bun bilong go sekim ol wok ol i mekim long Aitape na painim wanem kain rot ol inap long givim moa helpim.

Mista Bun i tok, FPCD olsem wanpela non-gavman ogenaisesen i stap long kantri, i gat bikipela laik long lukim olsem ol progrem ol i ronim i mas bihainim laik bilong ol pipel bilong Aitape na bai i stap oltaim.

"Mipela (FPCD) i wanpela lokok NGO i stap long Mosbi. Bikipela program bilong mipela em bilong skulim ol pipel long rit na rait; lukautim bus, graun, wara, solwara, ol wail abus, pisin, pis; na wok didiman. Mipela i mekim wok tu insait long ol ples i bagarap olsem long Aitape na Rabaul," em i tok.

Bihain long tsunami bilong las yia, FPCD i bin go pas long helpim Wuipom, Arop, na Barapu.

Mista Bun i tok ol inap lainim planti samting long wok bilong ol insait long Sandaun Provins.

Long Fraide Mista Bun i go miting wantaim wanpela asosiesen bilong ol papa graun long St Anna na long Sarere em i bin go long Wuipom (Sissano) bilong lukim wanpela haus FPCD i mekim.

"Mi go long Wuipom long lukim wanpela haus mipela i putim mani bilong mekim. Program bilong mipela long Aitape i gat tupela wok. Wanpela em bilong mekim ol haus bilong ol lain i mas gat haus. Na nara-pela em bilong skulim ol lain long ples long yusim wokabout somli," em i tok.

Em i tok ol i skulim ol pipel bilong ples tu long wokim tri bed rum haus.

"Mipela i mekim ol aid pos na haus bilong ol dokta boi na long wankain taim yusim ol dispela haus long skulim ol pipel bilong ples long mekim haus bilong ol yet. Ol pipel i ken lukim olsem sapos ol i gat save bilong mekim haus na i gat ol samting bilong mekim haus ol i ken mekim haus. Wanpela samting tasol ol i mas baim em ol kapa, nil na tenk," em i tok.

Mista Bun i tok ol FPCD i mekim pinis tripela haus na ol bai mekim arapela tupela gen bihain long toktok bilong em wantaim ol papa graun. Em i tok ol i save wanem hap bilong putim ol dispela haus tasol ol bai bihainim tingting bilong Aitape Rihabiltesen Komiti.

"Mi hop taim mi kam bek mi bai lukim planti moa haus kapa i sanap we ol pipel yet i mekim, yusim ol diwai bilong bus graun bilong ol yet," em i tok.

Vanimo daiosis opim K1.5 milien skul projek

TENPELA haus tisa na 15 nupela klasrum i bin op long Baro top ap Praimeri Skul ausait long Vanimo, Sandaun provins long las mun.

Long open de bilong Baro top ap Praimeri Skul, Bisop bilong Vanimo Bisop Cesare Bonivento i mekim bikipela tok amamas na sapot long kirapim edukesen na wok bilong skul insait long Sandaun provins.

Ol dispela klasrum na haus bilong tisa i kos olsem K1.5 milien we konstraksen bilong Daiosis ov Vanimo yet i go pas long wokim.

Long ol skul we ol lapun haus na ol samting long taim bilong Australia na Jemen i stap bipo inap nau, Baro praimeri skul em wanpela bilong ol dispela olpela skul.

Baro skul i bin kamap long 1964 we Katolik Misinari aninit long nem Pasionist

Oda i kamapim. Skul i bin go kamap long mak bilong top ap level, maski i bin gat planti tok pait na kros long graun na koh-pensesen, tasol Bisop Bonivento i tok skul ya i kam long longpela rot inap nau bikos long sapot ol pipel i givim.

Mi laik tok amamas long ol papagraun husat i bin tok orait long ol Pasionist Paters, em i tok. Mi laik tok strong long ol pikinini i mas kam long skul olgeta de, Bisop Bonivento i tok.

Gavana bilong Sandaun provins John Tekwie tu i bin kamap witesim dispela open de na em i mekim tok amamas i go long Daiosis bilong Vanimo long kamapim dispela bikipela projek.

"Mi laik tok tenkyu na amamas i go long ol NGO na sios olsem Katolik sios long mekim bikipela wok insait long sait bilong edukesen, Gavana Tekwie i tok.

Mi Tekwie i tok wok sios i mekim i

bihainim stret polisi bilong gavman. Em i tok tu olsem long bipo planti pikinini i save pinis skul long yangpela taim yet bikos i nogat spes o hap bilong i go moa. Tasol nau dispela rot i wok long op na senis gut, Gavana Tekwie i tok.

Dispela em wanpela long ol planti bikipela projek insait long sait bilong edukesen we Daiosis bilong Vanimo i kamapim. Tupela projek pastaim em haus slip bilong ol studen long nupela Don Bosco Teknikel Hai Skul na tripela klasrum bilong Holy Cross Praimeri Skul. Bikipela projek moa em i stap long plen long kirapim Caritas Teknikel Hai Skul, skul bilong ol meri.

Tasol wok long Baro Praimeri Skul i no pinis tru yet. Skul bod ov menesmen i wok long redim ol pepa bilong askim long mani bilong wokim skul laibreri, toilet na wara paip bilong skul. - Nius i kam long DOV

Gavien raba projek long Is Sepik bai kirap

YAKAM KELO i raitim

NESENEL Gavman i givim K400,000 long kirapim Gavien Raba projek long Is Sepik provins, Agrikalsa Minista Ted Diro i tokaut.

Mista Diro i tok dispela projek i kamap bihainim gutpela wok bung wantaim namel long Is Sepik provinsal Gavana Arthur Somare.

Namba wan helpim bilong gavman bai go long stretim bek ol rot we dispela projek bai ron gut long en. Dispela bai mekim isi long ol fama i ken kirapim wok bilong ol long raba olgeta taim na kamapim gutpela trenspot sistem na maket sapot, Mista Diro i tok.

Mista Diro i tok dispela rot bai kirapim tru interes bilong ol lain bilong ples long wok gut long raba projek bilong ol.

Minista Diro i tok Agrikalsa Dipatmen bai salim wanpela save-man bilong wok long raba na em bai go pas long menesim dispela projek. Bai gavman i salim em long het opis long Mosbi i go long Wewak taim haus slip bilong em i orait.

Mista Diro i tok insait long dispela K400,000 bai k100,000 i go long stretim ol rot bilong ka i ron long en

insait long dispela raba projek eria na kisim ol ka tu i stap redi long karim ol raba.

Taim moa mani i kamap long yia 2000, bai gavman i lukluk moa long stretim olgeta hap bilong raba fektori na hap bilong wokim raba na tu sapotim long kamapim moa raba long provins, Mista Diro i tok.

Mista Diro i tok em i gat strong-pela bilip olsem dispela rot ol i laik kamapim bai kirapim laik na interes bilong pipel long ples long kamapim moa raba insait long Is Sepik provins.

Minista bilong Agrikalsa i tok em i wok long holim toktok wantaim Gavana Arthur Somare long lukluk tu long sapotim na kirapim ol arapela eria bilong agrikalsa insait long provins.

Mista Diro i tok em bai traim long mekim wankain wok bung wantaim ol arapela Gavana bilong arapela provins tu long kirapim wok agrikalsa insait long eria bilong wok didiman.

Minista Diro i tok sapos ol lida i wok bung wantaim na sapos agrikalsa industri i ron gut, kantri i ken ron gut strong na serim ol gutpela samting i kamap long wok bilong agrikalsa olsem bun bilong kantri.

Rotari helpim Imelda

ADAM ELLIOT i raitim

ROTARI klab bilong Australia i helpim wanpela yangpela meri Malol long stretim lips bilong maus bilong em.

Rotari klab bilong Australia i helpim Imelda Morris wanpela yangpela meri bilong ples Aipokon long Malol insait long Sandaun Provins. Olsem planti ol liklik pikinini bilong PNG, Imelda tu i no klia long amas krismas bilong em.

Imelda i gat hevi bilong lips bilong em long taim em i mangi yet i kam inap long Julai 17, 1998 taim sunami i bagarapim ples bilong em. Olsem na em wantaim ol lain bilong em i go sindaun long nupela ples Aipokon.

Em i bin stap long Aipokon taim wanpela tim bilong ol Rotari lain bilong Australia i lukim em. Ol i painim olsem em i nogat lips long maus bilong em olsem na ol tit bilong em i stap ples klia.

Dispela i mekim Imelda i sem tru na em i no go long skul. Em i sem long ol famili, wantok na planti lain.

Taim ol Rotari lain i lukim olsem ol i bungim mani inap long mak bilong \$800 dola na salim em i go long Hagen we ol dokta i stretim lips bilong em.

Tude Imelda i gat gutpela lips na pes bilong em i luk nais moa yet. Imelda yet wantaim ol famili bilong em i no inap bilip olsem dispela helpim i bin kamap na ol i lukim olsem wanpela mirakel.

Imelda i tok, "Em i gutpela long kisim dispela operesen. Mi pilim pen yet tasol em i gutpela na nau mi ken painim isi long toktok."

BIG HIGHWAY BEER

Paradise

NEW

Yunited Sios glasim straksa bilong en

HELEN REI i raitim


YUNAITED Sios bilong Papua Niugini i wok long redi long glasim straksa bilong sosel konsen na developmen ministri bilong Sios bilong ol.

Dispela i kamap bihain long wanpela wik kibung long Mosbi las wik. Insait long dispela kibung ol modereta, bisop, minista, pasto na meri bilong ol, ol yut lida, meri, na ol saplen bilong ol kain kain institusen bilong Sios i bin kamap.

Jenerel Seketeri bilong Yunaited Sios long Papua Niugini, Demas Tongogo i tok ol i bin holim dispela semina bihainim wanpela singaut i kamap long ol kain kain sosel hevi insait long sosaiti.

Em i tok dispela em i wanpela rot bilong glasim singaut bilong God long Sios long glasim na mekim sampela samting long ol sosel hevi olsem lo na oda, drag, ol lapun, ol lain hap bodi i bagarap na planti bilong ol i save sindaun long ol rot sait na singaut long mani.

Em i tok as tingting bilong dispela straksa em bilong helpim wok bilong Sios, bringim gutpela sevis na sindaun i go long ol komyuniti insait long pasin bilong stretim sindaun.



• Jenerel Seketeri bilong Yunaited Sios, Demas Tongogo i amamas long holim dispela kibung na glasim straksa bilong Sios.

Insait long dispela semina i bin gat rit bilong baibel we ol lain i bin stap i bin gat taim bilong beten na harim tok bilong God.

"Mipela i mas harim wanem samting God i singautim yumi long mekim bikos sapos God i no helpim yumi, yumi bai dai pinis long wanem samting yumi wok long mekim," Mista Tongogo i tok.

Ol i bin gat taim bilong luksave long wanem samting God i mekim insait long 127 yia bilong Sios bilong London Misinari Sosaiti, 124 bilong Metodis Sios, na ol i go lukim ples we dispela tupela Sios i bin kam bung wantaim long 1968 bilong kamapim Yunaited Sios long 1968.

Sios i amamasim tu meri grup na ol yut felosip long bikpela wok ol i save mekim long ol eria bilong ol bilong go lukim ol lapun, go long Cheshire Homes, haus kalabus, sapot institusen na Narcotics Bureau.

Ol i kisim bikpela tok tenkyu tu long wok bilong ol insait long Papua Niugini Kaunsel bilong Sios wantaim ol arapela Sios olsem Katolik, Luteran, Anglikan na Salvesen Ami.

Ol lain i stap long dispela kibung i harim olsem i gat ol lain i stap long kain kain hap i gat ol hevi na ol i mas helpim ol dispela lain.

Ol lain i kam long Niu Briten, Bogenvil, Niu Ailan, Hailens, Is Papua bikples, sentrel Papua Ailan, Wes/Galf na taun rijen.

No ken poinim kwiktaim narapela man

WANPELA boi i stilim hap kaikai, na king i tok ol i mas kilim dispela boi dai. Ol i bung pinis long hangamapim em, na king i askim em sapos em i gat sampela las tok, o nogat.

Stilman i tok, "Bikman, papa bilong mi i bin givim wanpela pawa long mi. Mi inap planim pikinini bilong mango, na insait long wanpela de tasol, dispela mango i save kamap na karim kaikai. Nogut yu kilim mi dai, na dispela pawa bai lus nating."

Bilong traim tok bilong dispela stilman, king i makim wanpela taim bilong planim dispela mejik pikinini bilong mango. Em i laik lukim mango i kamap na karim insait long wanpela de tasol.

Orait, ol bikman i bung na stilman i digim wanpela hul na nau em i tokim ol olsem: "I gat wanpela spesel lo bilong planti dispela mango: wanpela kain man tasol em inap planim - em man husat i no bin stilim wanpela liklik samting long laip bilong em. Mi yet mi bin stilim kaikai, olsem na mi no inap. Yumi mas painim hia wanpela man i no bin stil olgeta long laip bilong em. Goan, nau yumi painim wanpela."

King i askim kuskus long go planim mango. Tasol kuskus i eksyus na i tok em i bin trikim wanpela man na kisim nating mani bilong em.

Nau king i askim praim minista. Tasol em i tok, "Sori, Bikman. Mi no inap. Long taim mi manki yet mi no bekim bek wanpela samting mi bin

TU MINIT TINGTING



FRANK MIHALIC i raitim

kisim long narapela man."

King i askim planti man moa, tasol i no gat wanpela i stap husat i no bin stilim wanpela samting long laip bilong em.

Nau boi i tanim i go long king na lain bikman na i tokim ol olsem: "Yupela ol man i gat planti samting. Na yupela yet i bin go stilim nating kain kain samting. Olsem na yupela i no inap planim dispela mango. Tasol mi rabisman tru na mi stilim liklik hap kaikai bai mi no ken dai, na nau yupela i laik hangamapim mi. Yupela i ting em i stret?"

King i amamas long harim dispela gutpela skul na em i pogivim boi ya.

Yumi mas lukaut: nogut yumi tu i poinim hariap narapela man/meri na yumi yet i bin mekim wankain rong.

Tingim ol misinari long Misin Sande

ADAM ELLIOT i raitim

KATOLIK kalenda i gat kain kain pestode. Wan wan bilong ol i gat kain kain as tingting. Long Oktoba 24 ol Katolik bilong Papua Niugini bai selebretim Misin Sande.

Misin Sande em i wanpela spesel de long wanem em i taim ol Katolik bilong PNG yet i ken helpim Katolik Sios wantaim wanem kain helpim ol i ken givim.

Pater Timothy Elliot, Nesenel Dairekta bilong Misin Sande bilong PNG na Solomon Ailan i bin lukautim dispela wok inap long 15 yia olgeta.

Pater Elliot i tok as tingting bilong Misin Sande em bilong givim ol Katolik long PNG sans bilong lukluk bek long wanem mining bilong Sios na wanem wok Sios i mekim long kantri. Em i strongim tu bilip na tingting bilong ol Katolik long luksave olsem Katolik Sios em i wanpela Sios i stap long olgeta hap bilong graun.

Pater Elliot i tok, "Misin Sande em i taim ol Katolik bilong olgeta hap bilong graun i save selebretim long las Sande bilong Oktoba long wan wan yia. Longpela taim, PNG i no bin kisim askim bilong helpim, tasol bihain long Sios i luksave olsem PNG Sios i no moa wanpela misin kantri tasol i kamap lokol sios, nau em i ken givim sampela helpim long mama Sios."

Em i tok Misin Sande i strongim bilip na tingting bilong ol Katolik olsem ol i gat bikpela wok bilong mekim insait long sios.

Em i tok, PNG i no olsem ol arapela Sios long wol. PNG i go pas long planti samting na mama Sios bai amamas long liklik helpim ol Katolik bilong PNG i givim.

Em i tok ol Katolik bilong PNG i mas amamas bikos ol i save helpim mama Sios.

Pater Elliot i tok dispela program i save kamap long olgeta hap bilong graun na lukluk long en long dispela sait, PNG i mas amamas olsem em i save mekim sampela samting bilong helpim. Olgeta mani PNG i save bungim i save go long Rome.


Em i tok long Rome, ol i save skeim ol dispela mani i go bek long ol lokol sios bilong yusim long ol projek bilong sios.

Pater Elliot i tok long dispela we wanem liklik helpim ol lokol sios i save givim i save kam bek wantaim bikpela helpim.

Em i tok ol wok bilong karim aut Misin Sande em i wanpela bikpela samting. Ol i save karim aut awenes kempen we ol i save plen long wan mun bipo long de bilong Misin Sande. Na ol i save karim aut dispela promosen i go long ol daiosis na tu long ol aut stesen.

Pater Elliot i tok Misin Sande long PNG i bin stat long 1980s we Bisop Le May, husat i stap long Bogenvil i bin go pas long kirapim.

Em i tok Katolik Sios long PNG i no stap bilong strongim spirit na sol bilong ol pipel tasol. Nogat. Em i stap bilong helpim bodi tu long sait bilong helt, edukesen, na infrastraksa sevis olsem wokim ol rot, bris, ples balus na ol kain sevis.



• Sampela ol lain husat i stap insait long kibung bilong Yunaited Sios long Mosbi las wik.

Bruda Hebert mekim yut wok

PAUL GLAUT i raitim

HEBERT Wasun em i wanpela Katolik bruda bilong ol lain Sarto Bruda long Mosbi. Em i wanpela tasol long ol lain bilong Sarto Bruda husat nau i stap long Aitape Daiosis.

Bruda Wasun em i bilong ples Pes insait long Aitape. Em i bin joinim ol lain bilong Sarto long Januari 12, 1990.

Long 1997 Bisop Austen Crapp OFM i bin makim Bruda Hebert Wasun long karim aut wok bilong Yut Ministri insait long daiosis. Nau em i go stap long Pes Katolik misin na mekim dispela wok bilong em.

Olsem olgeta wok i save i gat gutpela na nogut bilong em. Em i wankain long Bruda Wasun long

wok bilong em. Em i tok sampela samting em i lainim ol yut na sampela samting ol yut i lainim em.

Bruda Hebert i wok aninit long Pater Elias Manira husat em i wanpela lokol pater i wok olsem peris pater bilong Pes Katolik misin. Em i save givim planti helpim long wok bilong Bruda Wasun.

Dispela em ol foapela as tingting Burda Hebert i makim na wok long bihainim long wok bilong ol yut:

- Long helpim ol yut na wok bilong Evanjelaisesen 2000 Jubili;
- Strongim wok bilong ol yut insait long lokol peris na komyuniti level;
- Spots, kalsa na pasin tumbuna program; na
- Ol kain kain liklik kos, long tok bilong God na long helpim ol lain insait long ples.

Em i kisim ol yut long autim tok na

ol i bin mekim wanpela wokabout i go long Yaluwape long hap bilong Lumi long bung na autim tok na bung long pilai na luk save long wanpela na narapela.

Long peris bilong Bruda Wasun i gat 5-pela rejistet yut grup olgeta:

- St. Antoni Yut Grup (Aisrokul);
- St John Yut Grup (Pes);
- St Michael Yut Grup (Aiserasp);
- St Leo Yut Grup (Lupai); na
- St Danniell Yut Grup (Poro).

"Mi save traim go lukim wanpela yut grup long wanpela wik. Long lukluk raun bilong mi, long ol yut grup, mi save traim strongim tingting bilong ol yangpela long laikim as graun bilong ol na mekim kain kain wok long en. Mi save toktok tu long strongim Kristen bilip insait long laip bilong ol wan wan," em i tok.

Nau yet Bruda Wasun wantaim 5-



Hailans Nius



• Ol taun sekuriti long Kundiawa i amamas long nupela yunifom na ka bilong ol long mekim wok bilong lukautim Kundiawa klin.

Westen Hailans pablik sevans kisim tok long kirapim provins

PIUS MON i raitim

NAMBA olsem 111 pablik sevans long Westen Hailans provinsal gavman i bin kisim setifiket long pinisim tripela wik kos.

Dispela kos i bin kamap long givim moa trening long ol wokman husat i bin winim posisen long wok yet insait long nupela tenis bilong ol posisen long pablik sevis.

Taim ol dispela lain pablik sevans i kisim setifiket pepa bilong ol, Deputi Edministreta bilong Viles Sevis Philip Num Maipson i askim ol dispela lain pablik sevans long yusim gut wanem save ol i kisim long mekim gut wok bilong ol i go moa.

Mista Maipson i tok ol manmeri i save kisim tingting nogut olsem ol pablik sevans i save kisim bikpela mani bilong gavman nating na i no save mekim gut wok. Ol i save ting ol gavman wokman i save kisim bikpela pe na i no wok, ol i save go pilai poka masin, pilai laki, dring spak, kaikai buai na amamas raun nating nating long ka.

Olsem na Mista Maipson i tokim ol dispela lain pablik sevans olsem ol i mas wok hat na soim pablik olsem dispela kain tingting na toktok i no stret bikos ol i lain bilong wok.

Michael Wandil, Deputi Edministreta bilong Polisi na Teknikel Sevis i tokaut tu olsem developmen isave stap wantaim wanwan manmeri olsem na em i askim ol lain ya long mekim wok bilong ol long kamapim samting long provins.

Mista Wandil i tok wanwan manmeri i save mekim wanwan wok bilong ol na taim ol i bungim wantaim, bikpela samting i save kamap we gutpela samting i ken kamap long provins.

Em i salensim ol manmeri ya long noken sindaun na driman. Tasol ol i mas traim long mekim wok bilong

kirapim provins.

Nau yupela i mas tingting long wanem samting yu ken mekim long provins na ino wanem samting bai provins i mekim long yu, em i tok.

John Kilip, wanpela pablik sevans husat i bin sindaun long dispela kos i makim maus bilong ol wanlain bilong em na tok amamas long edministresen bilong provins long kamapim dispela kos we i helpim tingting bilong ol i wok gut long mekim wok bilong ol i go het.

Mista Kilip i tok sapos edministresen i laikim provins i kamap gut, ol i mas kamapim dispela kain kos moa bai ol pablik sevans i ken oltaim stretim na klaiam gut tingting bilong ol na mekim gut wok bilong ol.

Insait long dispela 111 pablik sevans long kos, 8-pela kedet i bin kisim setifiket ol i kolim certificate of attendance.

YAKAM KELO i raitim

GOROKA plisman i bin bagarapim 10-pela man na kilim wanpela indai long Henganofi stesin long Sarere las wiken.

Dispela birua i kamap taim ol plisman i bin sekim wanpela ka we i gat 11-pela man long en na i laik sekim ol samting tasol ol 11-pela lain ya i sakim tok na pait bek wantaim ol plisman.

Provinsal Plis Komanda, Sief Inspekta Tony Wagambie i tok ol plisman i bin pait wantaim ol dispela lain Henganofi na bagarapim 10-pela lain na wanpela bilong ol lain ya i dai long dispela birua. Plis i kisim tripela strongpela fektori sotgan long ol dispela ples lain ya.

Mista Wagambie i tok long Fonde, ol plisman i bin sekim ol ka i go i kam long ol ples insait long Henganofi na ol i painim wanpela strongpela sotgan

bilong ol ami long wanpela ka. Ol plisman i kisim dispela sotgan na holim istap long stesin long dispela taim.

Tasol Mista Wagambie i tok moa olsem long Fraide dispela lain Henganofi we plis i bin kisim dispela sotgan long ol i bin kam bek gen long Fraide na askim plis long givim ol dispela sotgan. Tasol ol plisman i no givim ol.

Mista Wagambie i tok ol lain ya i go bek na long Sarere ol i kam bek gen long wanpela ka na tok-tok strong na kirap pait wantaim ol plisman long Henganofi stesin. Long dispela taim, ol plisman i sutim na bagarapim 10-pela bilong ol lain ya na kilim indai wanpela bilong ol.

Mista Wagambie i tok ol dispela lain i bilong Finitugu klen long Henganofi na ol i bin pait wantaim Fagame klen inap 8-pela krismas nau.

Em itok ol dispela 10-pela man ya i stap nau long haus kalabus

na wetim kot bilong ol long Novemba 2, 1999 long kamap.

Long narapela hevi tu long Goroka taun long Tunde dispela wik, Mista Wagambie i tok wanpela plisman bilong em i bin laik karim samon pepa bilong wanpela bikman i go givim long narapela bikman. Tasol sapota bilong narapela i kirap na i laik birua wantaim plisman ya wantaim ol samting bilong pait.

Mista Wagambie i tok dispela hevi i stap namel long memba bilong Goroka Henry Smith na wanpela kaunsil presiden. Tasol em i bungim tupela pinis long Trinde aste na askim tupela long wok bung wantaim plis na kisim dispela trabel man i kam long han bilong lo.

Mista Wagambie i askim ol manmeri long noken tru traim long mekim birua wantaim ol plisman. Ol i mas rispektim ol plisman na wok bilong ol long karimaut lo na oda.

Imbongu Distrik Het Kwata kamap long Walume eria

MATHIAS MALE i raitim

IMBONGU ilektoret long Sauten Hailans provins bai i gat nupela Distrik Het Kwata long Walume eria we ol i redim pinis long karimaut wok konstraksen long dispela yia yet.

Wanpela konstraksen kampani ol i kolim Pakena Kipoi Konstraksen Kampani i wokim

pinis ol gril banis na sanapim pinis haus bilong distrik edministreta pinis.

Nau yet konstraksen kampani ya i wokim faundesen o bes bilong ol gavman opis bai sanap long en. Long dispela bilding olgeta gavman opis bai stap insait long en.

Provinsal na Lokol Level Gavman Opis olgeta bai stap

insait long wanpela haus long dispela as tingting plen bilong dispela Kipo Konstraksen Kampani i tok long ol bai wokim tupela stori bilding.

Bihain ol bai wokim ol haus bilong slip we ol wokmanmeri na ol pablik sevis lain bai slip long en.

Memba bilong Imbongu Peter Peipul i tok, long kirapim dispela het kwata em bai kostim inap long K3.5 milien long kamapim dispela nupela distrik het opis.

Mista Peipul i tingting olsem dispela em i bikpela mani na i luk olsem dispela wok bilong sanapim het kwata bai pinis long yia bihain.

Planti ol pipel insait long Imbongu ilektoret ol givim bikpela tok tenkyu na amamas i go long memba long bringim dispela kain wok developmen i go long ilektoret bilong ol.

Pipel i tok tenkyu tu olsem ol i no bin lukim dispela kain developmen inap long 21 yia i kam nau ol i lukim tru developmen, ol i tok.

Ol i amamas tru na tok yu husat man o meri kamap memba bilong Imbongu ilektoret bihain yu mas bihainim lek mak bilong Mista Peipul, ol i tok.

Yia 2000 namel samting bai ol i opim nupela het kwata bilong ol.



Ol pipel bilong Sauten Hailans i amamas long bikpela kalsa so bilong ol long dispela yia.

Madang Nius



Hevi bilong wara long taun bai pinis

HENRICA HUFANTOUI i raitim

HEVI bilong wara long Madang taun bai pinis taim wok bilong nupela wara saplai tenk long Panim i pinis long Disemba.

Wara bod menesa bilong Madang, Gabriel Kapris i tok pasin bilong wokim nupela tenk wara bai helpim long saplain inap wara i go long ol pipel i stap insait long Madang taun.

Mista Kapris i tok dispela nupela tenk wara bai givim inap wara long bungim wari bilong ol pipel insait long taun na ol ples i stap klostu long taun.

Em i tok dispela nupela tenk i ken kisim 15.6 megalita bilong wara long wanpela de. Nau yet olupela tenk wara i save kisim olsem 4.3 megalita bilong wara na ol pipel insait long Madang taun na arere long taun i save yusim samting olsem 6.9 megalita bilong wara long wanpela de.

"Dispela tenk bai holim inap wara bilong saplain long olgeta lain husat i save yusim wara long wara bod. Kwaliti bilong wara i bungim Wol Helt Ogenaisesen stendet bilong wara bilong dring," Mista Kapris i tok.

Long wankain taim, PNG wara bod i tok ol kastoma husat i stap insait long eria bilong wara bod distrik i mas kisim wara saplai long taun wara saplai sistem.

Mista Kapris i tok wara bod distrik em Madang taun i karamapim.

Em i tok aninit long lo bilong wata bod, ol lain husat i no joinim pait bilong wara bilong ol wantaim Madang taun wara saplai sistem bai baim fain long mak bilong K500.

Em i tok ol lain husat i stap insait long taun eria tasol i yusim hul wara i mas aplai long PNG Water Board bilong kisim wara saplai.

"Mipela i askim olgeta lain i save kisim wara long Madang

long stat redim sindaun bilong ol yet long bihain taim na yusim nupela wara saplai sevis we Water Board klostu bai pinisim wok longmekim," em i tok.

Em i tok ol skul, bisnis haus, kampani na olgeta pipel i stap long Madang i mas yusim gutpela, klinpela wara long dring. Em i tok wara bod i save sekim kwaliti bilong wara klostu olgeta 24 hawa long wanpela de.

Madang plis kisim tok salens

HILLARY BUNBUN i raitim

OL pipel husat i save salim buai na lus smok long sait bilong ol rot na stua long Madang i tok ol plis bilong Madang i no mekim gutpela pasin long ol.

Planti bilong ol dispela lain em ol lain bilong ol setelmen long Madang husat i nogat wok long taun.

Las Fraide, ol Tas Fos lain i raunim ol na kisim ol samting ol i wok long salim.

Joseph Uka wanpela man i nogat wok na i marit na i gat pikinini, i tok ol plis i kisim ol samting bilong em long pes bilong 'Madang Book Makers'. Ol i kisim bek bilong em na kisim olgeta smok na buai insait long bek bilong em.

"Planti taim pasin ol plis i save mekim long ol liklik man em i nogut," wanpela man i lukim dispela pasin i tok.

Ol plis i mekim wankain pasin long James Mandi bilong Bundi, na tokim em long go bek long ples.

Mista Mandi i tok, "Ol lain i save salim ol buai na smok i save painim hat long lukautim famili bilong ol bikos prais bilong ol samting long stua i go antap na hevi bilong mani i stap bikpela long kantri."

Ol lain i laik baim smok long ol dispela lain i tok: "Mipela i amamas long baim lus smok bikos prais bilong wanpela paket em i dia tumas na mipela i no inap baim."

Mista Mandi i tok, ol i bilip ol plis i kisim samting bilong ol na yusim.

Rifom i no wok long Madang

EMMA BODEN i raitim

RIFOM sistem bilong Madang Provinsel Gavman i no wok, wanpela lokol level gavman wod memba i tok.

Katherine Moeder, Wod Seven lida i tok, em i no lukim kaikai bilong rifom i wok long Madang.

Em i tok: "Hevi i stap olsem ol Memba bilong Madang i no wok bung wantaim. Ol i save paitim toktok namel long ol yet na ol i no wok bung wantaim long yusim K1.5 milion we gavman i givim ol bilong helpim ol pipel bilong Madang."

Moeda i tok i luk olsem ol memba i gat laik long helpim wan wan distrik bilong ol yet.

Em i tok, long wankain taim ol lida bilong Lokol Level Gavman i wok long karim pen.

"Ol Memba i no save toktok long mipela. Na mipela i no save wanem samting i wok long kamap," em i tok.

Em i tok Memba bilong Madang

Open, Jacob Wama tu i save stap long Mosbi.

"Em i mas stap long Madang olsem bai mipela i ken wok bung wantaim long developim dispela ples na bringim sevis i go long ol pipel," Moeda i tok.

Ol Lokol Level Gavman lida i bin holim wanpela miting long Mande long toktok long hevi bilong mani ol memba i bungim na trajim painim rot bilong mekim gut wok bilong ol.

Moeda i tok i nogat inap mani long developim taun, na i nogat mani bilong karim aut developmen.

"Mipela i save kisim K50 long wan mun. Tasol wok mipela i gat em i bikpela tru. Mipela i save putim planti awa i go insait long wok bilong mipela. Em i wanpela ful taim wok," em i tok.

Em i tok K50 em i no inap long lukautim famili long wanpela mun. Em i tok Madang Lokol Level Gavman Presiden, Steven Amenasik bai bringim dispela hevi i go antap long miting bilong ol Lokol Level Gavman memba long Kavieng.

• Ol helt woka bilong Madang i save mekim gutpela wok na olsem ol man nogut i noken bagarapim ol na tu ol samting bilong haus sik. Foto: Wenceslaus Magun.



20 man repim wanpela meri long Madang

RACHAEL KEAEKE i raitim

20 man i bin repim wanpela meri long matmat insait long Madang taun, hapsait long Madang taun maket long ol wik i go pinis.

Dispela pasin nogut i mekim Madang Provinsel Plis Komanda, Benjamin Simanjon i givim strongpela tok lukaut i go long ol meri long raun long painim danis na raun long nait o go long ol arapela sosel ektiviti.

Wanpela plis ripot i tok dispela meri i wokabaut i go bek long haus

wantaim tupela pren man bilong em bihain long danis long klab 69. Long wankain taim 20 man i raunim ol, paitim tupela pren man bilong em na kisim dispela meri i go insait long matmat we ol i repim dispela meri.

Ol plis i painim em sampela awa bihain na kisim em i go long Modilon Haus Sik.

Ol plis i mekim wok painim bilong ol i go insait long dispela hevi yet.

Mista Simanjon i tok ol meri i mas was gut taim ol i go dring long ol nait klab.

Em i tok: "Ol meri i noken spak tumas. Ol i mas go bek long haus

bipo long danis i pinis."

Mista Simanjon i tokaut long dispela long helpim ol meri.

"Ol man husat i save repim ol meri i no bilong dispela graun. Na ol i mas kisim panisemen bilong dai," em i tok.

Mista Simanjon i tok planti ol rep pasin i save kamap taim ol man i smokim spak brus.

Em i tok ol i painim ol man i smokim spak brus long matmat bilong Madang. Long dispela em i no gutpela long wokabaut i go long matmat long nait taim.

VAT

VALUE ADDED TAX



FOR MORE INFORMATION, CONTACT: INTERNAL REVENUE COMMISSION, P. O. BOX 777, PORT MORESBY, PHONE: 321 1209, FAX: 321 7982

AUTHORISED BY: DAVID SODE COMMISSIONER GENERAL INTERNAL REVENUE COMMISSION

INFO 34P


I NOGAT WANPELA SPESEL WEI LONG BIHAINIM LONG VAT; TASOL YU MAS KIPIM GUT REKOT LONG OL SAMTING YU SALIM WANTAIM HAMAS YU BAIM

OL REKOTS BILONG YU I MAS IGAT SAMPELA LONG OL DISPELA SAMTING:


- TAX INVOIS
- RECEIPTS
- KES BUK
- KOMPUTA REKOTS
- TILL TAPES
- CREDIT NA DEBIT NOTES
- BANK STATEMENT
- DEBTORS/CREDITORS LIST

LUKIM IRC LONG MOA TOKSAVE

VAT. HELPIM LONG KAMAPIM WOK BISNIS LONG PAPUA NIUGINI



Lae Nius



Morobe Gavman lusim wanpela lida

YAKAM KELO i raitim

Wanpela bikman bilong Morobe provinsal gavman na lida bilong provins i lusim laip bilong em long Sande dispela wik.

Kaunsil presiden bilong Wampar Lokol Level Gavman na Siaman bilong Kalsa na Spot long Morobe provinsal gavman Titus Etof i bin lus long Sande dispela wik bihain long em i kamap memba bilong provinsal gavman long las ileksen i kam inap long dai bilong em dispela wik.

Edministreta bilong Morobe provins Aine Sengero i tok Morobe gavman na pipel i lusim wanpela strongpela na gutpela lida tru husat i save wok strong tru long kamapim gutpela senis long wok bilong Kalsa na Spot insait long provins.

Mista Sengero i tok wok bilong Spot na Kalsa inap kamap gut na go longwe moa long bihain bikos long ol stail na wok bilong leit Mista Etof. Em i man bilong putim em yet insait long mekim

wok na bung wantaim ol wokman bilong em na olgeta i save mekim samting wantaim, Mista Sengero i tok.

Mista Etof em bilong Munum viles ausait tasol long Lae Siti.

Edministreta Sengero i tok long dispela wik Fraide, bai ol i holim lotu long bodi bilong Mista Etof long Luteran haus lotu long Taun, bihain bai ol i kisim bodi i go long haus Tutumang we ol wanwok na wokman i ken lukim bodi bilong em insait long tupela aua samting na bihain bai bodi i lusim Lae siti na go antap long ples Munum long apinun. Bai bodi i go slip wanpela nait long ples na bihain ol bai planim em long neks de.

Wantok Niuspepa i no inap long kisim fut ripot long dai bilong leit Mista Etof bikos ol dokta bai karimaut wok painimaut bilong ol pastaim (pos-motem) long tokaut long wanem sik o bagarap long bodi bilong em.

Wantok tu i no bin inap long kisim gut ful stori long laipstail bilong leit Mista Etof long bipo i kam inap long dai bilong em long las wik Sande.

Wau Bulolo Kaunsil laik senisim presiden

..... Anduari redi long kisim wok

HENRY MORA-BANG i raitim

Wau-Bulolo Eben Lokel Level Gavman bai holim vot i nogat bilip long rausim presiden bilong en Edward Ringao long neks wik Tunde Oktoba 19.

Insait long wanpela pas i go long kuskus bilong Lokel Level Gavman, 6-pela wod kaunsil i sainim wanpela pas long soim sapot long holim dispela vot na makim Cass Anduari olsem nupela presiden.

Ol kaunsil sainim pas em Jack Bito (Wod 3), Joseph Yehi (Wod 6), Inger Muti (Wod 7), Raphael Dru (Wod 1) na Thaddeus Peter (Mausman bilong Yunion) na Cass Anduari yet (Wod 5) Kaunsil Bito i muvim dispela mosen na Joseph Yehi i sekendim.


Dispela mosen bilong vot i nogat bilip ol i givim long kuskus bilong Wau-Bulolo Urban Taun Kaunsil long Oktoba 5 na i givim wanpela foa ten (14) de long Taun Kaunsil long singautim miting long holim dispela vot i nogat bilip.

Bikpela astingting rausim Ringao olsem presiden em bikos ol 6-pela kaunsil i ting olsem kain lidasip bilong Ringao i no gutpela na planti ol man insait long Wau-Bulolo na tu ol provinsel na nesanel lida i save mekim planti toktok.

Arapela samting tu, ol dispela 6-pela wod kaunsil i kisim planti singaut long senisim Ringao olsem presiden.

Sampela astingting long senisim presiden Ringao em olsem:

- em i no gat gutpela pasin lida long holim wok meya o presiden
- em i no gat strong long toktok long ol bikpela toktok we i ken helpim Wau na Bulolo taun
- em i no soim laik long holim wok lida na tu lukautim jenerel wok edministresen bilong kaunsil
- em i no save bihainim na karim aut ol toktok em kaunsil i pasin o



• Cass Anduari.

oraitim long ol miting bilong en stat long 1998.

• em i no save toksave long ol kaunsil memba long ol bikpela toktok, projek na ol sampela toktok i kamap long Distrik Plening Komiti na tu long Morobe Provinsel Tutumang stat long 1998.

Mausman bilong ol kaunsil Inger Muti i tokim Wantok olsem insait long wanpela miting long wiken olgeta 12-pela kaunsil i sapotim dispela vot i nogat bilip egensim Edward Ringao na ol i makim Anduari olsem nupela presiden.

Anduari em olpela jenerel sekretari bilong PNG Forest Prodak na i gat eksperiens long holim wok presiden o meya bilong Wau-Bulolo Taun. Anduari em bilong Angoram insait long Is Sepik provins, em i marit na i gat tripela pikinini.

"Mipela i gat strongpela bilip long kendidet husat i gat bikpela eksperiene na i wok moa long 20 yia long praivet sekta. Mipela i ting olsem mipela i ken winim tupela o tripela moa sapot na winim dispela ileksen.

"Mi amamas tru long joinim dispela tim na laik lukim ol wok rifom bilong Provinsel na Lokel Level Gavman i mas wok long Wau na Bulolo. Long semtaim tu, mi laik

traim rausim hevi bilong lo na oda.

"Mi stap longpela taim long Wau-Bulolo, na miting mi ken helpim long stretim dispela hevi sapos mi winim wok presiden.

"Wantaim gutpela sapot bilong ol arapela kaunsil, mi i ken mekim Wau Bulolo olsem wanpela gutpela ples long sindaun. Sapos mipela i gat strong na laik, mipela i ken mekim ol dispela wok.

"Arapela samting em long stretim hospital, ples balus na ol rot insait long Wau Bulolo taun

"Mi yet lukluk long wok wantaim bisnis komyuniti long kamapim ol kain wok olsem Semba ov Komes i save mekim

long ol bikpela sili we mipela holim ol miting na stretim ol hevi i kamap insait long raun na makim wanpela mausman long stap insait long Semba ov Komes long Lae.

"Arapela wok mi bai wokim em long wok klostu wantaim ol plis na komyuniti lida long duanim hevi bilong lo na oda," Anduari i tok.

Bikman bilong Angoram i tok Wau Bulolo i gat namel long 1930 na 1940 we Australia na planti ol arapela kantri i bin kisim planti helpim tru long gol long dispela tupela taun, na mipela i laik ol i mas givim bek sampela samting i go bek long dispela tupela taun.

Mausman bilong ol kaunsil Muti i tok ol bikpela projek olsem bris na rot i mas kamap long dispela taun.

Em i tok tu olsem dispela tupela taun tu i mas kisim kilipela wara long dring. Wara em i bikpela hevi tru long ol setelmen na ol i mas mekim dispela ol samting. Dispela tupela taun ya i mas kisim senis, na mipela i mas painim mani long mekim dispela wok ya.

Muti i tok "dispela wok i no isi. Mipela i ken winim dispela wok o projek bipo long taim bilong mipela i pinis long yia 2002."

Husat bai skulim yumi long hevi bilong yia 2000?

Nau yet long Papua Niugini, planti manmeri i wok long kauntim toktok long dispela hevi bilong Y2K o yia 2000, o Millenium Bag ol kolim.

Planti toktok long sait bilong Lotu ol pipel i toktok long yia 2000 bai las de we Kraisi i kam bek na skelim yumi. Na ol dispela lain i no laik wok gaden na planim ol kaikai samting. Sampela pipel i laik rausim olgeta mani bilong ol long benk na planti arapela tok win i wok long paulim tingting bilong ol pipel.

Pipel i stap long tudak na i no gat wanpela saveman o meri i sanap redi long tok klia long dispela. Ol niuspepa tu i no raitim tru as bilong dispela hevi bilong Y2K bai mipela pipel i ken kila long en na i stap inap long yumi bungim yia 2000. Yia 2000 i klostu tru nau na i gat tupela mun tasol i stap na bai yumi mekim wanem nau.

Sampela toksave i mas kamap bilong helpim pipel bilong yumi i klia na i stap bai paul pasin na tingting krangki i no ken kamap. Sampela save manmeri i mas skulim yumi olsem dispela hevi bilong yia 2000 bai bringim wanem ol lain pipel. Em bai givim hevi long ol pipel long taun na sili tasol na i no long ol pipel long ples o olsem wanem. Bai dispela hevi i bungim ol pipel long ples olsem wanem na long taun na sili bai bungim dispela hevi olsem wanem. Dispela tok i mas klia.

Insait long dispela hevi sampela man i driman na i tok long yia 2000 bikpela san i kamap na olgeta kaikai na wara bai pinis na longpela taim bilong hangre i kamap olsem long driman bilong Josep long kantri Ijip taim 7-pela kau i bun nating i makim 7-pela yia bilong hangre long Ijip. Dispela em i wanpela tingting krangki i kamap namel long ol pipel na paulim tingting bilong ol pipel.

Sapos dispela hevi bilong yia 2000 em i hevi bilong taun na sili tasol na i no bilong ol pipel bilong ples orait dispela tu i mas kamap klia long pepa na ol pipel i ritim na kisim gutpela save na i stap. Na tu ol masin olsem kompyuta na arapela masin i save kontrolim wanem kain samting na bosim laip bilong yumi bai bagarap na bai yumi bungim hevi long yia 2000. Dispela ol samting i mas klia long ol pipel bipo long mun Desemba 1999.



BILUM

wantaim

Sir Getake Gam

Sampela tingting tu i kamap olsem; dispela hevi long bilong yia 2000 bai kamap na bungim yumi bipo long Januari 1, yia 2000 na tu bihain long Januari 1, yia 2000 bai dispela hevi i kamap yet. Man, dispela toktok i bringim pret i kam long pipel na planti ol i toktok na askim wantaim wari i stap.

Husat inap kliaim na pipel i klia liklik na i stap. Na sapos dispela kain toktok i tok win tasol na i no tru, orait, sampela save manmeri i mas raitim long pepa na mipela i kisim save long en na i stap isi.

Taim save na strong bilong yumi man yet i giamanim yumi na bagarapim sindaun bilong yumi, yumi man i mas save na bilip olsem i gat narapela man i stap, em i as bilong save na gutpela sindaun na tu em i bosim laip bilong yumi. Dispela man, em i Papa God yet. Yumi putim ia na em i ken givim stia long yumi long yia 2000 na bihain.

Ol birua man kilim Yunivesiti tisa

BUSTIN ANZU i raitim

Yunivesiti bilong Teknoloji bilong Lae i bin lusim wanpela olpela na namba wan propesa long wok skul bilong Akitekta na Bilding long Yunitek long las wik Sarere.

Propesa ya em propesa Wallace McRuff, na em bilong ples Orogan long Yunaited Stet ov Amerika na em i stap wantaim dipatmen bilong Akitekta na Bilding.

Ol stilman ya i bin kilim i dai propesa long haus bilong em long Yunivesiti long Fraide nait. Ol man i bin painim bodi bilong em long neks moning na ripot long plis.

Bos bilong Akitekta na Bilding dipatmen propesa Milani i tok dispela birua i luk olsem ol man i save long em na kilim em i dai na ino luk olsem ol stilman tru i kilim em.

Em i tok tu olsem ol i lusim wanpela top saveman long sait bilong Akitekta na Bilding long wanem man ya i gat moa save na i nogat wanpela man o meri inap kisim ples bilong em.

"Mipela i lusim wanpela saveman na dispela birua i soim olsem ol birua i save gut long em na kilim em i dai. Dipatmen bilong Akitekta i sori tru long dispela birua long wanem ol i kisim planti strong long propesa McRuff," em i tok.

Propesa McRuff i bin kam long PNG long 1972, taim PNG ino kisim independens yet. Na bihain joinim Yunivesiti bilong Teknoloji inap 1982 em i go bek long kantri bilong em. Tasol skul i lukim save bilong em na kisim em i kam bek gen bihain long 6pela krismas. Taim em i kam bek em i kamapim narapela seksen aninit long Akitekta na Bilding we ol i kolim Tredisinel Akitekta bilong Papua Niugini o tumbuna pasin bilong wokim haus insait long Papua Niugini.

Propesa ya i bin go pas long raun, long ol ples na haus lain na kisim pota na stori long ol long ausait ol i

save wokim ol haus long ples.

Dispela em long wanem planti ol yangpela man meri insait long kantri nau i wok long go long taun na sili na lus tingting long ples bilong ol. Olsem na propesa ya i laik kisim ol dispela stail na pasin bilong wokim haus na ol ol Atifeks na putim i stap inap long bihain bilong ol yangpela i ken luksave na yusim.

Propesa McRuff i bin go pas long dispela na laik skruim save bilong em na wokim planti senis long dispela taim em i bungim dispela birua-

Ol tisa na sumatin bilong dipatmen bilong Akitekta na Bilding i wok long helpim ol Yunivesiti long holim wanpela fineral sevis long soim pasin respek long propesa ya.

MV Doulos pulim planti lain long Lae

BUSTIN ANZU i raitim

BIKPELA na olupela sip we i save karim bikpela buk bilong salim i lusim pinis bris bilong Lae long aste Trinde.

Dispela sip em MV Doulos we i bin sua long bris tupela wik i go pinis i lusim Lae.

Dispela sip i pulim planti manmeri pikinini long lukim ha baim-ol buk insait long sip. Long olgeta de, planti tausen manmeri na pikinini i save pulim lain long lukim dispela sip.

Long tupela wik long Lae, ol i bin kamapim planti ol samting insait long sip na tu ausait long sip na ol ples i stap klostu.

Long sip em ol raun na salim buk na tu ol holim ol sampela bung insait wantaim ol grup we ol i laik holim, ol kainkain ol bung. Long ausait long sip, ol i holim lotu, serim tok bilong God na planti ol narapela samting we i pulim planti manmeri i kam na lukim.

Wanpela long ol dispela samting em wanpela pilai we ol i holim long Se Ignatius Kilage Stadium (SIES). Dispela pilai em ol i singsing long pasin tumbuna bilong ol yet. Ol i bin kolim olsem To the Nation. Tok piksa bilong dispela pilai em olsem kisim tok bilong God na telemautim i go aut long olgeta hap long graun we ol manmeri i mas harim.

Ol misineri husat i save stap long dispela sip i putim kainkain pilai, olsem wanpela pilai bilong ol Pilipino ol i kolim Tina Clean Dance i go pinis long Kauboi Danis bilong Amerika.

Planti man na meri i pulim, lain long lukim dispela ol pilai na ples i bin pulap tru.

Insait long dispela sip i gat 9-pela Papua Niugini misineri tu i stap. Na taim sip i kam sua long Papua Niugini, narapela 5-pela i joinim ol. Na nau bungim wantaim em 14 PNG lain i stap.

Bungim olgeta long sip em i gat olsem 320 kristen man na meri bilong 37 kantri.

Taim ol i lusim Lae ol bai go sua long Rabaul na stap 4-pela de na bihain go olsem long Manus na stap olsem wanpela wik na go gen logn Wewak na stap narapela wan wik na bihain bai lusim PNG na go long Sentrel Malaysia.

Dispela sip em ol i bin wokim long 1914, tupela krismas bihain long narapela bikpela sip ol i kolim Titanic, we i bin kapsait i go daun logn solwara na i bin kilim planti ol pasindia long sip.

Pastaim dispela sip we nau ol i kolim Doulos i save karim ol pasindia na kago. Tasol bihain long 1977, ol i senisim i go bilong karim ol misineri na tu salim buk. Long dispela taim i kam inap nau, ol i koiim dispela sip olsem Doulos.

Ol dispela lain husat i save raun long dispela sip i no save kisim pe olsem ol narapela wok manmeri. Tasol ol lotu bilong ol yet i save sapotim ol long sait bilong mani na rot bilong ol long go bek taim ol i pinis wok.

Gavana Wenge i bin tok welkam taim dispela sip i kam sua long Lae long tupela wik i go pinis.

AusAid sanapim fut bris long Kasanombe

FRANCO NEBAS i raitim

PIPEL bilong Kistuen viles long Kasanombe Nawae ilektoret i ken amamas long nupela fut bris o waia bris Australia Gavman (AusAid) i sanapim.

Australia aninit long AusAid Program bilong ol i bin kamapim dispela waia bris we kos bilong em olsem K78,340,00.

Memba bilong Nawae ilektoret Kennedy Wenge tu i bin givim helpim i go long pinisim dispela bris i kamap.

Mista Wenge i givim K10,000 i go tu long helpim long bris.

Kistuen o Kasanombe bris em brukim Kasanombe wara inap long mak olsem hap kilomita long ples Kasanobe stesin

ples balus.


Minista bilong Provinsal na Lokol Gavaman Afeas Andrew Kumbakor yet i bin opiseli opim bris las Trinde we Minista bilong Woks Mao Zeming, Dokta Fabian Pok, na Gavana bilong Morobe i witnessim.

Minista Kumbakor i tok olsem 100 yia i go pinis tasol ol pipel i wet yet long sevis.

Em i tok, sevis i no kamap long ol pipel long olgeta hap bilong kantri.

Mista Kumbakor i tok bikpela amamas i go long Australia gavman long mekim dispela waia bris i kamap.

Em i tok pipel long Nabak mas amamas long wanem planti hap long kantri kain helpim i no save kamap long ol olsem na ol pipel mas lukautim gut dispela bris.



• Gavana bilong Morobe Mista Wenge.

• Mista Saonu wantaim ol sios lidas na kaunsilas bilong Yus LGC sanap klostu long nupela haus lotu long Sindamon.



Lae bai holim yia 2000 Tred Fea

FRANCO NEBAS i raitim

TRED FEA o So bilong mekim ol samting i we i save kamap olgeta yia long Papua Niugini bai lukim Lae i holim long Yia 2000.

Dispela Tred Fe i save kamap tasol long Pot Mosbi we ol kampani o bisnis haus long PNG save bung na soim ol samting ol i save mekim long kantri.

Lae long namba wan taim tru bai i holim dispela so bihain long ol kaunsil bilong wokim ol samting i tok orait.

Disoela Tred Fea bai kamap long Sir Ignatius Kilage Stadium long mun Mas 25 na 26, 2000 we het tok i tok, "baim PNG-Made, kamapim moa wok."

Tred Fe bai lukim olgeta kampani o bisnis haus long PNG i kam bung na soim ol prodak o ol samting ol i save mekim hia long PNG.

Dispela tu em sans long ol pablik i lukim long ai bilong ol yet wanem ol samting ol kampani long PNG i save wokim o mekim hia yet long kantri.

Ol lain komiti i go pas long dispela so tu i plenim long kisim sampela ovasis kampani i

kamap long dispela bung tu long lukim ol prodak na kamapim ol gutpela tingting long promotim ol samting PNG i mekim.

"Siaman bilong ogenaizing komiti long Lae, Keith Kingston i tok, "mipela i amamas tru long holim dispela Tred Fea long Lae, i no em namba wan taim tasol bikpela samting i kamap long nupela sensari o miilinum."

Planti ol samting em ol i plenim long mekim long taim bilong Tred Fe (So), long Fraide nait Mas 24, 2000, bai lukim opisel opim bilong dispela so na presentesen bilong ol prais long ol wina long ol kainkain resis.

Long Sarere na Sande tu bai gat planti ol arapela samting olsem semina, konset na ol kampani soim ol pablik long samting ol i save mekim.

Siaman Keith Kingston i tok, "long kisim maus bilong ol komiti bilong em, em i laik singaut long olgeta bisnis haus o kampani long stap insait long dispela so long soim ol prodak o samting ol i save mekim na mekim dispela Tred Fea i moa namba wan."

Minista bilong Tred na Industri Michael Nali i bin lonsim dispela yia 2000 Tred Fea long Tunde long Lae

Sindamon ples kisim nupela haus lotu

OL manmeri bilong Sindamon ples insait long Kabwum distrik long Morobe provins i amamas tru bihain long planti yia ol i bin nogat wanpela haus lotu na gavman sevis inap nau.

Ol i bin amamas long opim nupela haus lotu bilong ol long Septemba 26, 1999. Dipsela haus lotu em memba Ginson Saonu wantaim ol manmeri bilong Sindamon ples yet i bungim mani wantaim na kamapim.

Wok bilong sios na gavman em bilong helpim ol manmeri i stap long olgeta hap bilong kantri. Tasol planti ples i no save kisim ol hepim i kam long sios na gavman. Bilong wanem ples bilong ol i stap longwe tru long rot bilong ka, balus na sip olsem long Sindamon ples, memba bilong Kabwum Ginson Saonu i tok.

Mista Saonu i tok tasol em i wok bilong mipela ol lida long skelim na givim liklik i mas go long wanwan hap. Olsem bai pipel i ken kisim bel isi na wet long bikpela sevis ken kam isi isi.

Memba i tokim ol manmeri bilong

Ursot na wanwan wod kaunsila bilong Ursot eria long bungim han wantaim na plenim na kamapim ol komyuniti projek olsem haus lotu, wara saplai, pri skul na ol arapela komyuniti projek long wanwan ples.

Sapos wanpela liklik ples insait long eria bilong yupela i no kisim wanpela liklik sevis em yupela mas tingim em pastaim. Olsem sapos wanpela sipsip namel long planti handret sipsip i lus na 99 tasiol i stap, yumi ken tingim dispela wanpela na helpim em bai em kamap wan handret olgeta, Mista Saonu i tok.

Ol manmeri na lida bilong Uruwa, Dinangat, Bungawat insait long Ursot eria i bin kamap na witnessim dispela opening bilong nupela haus lotu long dispela taim.

Ol sios lida na kaunsila wantaim pipel i tok amamas long sapot memba Saonu i givim ol long kamapim haus lotu na namba wan taim wanpela memba bilong palamen i go slip long ples wantaim ol.

Plastik kempen long Madang i stap

**JOYCELINE TSERAHA
i raitim**

OL manmeri long Madang i no inap salim plastik moa long Rabtrad na Andersons Foodland long kisim mani.

Dispela kempen bilong klinim Madang taun long rausim olgeta plastik bek na bungim ol na go salim i stop pinis bikos ol hevi i kamap we ol manmeri i no mekim stretpela pasin.

Brens Menesa bilong Andersons Foodland Gary Dunlop i tok dispela kempen we ol i bin statim i kos moa bikos ol manmeri i wok long karim ol plastik bek i kam long Lae, not kos Madang, Karkar na Wewak na salim long Madang taun.

Em i tok mipela i helpim tasol long klinim Madang taun na i no long ol arapela hap bilong kantri.

Brens Menesa bilong Rabtrad Hamish Bassett i tok ol i plen tasol long klinim Madang taun tasol ol manmeri i karim ol plastik i kam long olgeta hap bilong PNG. Mipela i no ting long klinim olgeta hap bilong PNG.

Ol i bilip ol plastik we tupela

bikpela stua ya i baim na go tro-moi long dam, ol manmeri i save go kisim gen na kam bek salim.

Mista Dunlop i tok em i ting ol wokman bilong Madang Taun Atoriti ino mekim gut wok long kukim ol plastik. Olsem na sampela plastik we i no paia gut em ol manmeri i kisim na kam bek salim.

Tasol Madang Taun Atoriti husat i go pas long dispela wok bilong kukim ol plastik i tok dispela toktok i no tru.

Taun Menesa Anton Yagama i tok ol toktok ol manmeri i mekim i no tru. Taun Atoriti i save kisim olgeta plastik na kukim.

Em i tokaut tu olsem Madang Taun Atoriti i save wok strong long karimaut dispela kempen bikos ol tasol i bin kamapim dispela tingting.

Mista Yagama i tok ol i gat wanpela patrol grup we ol i save was long lukim olsem ol plastik ol manmeri i kisim i bilong Madang taun tasol na i no long arapela hap ausait long taun.

Em i tok olsem ol manmeri i mas senisim gut tingting bilong ol sapos ol i laikim Madang taun i stap klin olsem nau em i stap.

Ihu Hai Skul i stap long hevi

HELEN REI i raitim

IHU Hai Skul long Galp provins ibin pas sampela taim nau bikos long dai bilong wanpela tisa tupela mun i go pinis.

Ripot i tok dispela tisa bilong Simbu provins Benjamin Mondia i bin ron long wanpela dingi wantaim liklik 5 yia pikinini boi bilong em na sampela lain long Kerema i go long Ihu taim dingi i kapsait long solwara long Ogas 4, 1999.

Mista Mondia i bin tisa long Ihu Hai Skul tripela krismas bihain long em i pinis long Yunivesiti na go wok tisa.

Ripot i tok bodi bilong tisa ya em ol i painim tasol bodi bilong liklik pikinini bilong em ol i no painim yet inap nau. Inap nau ol skul sumatin tu ino go gut long skul.

Mista Mondia i save tisim Komes long ol gret 9 studen na Sosel Sains, Psikol Eduksen long ol arapela gred.

Bihain long dispela tu, ol tisa

bilong arapela provins tu i no go bek gut long skul bikos ol pret tu long laip bilong ol. Ol i wok long askim long trensfea nabaut i go long ol arapela provins.

Wanpela mausman i tokaut long miting olsem bikos dispela skul i stap longwe tumas, ol tisa long arapela provins i mas trensfea i go aut long ol arapela skul.

Ripot i tok bikos long hevi bilong trenspot na nogat inap'kaikai, Mista Mondia i bin lusim famili bilong em long Mosbi na em tasol i go wok tisa long hap.

Sabsidi bilong skul igo insait long skul tasol ol sumatin i no go bek long skul, olsem na ol papamama i wari long dispela tu na tok-tok i stap, ripot i tok.

Dispela skul i gat 260 sumatin long gret 7 inap gret 10 tasol we inap gat olsem 16 tisa. Tasol skul i gat tasol 7-pela tisa, ripot i tok.

I gat toktok i kamap olsem ol tisa i no amamas tu long stap long hap bikos i gat hevi long kaikai na ol stua na maket tu i no stap klostu

long ol. Ripot i tok ol sevis i go long Ihu distrik ino gutpela tru na hevi bilong trenspot igo kam i hat long ol we i mekim planti sevis i hat long i go long hap.

Planti bilong ol dispela hevi i mekim na skul i nogat gutpela rekot tumas na ol tisa i no save wok gut wantaim.

Ripot i tok dispela hevi we dingi i kapsait long solwara i no nupela ripot bikos kain hevi olsem i save kamap bipo long dispela hap.

Ripot i tok ol eduksen atoriti long hap i wari tasol long ol gret 10 sumatin i mas go bek na redim ol yet long mekim gret fainel eksem (tes). Skul i mekim sampela ripot pinis tasol dispela fainel tes bilong ol gret 10 sumatin tasol em ol studen i mas go bek na mekim.

Eduksen atoriti long hap i wok long redim ripot bilong salim go long het opis long Mosbi we Eduksen Seketeri Peter Baki i mas luksave long wanem samting i kamap long Ihu Hai Skul.

Senisim pasin na kamapim gutpela sindaun

ROSA KOIAN i raitim

PLANTI senis i wok long kamap nau insait long ol komyuniti bilong yumi. Sampela ol dispela senis i gutpela na sampela i no gutpela long yumi.

Dispela ol senis i kamap bikos ikonomi bilong kantri bilong yumi i gat hevi. Ikonomi em i toktok long ol rot mani na ol samting i kam na yumi yusim olsem wanem.

Yumi luksave nau olsem prais bilong ol kaikai, kolos na ol samting i wok long go antap yet. Na

planti i sotwin tru long painim kaikai na ol samting bilong famili.

Sampela sampela pipel i no wet. Ol i painim karkain tingting bilong helpim stretim sindaun bilong ol.

Ating yu wanpela meri i save laik baim kolos long stua. Tasol sapos yu save long samap, yu ken mekim kolos bilong yu na putim mani bilong kolos ya i go long skul fi o haus sik fi bilong ol pikinini. Ating yu save baim bret long stua, tasol sapos yu save long kukim bret bai yu ken baim hap abus bilong famili.


I gat planti ol grup i stap nau long ol komyuniti i wok long kirapim ol liklik wok bilong helpim komyuniti i sanap strong. Ol i no givim mani sapos tasol ol i givim tingting na save long helpim yu na komyuniti bilong yu. Kain ol grup olsem Morata Lokol Komyuniti Divoelopmen Faundesen, BEST, GROW, Atprojects, HELP, WWF, na planti arapela.

Tasol planti pipel i sanap yet na i tok i no wok bilong ol o ol i no laikim dispela kain helpim i kam. Ating dispela kain pasin i no gutpela tumas.

ELA MOTORS HANKOOK TYRES

**Plantu stail
long ol kualiti
Hankook tyres
long fitim ol
kain kain kar
na trak**

Kisim ol long Ela Motors Pats dipatman na ol Tyre senta long olgeta hap.



Ela Motors
LONG OLGETA HAP

HEAD OFFICE PH 3229614 PORT MORESBY 3229414 LAE 4722322 KOKOPO 9829100 RABAU 9821988 MADANG 8522188 GOROKA 7321844
MT HAGEN 5421888 WEWAK 8562255 KAVIENG 9842132 KIMBE 9835155 TABUBIL 5489060 VANIMO 8571254
PORGERA 5479367 KUTUBU 5496685 BUKA 9739915 LIHIR 9864099 ALOTAU 6410100

Sauten Rijon ripot



• Ol skul manki long Cameron Sekendori skul long Milen Be provins i karim ol kaikai, buai na pik long bikpela kalsarel de bilong skul long las mun.

Koiari pipel laikim
Moi Avei soim plen

KENNEDY EDENE i raitim

TOKTOK bilong Moi Avei memba bilong Kairuku Hiri long Sogeri long opim nupela bris long dispela wik Mande, i no amamasim sampela ol Koiari pipel na ol Sogeri komyuniti.

Wanpela man husat bin stap insait i tok, memba mas moabeta tokim wanem kain gutpela developmen plen em gat bilong ol Sogeri pipel na Koiari eria olgeta.

Koiari eria em stap long ilektoret bilong em na em gutpela taim ol pipel laik save wanem kain samting bai em wokim bilong pipel.

Em noken toktok tumas long kompensesen ol papagraun save toktok na kisim long graun bilong ol na tu noken toktok long ol olupela taim stori.

Yumi mas tok long nupela samting bai yumi bai bringim long ol pipel na stretim toktok bilong kompensesen. Pipel makim yu olsem maus bilong ol pipel noken mas toktok strong long givim gutpela helpim long pipel na pipel bai na toktok tumas long kompensesen.

Dispela nupela bris em i tupela ka ken ron wantaim na i gat tupela futpat long saitsait.

Bris em ol wokim long simen tasol wantaim strongpela waia long insait.

Em wanpela nupela kain bris insait long Sentrel provins na tu insait long dispela kantri.

Kain bris em ol wokim em gutpela long ol kostol eria bikos ol ain o stil bris save ros hariap tasol simen bai i no inap ros.

Bris em wanpela Aid projek na ol lokol kampani Nawai konstraksen bin wokim aninit long Bridge Replacement na Appredim Program (BRUP).

Em kisim moa long tupela yia long pinisim.

NCDC laik senisim stail bilong maket

NESENEL Kapitel Distrik Komisn bai kamapim ol liklik mini maket long planti hap bilong Mosbi siti na givim laisens long ol lain i ken gat ol wilwil o liklik bas we i ken salim ol kaikai na ol samting raun long siti.

NCD edministreta Jamie Maxton Graham i tok dispela rot em bilong mekim ol manmeri i ken salim ol samting bilong ol tasol long gutpela rot we ol i no inap mekim pipia nabaut long ples. Na tu ol i ken gat laisens long mekim dispela wok.

Mista Maxtone Graham i tok ol lain i save salim ol dring na samting nabaut long Mosbi siti i mekim planti pipia tru long ples na i mekim planti hap i kamap nogut tru wantaim ol rabis na pipia.

Mista Maxtone Graham i tok olsem ol bai kamapim ol liklik mini maket we em bai kamap ples bilong ol lain i gat laisens long ronim ol liklik wilwil na stua bas samting long go salim ol samting bilong ol long en. Na ol i no inap go nabaut nabaut we bai mekim planti pipia long ol ples.

Em i tok olgeta dispela liklik maket bai i gat lo bilong ol wankain olsem ol bikpela maket long Mosbi siti. Bai i gat ol wokman i was na lukaut gut long ol dispela maket i mas gat gutpela klipela ples long ol manmeri i salim kaikai bilong ol long gutpela na klipela wei.

Mista Maxtone Graham i tok taim olgeta mini maket i wok gut nau, bai i nogat

man o meri i painim toktok na maket nabaut long rot o banis. Olgeta i mas go stret long mini maket. Sapos husat man o meri i bungim lo na i no salim ol samting long ol mini maket stret, bai plis i holim na sasim ol.

Em i tok ol rot atoriti i bin traun long bipo long rausim ol maket nabaut we i no bihainim lo tasol ol eksen bilong ol i no wok bikos atoriti long bipo i no givim arapela rot ol manmeri i ken bihainim. Ol manmeri i save stapim maket bilong ol na taim ol wokman bilong siti atoriti i no mekim wok bilong ol moa, ol manmeri i kam bek gen, em i tok.

Mista Maxtone Graham i tok dispela rot em long mekim ol manmeri i groim ol frut na kaikai bilong maket na salim gut long ples we NCDC i orait long en we ol manmeri bilong siti na ovasis tu i ken baim ol gutpela frut, kumu na ol kaikai bilong maket.

Siti edministreta i tok dispela eksen bilong NCDC i sut long bikpela namba bilong ol manmeri (populesen) we i wok long kamap planti nau long ol setelmen na ol nupela blok we i wok long kamap planti long siti.

Mista Maxtone Graham i tok nupela sistem long liklik mini maket na ol wilwil o liklik bas bilong salim ol kaikai na ol samting bai i gutpela planti manmeri bai laikim. Olsem na dispela sistem bai wok sapos ol lain i mekim dispela samting yet i amamas

na go het long bihainim long givim gutpela sevis long ol kastomas.

Mista Maxtone Graham i tok NCDC aninit long seksen bilong Sosel Sevises na Helt Divisen bai lukluk na was long dispela samting na lukim olsem ol manmeri i mekim samting stret. Sapos ol manmeri i no bihainim rot stret we NCDC i makim, ol bai kisim sas o NCDC bai rausim laisens bilong ol.

Ol maket pipel i autim wari

MATHIAS MALE i raitim

KLOSTU planti lain o komyuniti bilong Nesenel Kapitol Distrik i kisim bikpela taim stret nau. Dispela em taim ol Plis na Siti Renja ol wokbung na rausim ol manmeri long noken salim smok na buai long ol maket na ol long ol strit bilong Mosbi siti.

Dispela pasin bilong klinim na lukautim siti mekim na manmeri i kisim taim nau long Mosbi.

Ol maket lain i tok planti bilong ol hia long Mosbi ol i no save wok tasol wok bilong ol em long salim buai Kola, lus smok na ol arapela samting we ol i save kisim liklik toea bilong lukautim famili bilong ol.

"Tasol nau ol i tok ol i kisim bikpela taim stret no ol i na save we ol bai kisim mani na lukautim ol famili bilong ol."

Wanpela man Joe Rambai bilong Simbu i tok

em i nogat wok bilong em tasol em i save salim ol buai na lus smok long lukautim famili tasol nau long dispela pasin tasol em i kisim taim stret long salim tupela pikinini long skul na painim kaikai tu.

Misis Susana Kiap bilong Wabag i tok taim ol Plis na Siti rRnja i rausim ol buai na smok bilong em na ol i kisim mani bilong em wantaim na dispela em i no gutpela pasin.

"Ol Plis na Siti Renja mas luksave olsem nau em PNG painim bikpela hevi tru long mani na kain pasin we ol i kisim mani wantaim buai na smok nabaut em i no gutpela pasin, Misis Kiap i tok.

"Long bihainim dispela hevi, ol pipel i tok, gavman i mas luksave long dispela samting bikos planti pipel long siti ol i nogat wok na wanpela we tasol long kamapim sindaun em long salim ol kain liklik samting olsem long lukautim famili," ol i tok.



BOROKO Foodworld

BUTCHER SHOP SPESOLS


Hamburger Mince	K5.30 Kg
Pork/Beef Sausages	K3.95 Kg
Brisket	K4.95 Kg
Ilimo Chicken size 12	K6.83 Ea
Ilimo Kwik kai 900gr	K4.93 Ea
Ilimo Breast 500gr	K3.28 Ea

GROCERY SPESOLS

Sunshine Milk 1litre	K2.48
Power Rice 1Kg	K1.79
Bongos Cheese 25gr	30t
Ox & Palm 340gr	K2.99
Aust Bush Biscuits	52t
Suncrush Cordial 750ml	K1.80

Planti moa kaikai... i go daun long en!

Ph: 325 7... Fax: 325 7096



• Ol pikinini bilong Kira Kira viles insait long NCD i soim stret danis tumbuna. Ol i bin danis long taim musiem i holim wanpela eksebisen las wik.

• Lista Serum long raithan i singim wanpela singsing bilong em long amamasim de bilong Mental Helt long Mosbi.



• Antap: Morata Lions Yut i amamasim Edukesen Wik wantaim dispela Flot. Poto: Helen Rei na Ivan Bayagau.

• Namel Raihan: Kavari Vocational skul i soim sampela wok bilong ol we ol i bin lainim long skul

• Raithan: Meri bilong Praim minista bilong Australia, Janette Howard (bilakpela klos) i lukluk raun long literasi skul bilong ol mama.

• Aninit: Dispela sikpela meri bai resis long Miss PNG 1999 long dispela wiken. Ol i redi long singsing tumbuna, bilas long swim na tu bilas long pasin masta.



Ripot bilong Wol Mental Helt De wantaim WENCESLAUS MAGUN

Sik bilong het i kamap bikpela long PNG

SEKETERI bilong Helt long Papua Niugini, Dokta Puka Temu i tok sik bilong het i kamap wanpela bikpela hevi long kantri tude na moa yet bikpela namba bilong ol lapun i wok long bungim dispela hevi.

Em i tok insait long wanpela ripot bilong haus sik, rekot i soim olsem samting olsem 50 pesen bilong ol lapun i gat bikpela hevi long tingting bilong ol na ol i save go long Mosbi Jenerel Haus Sik bilong kisim marasin insait long las tripela yia.

Em i tok tu olsem insait long narapela 10 yia, Nesenel Helt Plen na Nesenel Populesen Polisi bai kamapim rot bilong tokaut na mekim planti lain i save long dispela hevi, stopim dispela hevi long kamap na lukautim ol hevi bilong helt bilong ol pipel i gat hevi long het.

"Long liklik rot, mipela long PNG i stat nau long givim sampela tingting na glasim dispela eria bilong helt we long wanpela taim nogat manmeri i gat wari na tingting long en," Dokta Temu i tok.

Em i tok tu olsem taim man o meri i go lapun, ol i ken stap helti na i no inap bungim planti hevi long tingting na tu long bodi bilong ol.

Dokta Temu i tok taim ol pipel i go lapun em ol i no sik. Nogat. Pasi bilong kamap lapun em i no wanpela sik.

Long wankain taim, Dokta Temu i tok olsem long PNG ol man i save stap longpela taim moa long ol meri.



• Dokta Puka Temu.

Dispela em i no wankain olsem long ol arapela hap bilong wol. Em i tok long PNG, ol meri i save dai kwik bikos ol i save wok hat tru. Ol meri i no save go kisim wankain skul na save olsem ol man. Ol man i save paitim na bagarapim ol meri. Ol meri i save karim planti pikinini na i nogat gutpela marasin o haus sik klostu bilong helpim ol. Dispela i save kamapim planti planti hevi long het bilong ol na i save kilim ol.

Ol lapun laikim helpim

HELT bilong het bilong ol manmeri na helt bilong ol lapun em tupela eria bilong wok bilong helt we planti taim ol pipel i save givim baksait long ol o i no save luksave na traim long helpim.

Dispela em wanpela bikpela hevi long wol tude, wanpela maus meri bilong Wol Helt Ogenaisesen (WHO) long Papua Niugini, Dokta Ruth Stark i tok.

Dokta Stark i tokim moa long 300 pipel husat i bung long konferens rum bilong Helt Dipatmen long Mosbi long las wik Fraide bilong tingim Wol Mental Helt De (WMHD). Long dispela yia astingting bilong WMHD em bilong tingim 'Mental Helt na ol Lapun'.

Dokta Stark i tok ripot bilong WHO i soim olsem hevi bilong mental helt em wanpela bilong ol bikpela hevi we i save kamapim bikpela bagarap.

"11- pe sen bilong ol sik long wol las yia i kamapim hevi bilong sik long het (neuropsychiatric). Na wanpela bikpela sik long ol bik manmeri long wol tude em dipresen o hevi bilong salim tingting na wari," em i tok.

Dokta Stark i tok i gat marasin na rot bilong helpim ol lain i gat sik long het.

Em i tok tu olsem ol pipel i noken ting olsem kamap lapun em i wanpela sik. Em i tok planti taim ol pipel i save ting olsem taim man o meri i kamap lapun ol i ken kisim kain kain sik.

"Nogat. Long kamap lapun em i no min olsem yu mas kisim sik, o sampela hap bilong bodi bilong yu bai bagarap o tingting bilong yu bai bagarap," em i tok.

Dokta Stark i tok i gat rot bilong helpim ol lapun long stap helti long bodi na long tingting.

Em i tok ol helt woka i ken helpim ol manmeri wantaim ol arapela hevi bilong ol na i no sik tasol.

"Hevi long salim tingting na wari i ken mekim ol pipel i sik na dispela sik i ken bagarapim het bilong ol," em i tok.

Long ol helt woka husat i save tok ol i gat planti wok na i nogat taim, Dokta Stark i salensim ol long yusim gut taim bilong ol long traim long glasim laip bilong ol sik manmeri olsem bai ol i ken save long sindaun bilong ol na laip bilong famili bilong ol.

Em i tok, sapos ol helt woka i ken mekim dispela, ol bai save gut tru long as bilong sik na hevi

na painim gutpela rot o stretpela marasin bilong helpim ol.

Long wankain rot, em i tok ol helt woka i mas glasim gut wanem kain sik ol sik manmeri i gat na wanem kain marasin ol i wok long kisim long wanem dispela tu i ken kamapim sik long het.

Dokta Stark i salensim ol helt woka long long promotim gutpela helt bilong ol lapun long luksave long gut long hevi bilong ol, long putim ia long komplem bilong ol na givim inap taim long ol wankain olsem sapos ol i stap yangpela yet.

"Namba tri samting yumi ken mekim em bilong givim ol lapun manmeri na famili bilong ol tok-save long ol samting we ol i ken mekim long ol yet olsem bai ol i ken stap longpela taim long graun na i gat gutpela helt," Dokta Stark i tok.

Em i tok ol famili bilong ol lapun i mas helpim ol lapun long tek pat long ol ekasesais, go lukim ol pren, pati, pilai na ol samting we bai mekim ol stap hepi. Dispela bai helpim ol long stap hepi na longpela taim long graun.

AusAID givim K12 milien long MONAHP

DIPATMEN bilong Helt i tenkim AusAID long givim mani bilong ronim 'Medical Officer Nursing and Allied Health Program (MONAHP)' long Papua Niugini.

AusAID i givim K12 milion bilong ronim dispela program long foapela yia, wanpela maus

meri bilong MONAHP opis long Mosbi i tok.

Anit long dispela program, PNG i karim aut foapela Komyuniti Mental Helt Woka woksop long 1998. Tupela bilong dispela woksop em ol i bin holim long Lae bilong Momase rijen na

long Hagen bilong Hailens rijen na tupela ol i holim long Rabaul bilong Niugini Ailans rijen.

Long wankain taim, Profesa Kevin J Kellehear bilong Yunivesiti bilong Teknoloji, Sydney, husat i bin kam long kantri bilong ronim wanpela wan wik woksop bilong ol helt woka anit long dispela program i tok, dispela program i laik sapatim mental helt sevis long developim ol sevis bai i stap oltaim long dispela kantri.

Em i tok tu olsem as tingting bilong dispela woksop em bilong toksave na skulim ol nes na ol arapela helt woka long lukim bikpela wok bilong mental helt sevis na painim ol lain i gat hevi na helpim ol insait long komyuniti.

Ol lain i bin kisim skul long dispela woksop em 25 nes, tripela helt ekstensen opisa na tupela komyuniti helt woka long olgeta hap bilong kantri na Solomon Ailan.

Profesa Kellehear i tok ol helt woka i kisim skul tu bilong lo na etiks o stretpela pasin bilong wok 'psychiatry' na 'psychosocial rehabilitation' o save bilong helpim lain i gat sik longlong.

Em i strongim tok olsem ol provinsel edministresen i mas luksave long hevi bilong dispela sik na hevi bilong salim tingting na wari insait long komyuniti na painim ol risos bilong toksave na skulim ol helt woka.

Long ol helt wok husat i kisim dispela skul, em i salensim ol long go bek na skulim ol arapela long wanem skul na save ol i kisim.

Ol helt woka i pinisim wan wik kos bilong ol las wik Fraide na i kisim setifiket bilong ol.

Profesa Kellehear i helpim tu long developim mental helt karikulum bilong kolese bilong Allied Health Sains long kantri.

Mental helt em hevi bilong yumi olgeta, Kidu i tok

PAPUA Niugini i gat bikpela hevi bilong mental helt o helt bilong het na olgeta pipel bilong kantri i gat wok bilong glasim dispela hevi na painim rot bilong stretim.

Dispela em strongpela toktok memba bilong Mosbi Saut, Ledi Carol Kidu i tokaut long en, insait long selebresen bilong makim Wol Mental Helt De long Fraide Oktoba 8 long Mosbi.

De tru bilong Wol Mental Helt De em long Sande Oktoba 10. Long dispela yia as tingting bilong dispela selebresen em, 'Mental Helt na ol Lapun'. Mental Helt Sevis na Papua Niugini Mental Helt Asosiesen i go pas long oge-naisim dispela bung.

Ol bikman meri husat i kamap long dispela bung em long wanpela maus meri bilong Wol Helt Ogenaisesen, Dokta Ruth Stark, Seketeri bilong Helt Dokta Puka Temu, Seketeri bilong Home Afeas, Joseph Sukwianomb, Asbisop Brian Barnes, Presiden bilong Mental Helt Faundesen, Chris Marlo na ol maus manmeri bilong gavman na kampani.

Ledi Kidu i tok hevi bilong mental helt i save kamap long ol yangpela, ol bikman meri na ol lapun wantaim. Na dispela hevi i save kamapim bikpela hevi long laip bilong yumi olgeta.

Em i tok, "Wankain olsem yumi save karim pen bilong ol arapela sik, olsem tasol yumi olgeta i save gat kain kain hevi long het bilong yumi insait long laip bilong yumi."

Em i tok planti ol yangpela na ol manmeri i wok long bungim kain kain samting i wok long senis long dispela wol na ol dispela senis i luk olsem i no givim bikpela hop long laip bilong ol.

Ledi Kidu i tok planti pipel long wol tude i wok long kilim ol yet i dai. Planti bilong ol dispela lain i stap long ol taun na siti. Em i tok dispela em wanpela piksa o krai bilong helpim.

Em i tok dispela em i no moa hevi bilong ol yangpela tasol hevi bilong ol lapun tu long kantri tude.

Em i tok tude planti ol yangpela i nogat rispek long ol lapun. Dispela em i no pasin bilong PNG. Olsem na em i singautim ol pipel bilong PNG long holim pas strong pasin tumbuna bilong soim bikpela rispek long ol lapun na lukautim ol lapun.

Ledi Kidu i tok strong long pasin bilong PNG bilong sapatim arapela arapela insait long famili, komyuniti na kantri i mas kamap strong na ol pipel bilong PNG i noken sapatim pasin bilong ol waitman bilong kamapim wan wan famili.



• Memba bilong Mosbi Saut, Ledi Carol Kidu.

spot **WANTOK** wiken

LAHI RIPOT

Elcom bai traim lak

FRANCO NEBAS i raitim

ELCOM bai traim lak long Sarere taim ol i bungim eksprensait Waliya long gren fainel bilong wimen divisen wan long Lahi Soka Asosiesen kik resis.

Dispela bikpela pilai bai kamap long Sarere long Sir Ignatius Kilage Stadium.

Na long gren fainel bilong man, Guria bai wip wantaim difending sempions Sobou. Long resis bilong ol meri, dispela gem bai kamap gutpela na strongpela long lukim ya. Em nambawan taim taim bilong Elcom long go insait long fainel, tasol birua bilong em, Waliya em i lapun ya.. na ol i gat kik na stail.

Elcom i nogat planti eksprensait pilaia olsem Waliya tasol wanem kain stail ol i lanim long nesenek klab sempionsip bai putim long traim winim taitel. Ol pawa meri bai go olsem anda dok long Sarere.

Stella Iwais em gol kipa wantaim Roselyn Kris, Rose Runa, Nancy Wesley na Janet Usatwen bai pilai difendas.

Long midfil eria, Annie Tukuna, Kisu Kisip, Freda Samson, Ponnice Ume, Shephon Peter, Addis Berry na Marie Kapun.

Dispela ol lain i ken tanim difens i go long atek sapos ol birua i asua liklik.

Mischel Andra, Hila Shongo na Glenda Banare yet bai putim was long umben bilong Waliya.

Tasol dispela sapos Waliya i no strongim gut difens bilong ol.

Ol i gat pilaia olsem, Kay Ella, Wips Nugur, na gol kipa Maggie Ume bai go pas long beklain bilong ol.

Mama Moncia Ray, Alice Rumbom, Martha Raka na Naomi Bore bai skelim midfil eria long setim straiika bilong ol.

Long pinisim wok long fran lain em, Pricilla Ososo na Jeny Lemandi bai lukim net bilong ol meri Elcom bai mekim nois.

• Pilai soka namel long tupela namba wan divises tim long Pot Mosbi las wiken.

Sobou bai traim difendim taitel

SEMPION tim Sobou bai traim winim bek taitel taim em i bungim Guria long gren fainel bilong Lahi Soka Asosiesen long Sarere. Dispela em kik resis bilong ol primia man.

Dispela gren fainel bai kamap long Sir Ignatius Kilage stadium we ol opisel i bilip olsem sedium bai pulap stret wantaim ol sapota bilong tupela tim.

Dispela-tupela tim i no nupela long pilai long fainel. Ol i bin pilai planti taim na ol i save long kain stail bilong ol yet ya.

Tupela i luk wankain long strong long olgeta dipatmen tasol fitnes na asua bai skelim husat bai kamap wina. Eksprensait long presa futbol

em i no nupela samting long tupela sait wantaim we ol yet i ken skelim.

Sobou i gat pilaia olsem, Harrison, Alu Kamake, Peter Kekas na gol kipa David Aua long strongim beklain bilong ol.

Long midfil, em Richard Daniel na Mawesh kKens bai go pas na pinisim wok em Harold Kawambara na Ronald Dei.

Guria husat tu i gat ol nambawan pilai long tim olsem Yakam Kipu na John Kalin bai traim bagarapim-sindaun bilong kipa bilong Sobou.

Tupela straiika i gat spid na save kikim strong bal na sapos kipa Aua i no was gut em umben bai seksek klostu klostu.

Zesky Winko, Alwin Nemba, David Banap na Lui Harry bai was.

Alwin Nema wantaim Resky Winko yet bai i go pas long kontrolim midfil na setim tupela straiika.

Beklain bilong Guria tu i moa strong wantaim Peter Paliwa, Hans Fred, Laison Royu na Philemon Tamari bai lukautim.

Stail Kipa Abaraham Moide bai was long ol birua long noken brukim umben bilong en.

Dispela gem bai strongpela wantaim ol gutpela stail futbol kamap long tupela sait wantaim.

MOMASE KAP RIPOT

Planti tim bilong Morobe long Momase kap

RESIS bilong Momase Kap long dispela yia i lukim Morobe provins i kamap planti tim long arapela provins bilong Momase rijon.

Long rekot i soim 4-pela tim

bilong man na 4-pela tim bilong meri i soim pinis laik long resis long dispela tonamen.

Momase Soka Kap resis bai kamap long Laiwaden Ovel long

Madang long Novemba 4 bikos Laiwaden fil bai ol SDA i yusim inap long pinis bilong mun Oktoba.

Tonamen Dairekta John Konia Peka i tok olsem Morobe provins i

gat bikpela namba bilong ol tim long dispela soka sempionsip.

Peka i tok ol i surukim tu ong givim taim long 4-pela gavana long kamap lukim pilai.

Peka i tok, "ol tims long Morobe provins husat i baim pinis ol fi bilong ol na bai stap long resis en; Lae, Aseki, Buang, Kaiyapit, Menyamyam, Bulolo, Wau na Lahi (man).

Ol meri, Wau, Bulolo, Lae na Lahi.

Long arapela tripela provins, Madang (1), Madang (2) distrik, Yomba, Bogia, Sumgilba na Raikos.

Is Sepik: Wewak (1), Wewak (2) distrik, na Angoram, na Maprik na Sandaun, Vanimo, na Aitape.

Peka i tok olsem fi em K400, long wanwan tim we taim bilong baim fi em pinis ol stap long Fraide Oktoba 8, 1998.

Em i tok dispela em las gem bilong dispela yia we ol oganaising komiti i laik mekim olsem i moa nambawan na bai pinis wantaim stail.

Long progrem bilong ol i soim bai i gat singsing grup na ol nabawan musik man na ben long Tumbuna Trek Stedeo long Madang tu bai pilai.

Invitasen tu i go long 4-pela gavana bilong Momase long kamap witesim dispela pilai na tu namba tu Praim Minsita John Pundari bai opiseli opim gem.

Olgeta gem bai pilai long pul sistem we pes tu wantaim moa poin bai go het long fainels.

Coca Cola em opisel sponso bilong dispela resis.




Ol spot eksen bilong Pot Mosbi we i bin kamap las wikem


Poto Ivan Bayagau



• Antap: Niwaf Raiders i redi long bungim Waliya long Kiunga ragbi lig gren fainel. Raiders i win.
• Lephon: Soka resis namel long ol tim Namba wan divisen insait long Pot Mosbi soka resis.



• Antap: Wapela pilaia long Pot Mosbi skulbois kompetisen i autim bal long poroman bilong bipo long birua i kam takolim em.
• Lephon: Pilaia bilong Bulldogs i autim bal.



• Pilaia bilong Mazda ya i kaikai tit stret taim em i laik paitim bal long Pot Mosbi mens sofbal kompetisen las wik Sande.



• Tupela susa ya long Praivet Kampani netbal kompetisen ya i soim kain stail we nau bai kukim Rita Flynn kot bihain long sisen tru bilong Pot Mosbi i pinis. Sapos wanem ol lain husat i laik sapatim ol meri, plis mas soim pes na ol meri bai pilai strong moa yet ya.

Pait bilong Boroko Bowling klab i stat

BOROKO Bowling klab long Pot Mosbi nau i wok long kisim taim bihain Katolik Sios i kisim bek dispela graun.

Na ol bikman long Boroko i laik gavman i mas kam insait na helpim ol long toktok na kisim bek dispela graun.

Katolik Sios i kisim dispela graun long wokim nupela teknikel skul

bilong Caritas na Don Bosco Yunivesiti of Teknoloji. Dispela yunivesiti em han bilong Don Bosco Teknikel skul long Gabutu.

Nau yet ol bowler i save yusim oval long Defence Bowling klab long pilai na tren, tasol ol i ting olsem dispela klab em bilong ol wokman na opisa bilong PNG Difens Fos.

Las wik tupela bowla meri, Lady Karina Okuk na Maggie Wori i laik gavman i mas taim helpim ol na noken pasim ol dispela kain sosel klab.

Tupela i tok graun bilong Boroko Bowling klab em pablik eria na ol i mas larim ol pipel insait long siti i ken yusim eria long pilai spot.

"Pot Mosbi em i bikpela siti na i

no gutpela sapos em i nogat ol dispela kain ples bilong pilai," ol i tok.

Boroko klab em wanpela bilong tupela bowling klap insait long Pot Mosbi siti. Arapela em Defence bowling klab long Mari Bareks.

Ol i tok gavman i larim Katolik Sios long kisim graun orait ol i mas painim wanpela graun na givim i

go long ol bowla.

Spots bilong bowl i bin winim gol medal long Komenwelth Gem long Auckland, Nu Silan. Geua Tau i winim dispela medal ya.

Tupela i tok Boroko i bin kamapim planti ol biknem pilaia, na askim ol long traim na winim dispela graun bek.

SKULBOIS RIPOT

Tupela tim kamap sempion

STAR MAUTEN Skulbois Soka Asosisen bilong Tabubil long Westen provins i kamapim wanpela nupela rekot long makim tupela tim olsem sempion bilong 1999 sisen.

Wangbin na Tabubil i kamap sempion bihain long ol eksekutiv i pasim tok bihain long nogat wanpela gol i bin kamap long ekstra taim na tu penalti.

Sekretari bilong SMSSA Patrick Levo i pasim toktok wantaim referi na biknem PNG pilaia Gabriel Pise na makim tupela tim, Wangbin na Tabubil olsem nupela sempion tim ya.


Long Anda 9 sempionsip, tupela tim bilong Wangbin yet i brukim bun na Wangbin Tu i winim Wangbin Wan 1-0 nawinim Camp Administresen Kap.

Long Anda 10, Tabubil i winim namba tu fleg bilong em. Dispela gem i bin kamap gut tru we ol skulbois pilaia olsem Dwayne Peter Bernard na Moti Kilo Mathia i pilai long winim dispela taitel.

Long Hasting Deering Anda 12 sempionsip, Wangbin i winim Finalbin 1-0 long autim taitel.

Tupela tim i dro na kikim penalti we Wangbin i win.

Ol em bilong Anda 13 na Anda 14 bai kamap long dispela wiken.



• Lukaut, nogut trasis bilong yu bai aut ya. Em kain stail bilong Pot Mosbi sofbal.

Karanas i kisim taim

SEMPION tim Karanas i guria stret taim Brown Eagles i waraim ol stret 4-0 long bikpela gem bilong

Goroka mens sofbal kompetisen las wiken.

Biknem pilaia bilong PNG nau i

GOROKA MENS SOFBAL RIPOT

stap long Goroka Ismael Marnapal i go pas long dispela win.

Em yet i holim wok pitsa long autim stret ol wantok tim, Brown Eagles, long Nesenel Spots Institut oval.

Marnapal i tu gut long ol beta bilong Brown Eagles. I tru olsem yangpela pitsa bilong Brown Eagles. Malcom Ravin tu i kamapim gutpela gem, we i ken kamap olsem wanpela top pitsa insait long kantri long bihain taim.

Karanas i brukim kiau taim Joe Lumaris na ketsa Maino Kara Buko i kam hom. Ol boi Kavieng i rekotim tupela arapela poin i kam long Marnapal na Samson Sangin long win.

Insait long arapela gem, Malangan i wilwilim stret ol yangpela Barbarians 9-0.

John Supa yet i go pas long i kam hom long olgeta ining bilong Malanga long helpim tim i win ya.

Tasol ol Malangan i no strong tumas long arapela gem we Gazelle i kam long bihain na winim ol 8-5. Dispela 5-pela hom long namba tu hap i bagarapim tru sans bilong Malangan long win.

Tupela tim wantaim i dro 4-4 long namba tri inining, tasol ol Gazelle i paitim gut bal long las ining long kamap wina ya.

Malangan i no westim taim long skoa taim tripela pilaia olsem Bobby Buburu, Kiso Sabumei na John Supa i kam hom.

Festumen na Sabumei i aut, Buburu i winim namba wan bes bihain long John Supa i paitim wanpela gutpela bal long graun, na em i kisim Buburu na em yet long kam long hom bes.

Gazelle i no skoa long namba wan ining.

Orait long namba tu inining, ol i rekotim tripela hom i kam long Frank Pakpak, George Anian na Darius Vainak.

Ol i skorim tupela poin i kam long Sebby Pegiran.

Skoa i sanap 4-4 na Sabumei na Supa i kam hom taim Peter Brekrexmas i paitim wanpela gutpela bal.

Poin bilong Malangan i kamap long Festuman na bihain long dispela Gazelle i putim 5-pela ran long win.

• Tupela bikman bilong UPNG lig i sekhan wantaim ol pilaia bipo long gren-fainel. Medics win.



POM MENS SOFBAL RIPOT

Manalos i rekotim namba tu dro

AUTFILA bilong Manalos Passingan Pialkolos i salim skin long daiv na ketsim bai na helpim tim bilong em i dro wantaim Gazelle 3-3 long Pot Mosbi mens sofbal kompetisen las Sande.

Tu daun, na las beta bilong Gazelle i laik paitim bal. Robert Mago i sanap long namba tu pes we tupela tim i dro.

Bernard Pamel i sanap long bet na paiti wanpela gutpela bal stret ya we Pialkolos i no inap long ketsim. Tasol em i salim skin stret na ketsim dispela bal bilong Pamel na tupela tim i dro.

Sapos Manalos i lus, em bai namba wan lus bilong ol long dispela sisen ya. Em i namba tu taim ol i dro. Namba wan taim em ol i dro wantaim AB Bears 3-3 las wiken long sem ples.

Manalos i skoa taim Dick Bart Jnr na Paul Bogan i kam hom bihain long Jerry Albert i paitim wanpela gutpela bal stret ya.

Gazelle i bekim taim Tondy Daple i bringi em yet wantaim arapela pilaia i kam hom.

Orait Gazelle i go pas long skau nau long namba foa ining we Pamel na Harry Mathews.

Skoa nau i sanap olsem Gazelle 3 na Manalos 2.

Tasol Kipma wanpela top pilaia bilong Manalos i paitim wanpela hom ran na levelim skoa 3-3. Kimpa i no paitim gut bal tasol em i poroman gut wantaim ketsa Danny Mong long stapim ol pilaia bilong Gazelle long winim bes.

Plantu taim ol pilaia bilong ol i save sanap long bes bikos tupela tim wantaim i strong tru ya.

Insait long arapela gem, NGi i winim Tiges 6-1, Brown Eagles winim Burma Raiders 2-1. Ol arapela gem nem long Bears na Dolphins, na MSC/Hawks i no bin kamap bikos i gat paul long dro.

Presiden bilong Pot Mosbi sofbal asosiesen Nick Tata i tokaut olsem dispela tupela tim bai pilai long wiken.

POM WIMEN SOFBAL RIPOT

Norths i wok long win yet

NORTHS i soim olgeta pawa bilong em long wilwilim ol tim insait long Pot Mosbi wimens sofbal kompetisen.

Las wik long Bisini Graun, daimon tu, Norths nekim biknem tim bilong bipo, Gazelle wantaim bikpela skoa 16-3. Na long arapela, Malangan autim Chebu 9-8, Mazda i givim bikpela kiau long All Stars 12-0, AB Bears i waraim stret Wantok 15-1.

Skoa bilong namba wan raun i soim olsem Mazda, Norths na Bears i winim ol birua tim wantaim bikpela skoa stret.

Norths em i sempion bilong pri-sisen ya taim em i winim Nancy Kamara Kap. I luk olsem ol i gat gutpela sans long pilai long gren fainel long dispela yia.

Gazelle i gat sampela ol pilaia i muv i go na joinim ol arapela klab na ol i painim hat tru long stapim strongpela salens bilong Norths.

Norths i gat yangpela intanesenel pitsa Fenella Sam husat i wok long stap fit na givim hat taim tru long Gazelle. Sam i rekotim 7-pela straik-aut egenim ol biknem beta bilong Gazelle.

Sam i bung gut tru wantaim ketsa bilong em Robertha Kaul na autim ol pilaia. Dispela kombinesen bilong ol i redi tasol long givim hat taim long ol arapela tim.

Norths i statim gut gem na i no lukluk go bek. Julie Rela i paitim wanpela gutpela bal na bihain long em Fred Sam i go na yangpela Kaul i bihainim ol.

Orait Alice Waluta na Helen Singiat i paitim gutpela bal na olgeta wantaim i kam hom na skoa i sanap 5-0

Nupela pilaia bilong Norths Emma Kabui i rekotim poin bilong tim taim Freda Sam i paitim wanpela gutpela bal long em i kam hom.

Insait long namba tri ining, Norths i kisim foapela moa run i kam long Kabui, Ria, Singiat na Kilala Ronnie.

Kabui husat i stap olsem designated rana i pilai gut tru na em yet i skorim tripela hom bilong Norths.

Gazelle i no skoa inap long namba tri ining we Esther Robin, Josephine Raphael na Racher Rarang i kam hom long rekotim dispela skoa bilong ol. Sikspela arapela ran bilong Norths i kamap long namba faiv ining.

Gem namel long All Stars na Mazda em wansait stret. Maski ol All Stars i kisim top pitsa long kantri olsem Nancy Pala, ol pilaia bilong Mazda i paitim bal bilong em yet

Ol yangpela olem Shirley ToMangana, Tara ToMangana na Alice Kalas i wok bung wantaim ol sinia bilong tim olsem Rei Melepie, Dorcas Horris, Emma Kalas, Selina Karai na Wendy Kalas long rekim ol All Stars.

Skul soka bai opim

Tabubil soka fainel

SKULBOIS soka gren fainel bilong Anda 13 na Anda 14 bilong Star Maunten bai opim bikpela gren fainel bilong Tabubil Soka Asosiesen long Sarere.

Presiden bilong TSA Gabriel Pise i tokim Wantok olsem dispela gem i no kamap las wik bikos ol i laik tupela gren fainel ya i mas pulim ol sapota long

lukim bikpela gem long wiken.

Pise husat em wanpela man i go pas long junia soka program i tok em i askim sekretari bilong Skul soka Patrick Levo long wokim program long pilai long dispela wik bikos Anda 13 na Anda 14 bai yusim ful fil.

Pise i tok junia program i bin kamap gut tru taim em i stat las yia na dispela bai givim

sans long ol i pilai long sinia.

Anda 13 divisen em bai pilai long Hino Sil we Ela Motors i givim.

Dispela fainel bai stap namel long Tabubil Komyuniti skul grin na Finalbin Komyuniti skul yelo.

Kosa bilong Finalbin Kevin Miki i tok skul bilong em bai winim bek dispela Hino Sil

tasol kosa bilong Tabubil Lakai Pu i tok skul bilong em i redi long winim dispela sil tu ya.

Long resis bilong Anda 14, Tabubil Hai skul husat i winim taitel las yia bai bungim Tabubil Komyuniti skul long fainel. Dispela bai soim tru olsem ol komyuniti bai skul strong bilong ol bikman bilong hai skul.



• Referi Tony Kuni i toktok wantaim tupela kepten bilong Wap Brothers na Medics bipo long fainel.

Boromas i soim pawa

NESENEL RAGBI 15's RIPOT

POT MOSBI Boromas i rausim trausis bilong namba tu tim, Pot Mosbi Gaigais 7-0 long namba wan raun bilong SP Lager Ragbi 15's las wiken long Bava Pak long Pot Mosbi.

Long semtaim tu long Lae, tupela tim long Morobe, Hammerheads nokim Goroka Nokondis 27-0 na Kantri wilwilim stret Pengali Crushers 20-3.

Bikpela namba 8 bilong Boromas Ian Leklek i brukim difens bilong Gaigais long go putim wanpela trai bilong dispela gem. Kepten Billy Rapila i kikim konvesen na skoa i sanap 7-0.

Dispela poin ya i luk olsem

laki stret bikos tupela tim wantaim i mekim planti asua stret we Gaigais tu i gat sans long win ya.

Tupela tim wantaim i save gem plen, na ol i wok long putim strongpela banis stret long noken larim birua tim i skoa.

Gaigais i wok long stapim olgeta kain mov o gem plen Boromas i laik mekim na dispela i bagarapim sans long putim trai. Ol pilaia bilong Gaigais olsem Carl Hoots, John Kabua, Albert Kulume, Willie Rikis, John Panie, Eremas Simba, Andy Vele na

John Larry i banisim gut tru ol pilaia bilong Boromas.

Ol biknem bilong Boromas i painim hat tru na mekim planti ol asua. Ol pilaia olsem Ian Liveras, Gabriel Tika, Nolan Warpin na Willie Petalie i kisim taim stret na painim hat long putim trai.

Ol beklain bilong Gaigais tu i kamapim pilai long banisim ol birua long Boromas. Ol pilaia olsem Peter Opa na Joe Kautu i banisim ol pilaia olsem Rapila na Tevita.

Ol fowat bilong Gaigais i kamapim gutpela gem em Carl Hoot, John Larry, Albert

Kulume, John Kabua, Willie Rikis na long sait bilong Boromas em kepten Kevin Rooney, Liveras, Leklek, Warpin na George Wartovo.

Na long Morobe Hammerheads, winga John Asimba, Steve Malum, Aiem Pilokos i pilai gut tru long helpim tim bilong ol i win.

Na long Kantri tim, Bill Waninara, Mataru Takuru na Stanley Sali i putim nem bilong ol long skoa buk. Ol lain pilai gut em lok Anthony Agi, Wilford Mota na Waninara husat i kamapim gutpela gem long helpim Morobe Kantri i winim Pengali Crushers bilong Mt Hagen.

Hevi long Is Timor

Dili, Is Timor:

Bisop Carlos Belo, hetman bilong Katolik Sios long Is Timor i askim ol atoriti long Amerika na Yurop bilong putim presa long Indonesia long larim ol Is Timor refuji long go bek long ples bilong ol.

Bisop Belo i wokim dispela singaut insait long namba wan Misa lotu em bin wokim long Dili long wiken bihain tasol em i go bek long hap. Taim hevi long Is Timor i go nogut na ol i kukim tu haus na olgeta samting bilong em, em bin ronawe i go long Australia tasol long las wiken, em i go bek long Dili.

Bisop Belo i tok em i wari long 260,000 refuji bilong Is Timor husat i bin ronawe i go long Wes Timor taim ol militia paitman i bin skruim pait i go nogut bihain long Is Timor indipenden vot long Ogas 30.

Bisop Belo i askim strong ol gavman bilong Yunaitet Stets na Yuropien Yunim long presarim gavman bilong Indonesia long larim ol dispela pipel husat i stap long ol kem long Wes Timor long go bek long ples bilong ol.

Ol ripot i tok ol Is Timor Refuji husat i stap long ol kem long Wes Timor i stap long bikipela hevi bikos ol atoriti bilong Indonesia i no larim ol aid woka i go long ol kem long visitim ol.

"Em i nogut tru long stap long narapela kantri. Ol i olsem ol ausait lain o ol forena insait long narapela ples. Na ol i no amamas long stap long hap bikos ol soldia bilong Indonesia i wok long mekim nabaut long ol," Bisop Belo i tok. Samting olsem 500 pipel i bin bung long ples we haus bilong Bisop ol paitman na ami bilong Indonesia i kukim i bin stap long en na stap insait long Misa Lotu las Sande.

Bisop Belo i bin tokim ol pipel bilong em long stap yunaitet na klinim ples bipo ol arapela wantok refuji i go bek.

Australia gat bikipela mak bilong ol ami long Is Timor pis kiping operesen

Australia i gat bikipela mak bilong ol soldia na ol wokman i stap insait long pis kiping opresen long Is Timor.

Long 6,500 intenesenel pis kipas i stap nau long graun long Is Timor, 4,500 i bilong Australia. Moa soldia bilong Australia i bin


Bikipela guria bagarapim Taiwan

Piksa long bikipela guria birua we i bin kamapim bikipela bagarap long Taiwan las mun.

Antap em 12 stori bilding long Pateh rod long Taipei, biksiti bilong Taiwan we guria i bagarapim na em i pondau hangamap long wanpela Buddha hauslotu (tempel).

Daunbilo em ol reskyu woklain i klinim ples na karim wanpela meri ol i painim namel long ol pipia. Na daunbilo stret em wanpela flet bilding we i bin pondau na bikipela guria i seksekim. Dispela bilding i stap long Puli insait long Nantou County. Moa long 1,700 pipel i bin dai long dispela guria we i bin kamap long Sentrel taiwan long Septemba 21.

- Ol piksa i kam long Free China niuspepa.



Is Timor lukim Nu Silan Maori stail welkam



• Ol soldia bilong Nu Silan i wokim haka danis bilong ol Maori taim ol i krungutim graun bilong Is Timor. Piksa i kam long Weekend Australian niuspepa

kamap long Dili long wiken. Samting olsem 250 soldia bilong Batalion 5 na 7 long Darwin i bin go kamap long Dili wantaim 40 ami trak. HMAS Tobruk i bin karim ol soldia na ol ami ka i go.

Ol ripot i tok mak bilong ol pis kipas bai go antap long 8,000 bipo long pinis bilong dispela mun.

Ripot i tok tu olsem taim pait i stap long Vietnam namel long 1960 na 1970, Australia i bin salim 8,000 soldia na i luk olsem pait long Is Timor i kamap namba tu bikipela operesen we Australia na ami na nevi bilong em i stap insait long en.

Nu Silan pis kipas kirapim beis long olupela beis bilong ami bilong Indonesia

Ol soldia bilong Nu Silan i bin tekova long ples balus na ples ausait long Suai, wanpela strongpela ami beis sautwes long Is Timor.

Ol Blekhok helikopta bilong ol i bin pondau long ples balus long

bikmonig long dispela wik wantaim ol samting bilong pait, ol masin na ol redio, kaikai, wara na ol arapela samting moa.

Ol bin kisim dispela ples na sekurim long em bai seif long ol helpim grup husat i laik givim helpim long ol Is Timor refuji long operet long en.

Ripot i tok ol bai salim moa Interfet pis kipas i go long hap long dispela wik.

London, Ingran:

Gavman karim wok painimaut long trein birua

Gavman bilong Ingran i karimaut wanpela wok painimaut long birua bilong trein we i bin kilim dai moa long 40 pipel las wik Tunde long Paddington, wes London.

Dispela em bikipela birua bilong trein insait long 50 krismas.

Birua i bin kamap taim wanpela eben trein we i lusim Paddington i bam wantaim wanpela ekspres trein we i wok long kamap tasol long stesen.

Gavman bilong Briten nau i odaim wanpela wok painimaut long praivet papa kampani we i ranim relwe netwok long Briten.

Gavman i tokaut long rausim wok olsem supevaise we kkampani Railtrack i wokim long supavaisim sefti bilong ol pasindia.

Ol ripot i tok birua i bin kamap long moning na long bisi taim tru we ol trein i wok long i go i kam. Long birua, trein ya i paia na

kukim ol man.

Ol atoriti i painim pinis 30 dai bodi na ol hauslain i luksave long 21 long ol. Tenpela moa pipel we ol bin kisim trein tiket em ol i bilip olsem ol i dai. Na ol i painim yet 64 moa pipel i stap lus yet.

Ol ripot i tok gavman bai sanapim wanpela indipenden sefti atoriti to apim stended bilong sefti long ol trein opereta na Railtrack kampani we i papa long ol reilwe netwok.

Ol reskyu woklain i karimaut wok aninit long bikipela tuhat bihainim paia insait long trein long painim bodi bilong ol pipel i dai long birua ya.

Wanpela long ol laspela Wol Wo 1 soldia i dai

Wanpela long ol laspela Australia soldia bilong Wol Wo 1 i bin dai long las wik. Em bin gat 101 krismas.

Nem bilong man ya em Mike Hollingsworth na em bin memba bilong Australian Laithos long 1st ALF. Em bin dai long haus bilong em long saut Sidni, Australia.

Bihainim dai bilong en, i gat tasol 45 soldia bilong Wol Wo 1 long Australia na tupela laithos memba.

Mama i bin karim Hernet Mike Hollingsworth long 1898 long Hunter Valley na papamama bilong em i bin dai long sik TB taim

em i gat siksipela krismas tasol. Long 1917 em bin ami long pait long Midel Is wantaim 2nd Lait Hos rejimen. Long Epril 1918 em bin trense i go long namba 2 Lait Hos na stap long hap inap long pinis bilong militeri sevis bilong em.

Em bin stap insait long pait long Battle ov Beersheba long 1917 taim 800 Lait Hos memba i pait

wantaim ol German na Tekish ami.

Taim pait i pinis, ol bin salim yunit bilong emi go long Gallipoli long helpim painim bodi bilong ol dai soldia na tu bungim ol samting we ol i putim long wo memoriel bilong Australia.

Em bin wanpela founding memba bilong RSL Klub long Nu Saut Wels na tu long Helensburg RSL sab brans.



• Mike Hollingsworth. Piksa i kam long Weekend Australian

Ron bilong pasindia Sip

OKTOBA 1999

For Passenger Bookings or Information
 Contact: Titus or Ita Ph: 472 2066 Fax: 472 5806
 P.O. Box 1459, Lae, Morobe Province.

Vessel	Voy No.	Sailing from Lae for:	Day	Date	Time
<i>*Gejamaso Officers Daily Passenger and Parcel Services between Lae and Buki</i>					
<i>*Gejamaso Departs Lae @ 0900am and Arrives Buki at 11.30am.</i>					
<i>*Gejamaso Departs Buki @ 12:30pm and Arrives back at Lae at 3.00pm</i>					
Nagada	440 D	Kandrian/Arawa/Lae	Fri	01-10-99	12NN
*Mamose Exp. 629 B		Fin/Lab/Fin/Lae	Fri	01-10-99	5PM
*Mamose Exp. 629 D		Oro Bay	Sat	02-10-99	8PM
*Mamose Exp. 640 N		Fin/Wasu/Madang/Wewak	Mon	04-10-99	9AM
*Rita	490 N	Kimbe/Rabaul/Kimbe/Lae	Mon	04-10-99	3PM
Nagada	440 E	Finsch/Wasu/Finsch/Lae (Mag)	Tue	05-10-99	4PM
Total	796 A	Finsch/Lab/Lab/Lae	Wed	06-10-99	4PM
Umboi	567 N	Loirengau (Mag)	Wed	06-10-99	4PM
Total	798 N	Finsch/Sio/Wasu/Gali/Biliau/Mag	Fri	08-10-99	12PM
*Rita	490 B	Fin/Lab/Fin/Lae	Fri	08-10-99	5PM
*Rita	490 D	Oro Bay/Lae	Sat	09-10-99	8PM
*Rita	491 N	Fin/Wasu/Madang/Wewak	Mon	11-10-99	9AM
*Mamose Exp. 631 N		Kimbe/Rabaul/Kimbe/Lae	Mon	11-10-99	3PM
Maneba	529 N	Mag/Wwk/Ait/Van/Ait/Wwk/Mag	Mon	11-10-99	4PM
Total	799 A	Finsch/Wasu/(Lae)	Tue	12-10-99	4PM
Umboi	588 N	Loirengau/West Coast (Lae)	Wed	13-10-99	4PM
*Mamose Exp. 631 B		Fin/Lab/Fin/Lae	Fri	15-10-99	5pm
*Mamose Exp. 631 D		Oro Bay	Sat	16-10-99	8PM
*Mamose Exp. 632 N		Fin/Wasu/Madang/Wewak	Mon	18-10-99	9AM
*Rita	492 N	Kimbe/Rabaul/Kimbe/Lae	Mon	18-10-99	3PM
Total	799 C	Aumo/Wasum (Lae)	Mon	18-10-99	4PM
Umboi	589 N	Finsch/Wasu/(Mag)	Tue	19-10-99	4PM
Nagada	441 A	Finsch/Lab/Lab/Lae	Wed	20-10-99	4PM
Total	799 D	Kandrian/Arawa (Lae)	Thu	21-10-99	12NN
Nagada	441 N	Finsch/Sio/Wasu/Gali/Biliau/Mag	Fri	22-10-99	12NN
*Rita	492 B	Fin/Lab/Fin/Lae	Fri	22-10-99	5PM
*Rita	492 D	Oro Bay/Lae	Sat	23-10-99	8PM
Total	799 E	Tufi/Wanigela/C. Vogel/Dogura/Alotau			
		Dogura/C. Vogel/Wanigela/Tufi/Lae	Mon	25-10-99	9AM
*Rita	493 N	Fin/Wasu/Madang/Wewak	Mon	25-10-99	9AM
*Mamose Exp. 633 N		Kimbe/Rabaul/Kimbe/Lae	Mon	25-10-99	3AM
Maneba	631 N	Finsch/Wasu/(Mag)	Tue	26-10-99	4PM
Umboi	590 N	Loirengau (Lae)	Wed	27-10-99	4PM
*Mamose Exp. 633 B		Fin/Lab/Fin/Lae	Fri	29-10-99	5PM
*Mamose Exp. 633 D		Oro Bay	Sat	30-10-99	8PM

Ron bilong Kago Sip

OKTOBA 1999

For Cargo Bookings Information
 Contact Philip or Yadi Ph: 472 2066 Fax: 472 5806.
 P.O. Box 1459, Lae, Morobe Province.


Vessel	Voy No.	Sailing from Lae for:	Day	Date	Time
Main Sports					
Wewak	360 N	Madang/Wewak/Vanimo	Fri	01-10-99	10PM
Kuder	230 A	Madang	Tue	05-10-99	6PM
Umboi	587 N	Loirengau (Mag)	Wed	06-10-99	4PM
Kuder	230 N	Madang/Wewak/Vanimo	Fri	08-10-99	10PM
Wewak	361 A	Madang	Tue	12-10-99	6PM
Umboi	588 N	Loirengau/West Coast (Lae)	Wed	13-10-99	4PM
Wewak	361 N	Madang/Wewak/Vanimo	Fri	15-10-99	10PM
Kuder	231 A	Madang	Tue	19-10-99	6PM
Maneba	530 N	Loirengau (Lae) Dangerous	Wed	20-10-99	4PM
Kuder	231 N	Madang/Wewak/Vanimo	Fri	22-10-99	10PM
Wewak	362 A	Madang	Tue	26-10-99	6PM
Umboi	590 N	Loirengau (Lae)	Wed	27-10-99	4PM
Wewak	362 N	Madang/Wewak/Vanimo	Fri	29-10-99	10PM
Small Ports					
Nagada	440 D	Kandrian/Arawa/Lae	Fri	01-10-99	12NN
Nagada	440 E	Finsch/Wasu/Finsch/Lae (Mag)	Tue	05-10-99	4PM
Total	798 A	(Finsch)/Lab/Lab/(Lae)	Wed	06-10-99	4PM
Total	798 N	(Finsch)/Sio/(Wasu)/Gali/Biliau (Mag)	Fri	08-10-99	12PM
Maneba	529 N	Aitape	Mon	11-10-99	4PM
Total	799 A	Finsch/Wasu/(Lae)	Tue	12-10-99	4PM
Total	799 B	Finsch/Wasu/Lab/Lab/Kandrian			
		Arawa/Lae Dangerous Cargo Run	Thu	14-10-99	4PM
Total	799 C	Aumo/Wasum (Lae)	Mon	18-10-99	4PM
Umboi	589 N	Finsch/Wasu/ (Mag)	Tue	19-10-99	4PM
Nagada	441 A	(Finsch)/Lab/Lab/(Lae)	Wed	20-10-99	4PM
Total	799 D	Kandrian/Arawe (Lae)	Thu	21-10-99	12NN
Nagada	441 N	(Finsch)/Sio/(Wasu)/Gali/Biliau (Mag)	Fri	22-10-99	12NN
Total	799 E	Tufi/Wanigela/C. Vogel/Dogura/Alotau			
		Dogura/C. Vogel/Wanigela/Tufi/Lae	Mon	25-10-99	9AM
Maneba	531 N	Finsch/Wasu/(Mag)	Tue	26-10-99	4AM

Kain kain stail olsem tromoi lek antap long solwara!

Long PNG, haus slip i stap antap long solwara. tasol long Pohnpei, hetkota bilong Federetet Stets bilong Maikronesia, ples bilong danis na dring i stap antap long wara, olsem piksa ya i soim. Danis plua antap long solwara em i hap bilong Rumours Ba long Pohnpei.

Dispela klab i stap insait long mangru fores long Kolonia, Pohnpei. Danis plua antap long solwara em ol bin wokim nupela tasol.

Ol manmeri i ken tromoi lek i go inap moning long dispela mangru bus. *Piksa i kam long Pacific megesin.*



Ol niusman long Pasifik kisim strongpela toktok long ripot gut

Suva, Fiji: Praim Minista bilong Fiji Mahendra Chaudhry i bin wokim strongpela toktok i go long media na ol nius manmeri long Pasifik rijen long luksave long kain sindaun na laip insait long rijen taim ol i raitim ol nius na ripot long ol samting we i kamap long rijen.

Praim Minista Chaudhry i bin wokim dispela toktok taim em i opim PINA (Pasifik Ailan Nius Asosiesen) bung long Suva Fiji, long dispela wik.

Het tok bilong PINA bung em Information Communication Technology beyong 2000.

Mista Chaudhry i bin tok we bilong ripotim ol samting insait long Pasifik em i narakain long dispela bilong ol masta. Em bin tok taim ol nius manmeri i ripot long ol samting long rijen, ol i mas bihainim ol tambu na luksave long ol pasin kastam bilong rijen yet n i no pasin bilong ol waitman.

Toktok bilong praim minista i bin sut long pasin bilong ol nius-

man. Em bin tok em i bilip long freedom bilong media tasol long planti taim tu, media i save putim sampela mauswara antap long ol trupela ripot na ol samting i no save stret tumwas.

Em i tok yumi i gat politikel sistem na ol niuslain i save kisim strong bilong ol long tagetim ol pablik figa, tanim ol olsem ol skeppot, pulim ol belkros, semim ol na ol kain tingting nogut long ol i kamap long pablik na ol vota.

Em bin tok lo bilong yumi long Pasifik, maski ol i no raitim, i mas gat luksave na dispela i bihainim kastam bilong yumi yet na i no dispela bilong ol waitman. Wanpela tok piksa em long taitel bilong ol we ol niuslain i mas givim luksave na putim rait taitel. Wanpela em long kolim Presiden bilong Fiji olsem "Mara" tasol long hetlain bilong wanpela nius stori.

"Raitpela taitel em long "Ratu Sir Kamisese Mara" na bihain sapos yu skruim gen stori, putim nem bilong em olsem "Sir Ratu

Kamisese". Na long hetlain i moabeta long putim olsem "Ratu Mara" bikos em i God Fada long Saut Pasifik rijenilism. I moabeta long givim em na ol arapela lida long rijen luksave ol i mas gat long en," Mista Chaudhry i tok.

Em bin tok wantaim kamap bilong wolwaid media kalsa, dispela samting i kamap long olgeta hap long wol. Wanem ol samting i gat long bagarapim man i kamap olsem bikpela samting long pulim mani long en. Na wantaim ol nius netwok olsem Internet, i luk dispela samting bai go nogut.

Olsem na Mista Chaudhry i salensim bung long yusim long stretpela rot ol samting we nupela infomesen teknoliji i bringim.

"Ol pasin na eksen yupela i kisim long narapela milenium bai as long kamapim jasmen sapos media indastri i stap olsem yumi save long en tude o bai lus," Praim Minista Chaudhry i tok.

Ol musikman na atis bilong Pasifik bai stap long wol konset

Pasifik: Ol musik man na ol atis bilong 11-pela kantri insait long Pasifik bai stap insait long wanpela intensenel sariti konset long Helsinki, Finlen long mun Desemba.

Ol bai stap insait long dispela musik resis wantaim 200 arapela kantri long wol.

As tingting long holim konset em long karimaut aweanes long raits bilong ol pikinini.

Het tok bilong konset em long "Tomorrow's Child, Let Children Be Children". Ol lain i go pas long dispela konset i laik pulim

tingting bilong ol atoriti olsem i gat moa long 200,000 pikinini solda na 120 milien pikinini husat ol i yusim olsem ol woka insait long wol.

Na ol ogenaisa i wari long ol planti pikinini tumas em ol i yusim ol long mekim wok we ol no sapos long wokim taim ol no bikpela yet.

Dispela kain piksa we ol wol atoriti na gavman i bagarapim raits bilong ol pikinini em i egensim lo we i karamapim raits bilong ol pikinini na Yunaitet Nesens Konvensen i bin

kamapim 10-pela krismas i go pinis. Intenesenel komyniti i no bihainim dispela lo, ripot i tok.

Jake Numanga em wanpela musikman bilong Kuk Ailan bai makim kantri bilong em wantaim manesa bilong em.

Ol arapela kantri long rijen we bai makim ol kantri bilong ol long rijen em long Fiji, Kiribati, Masel Ailan, Palau, Papua Niugini, Samoa, Solomon Ailan, Tonga, Tuvalu na Vanuatu.

Konset bai kamap long telivisen long wol komyniti long lukim long Desemba 12.

Guam bai vot long sindaun bilong ol long neks Julai

Yunaitet Nesens Komiti bilong spesel politikel na dikolonaisesen i harim olsem ol pipel bilong Guam bai vot long politikel sindaun bilong ol long neks yia Julai.

Liklik ailan kantri Guam i stap long Pasifik tasol em i stap yet long lukaut bilong Yunaitet Stets ov Amerika.

Ol ripot i tok Guam bai vot long politikel sindaun bilong em long Julai 4, 2000.

Paul Bordallo husat i makim Gavana bilong Guam Carl Gutierrez i tokim namba foa komi-

ti bilong UN olsem ol wok long dispela samting em i bihainim yet lo bilong ailan teritori bilong em we i tok ol asples Chamorro pipel bai vot long sindaun bilong ol Julai.

Em i tok vot em i wanpela as long kamapim senis tasol Guam bai wok wantaim Yuniatet Stets long kisim sapot bilong em long dispela samting.

Em i tok stat long las yia yet, Guam na US i wok long karimaut ol toktok long dispela samting, wantai gaidens bilong Yunaitet Nesens Spesel komiti long dikolonaisesen o komiti we i luk-

luk long ol kantri we i no kisim independen yet tasol ol i stap aninit long han bilong ol mama kantri.

Ol ripot i tok maski Guam i kisim planti gutpela samting long Amerika na tu ol pipel bilong teritori i sitisens bilong Amerika, ol i laik lukautim ol yet.

Wanpela long ol wari bilong pipel em long Amerika i no kisim tingting bilong ol o kisim ol bikman i go insait taim em i mekim ol bikpela disisen we i karamapim ailan na futja bilong ol.

LAI PSTAIL

Taim bilong

resis gen

long go holide

MASTA WAI i raitim

PLANTI famili nau i tingting long go long ples long krismas holide na planti i mekim plen long mekim sampela gutpela samting long dispela bikpela taim. Ol pikinini bilong ol tu bai pasim skul na ol papama i laik kism ol pikinini i go malolo long ples wantaim ol bubu, kandre na famili long ples.

Dispela em bikpela tingting bilong planti famili husat i stap wok long taun na sili long ol i mas mekim olsem long krismas na nu yia holide.


Long bipo olgeta manmeri i save resis long go long ples long dispela kain taim. Bai yu ken luk ples balus i pulap nogut tru long bikmoning yet i go apinun na nait wantaim.

Sampela taim balus i save pulap na planti pasindia i save stap long wet lis na long neks de ol i save go.

Long sip tu i wankain. Sip bai pulap nogut tru long ol manmeri i laik go long ples. Sip bai pulap long Lae na Madang i go long Wewak, Vanimo, Manus, Kimbe na Rabaul na Popondeta. Na tu sip i bai pulap long Mosbi i go long Kerema Daru na Samarai tu wantaim. Taim yu lukim yu ken save olsem ol manmeri pikinini i laik go holide long ples bikos em krismas, bikpela taim bilong malolo na kism win.

Tasol long dispela yia, ating bai ples balus na long nambis bai i no inap pulap long ol manmeri olsem las yia na ol yia i go pinis long bipo. Bikos prais bilong balus na i sip i go antap moa long dispela taim.

Long las yia, mipela long Mosbi i save baim balus long K160 long go long Lae. Tasol nau, mipela i mas baim K201.30 long go long Lae. Lae balus fea em daun liklik long Mosbi i go long Madang, Wewak, Goroka, Hagen, Wabeg, Mendi, Manus, Rabaul, Kimbe, Kavieng, Manus na Buka. Olsem na planti manmeri bai i mas skelim sampela kago i stap bek long haus bikos olgeta kago wantaim pe bilong pasindia bai antap moa. Tru olsem ol bisnisman na bikpela wokman bilong gavman i no inap bungim bikpela hevi tumas long dispela samting bikos gavman tiket i stap long stretim ron bilong ol wokman ya na bisnisman i gat mani long kism em na famili i go kam. Tasol mi tok tasol long ol turangu liklik leba wokman olsem kapenta, draiva, kuskus bilong kampani, mekenik, plama, stua kipa, sekyuriti gad na arapela moa mi no inap tingim. I gat planti lain i save tuhat long wok mani i stap. Na taim prais i go antap ol i save pilim pen tru long wok na sindaun bilong ol long haus wanwan. Ating sampela ino



inap go long ples long kism malolo kism prais bilong balus i antap tumas winim potnait pe bilong ol.

Planti lain i save laik kism sotpela rot we ol bai peim liklik pe long balus. Na bihain ol i ken go na kism sip o PMV na i go gen long ples bilong ol. Planti lain i save laik ron long balus i go daun long Lae na bihain kism PMV i go antap long hailans, na Madang. Sampela i save kism balus i go daun long Lae bai bihain kism sip i go long Kimbe, Rabaul na Manus o Wewak na Vanimo.

Dispela pasin i kamap pinis bikos long hevi we balus fea i go long wanwan provins i bikpela na i antap moa. Planti lain wantaim planti famili na kago i save tingim tu wanem kain rot ol bai kism we kos bilong balus i mas inap stret long namba bilong ol famili na kago bilong ol wantaim.

Sapos ating i gat tren i kamap long Papua Niugini long bihain taim, mi ba sori tru long ol balus bikos bai olgeta manmeri bai ron long tren. Tren i gat spes bilong olgeta manmeri i ken sindaun na tu i gat inap spes bilong kago. Ating bai tren i ron tupela o tripela aua tasol lusim Mosbi i go long Lae na bihain narapela tupela aua gen i go long Madang na kam i go bek long Mosbi. Sapos dispela kain driman i

tru long bihain, bai ol balus kampani i sori tru bikos ol bai nogat kastoma tru na sampela bilong ol bai lusim bisnis.

I tru trenspot em bikpela samting long Papua Niugini bikos em i bikpela rot bilong yumi long i go kam long provins bilong yumi na narapela provins. Na balus, sip na ka em bikpela trenspot moa we yumi olgeta i save kism strong long en.

Kantri bilong yumi em solwara, bikpela maunten na wara olsem na balus i mas kalapim ol maunten na wara na sip i mas brukim solwara i go long ples bilong yumi. Ating tren bai i no inap long go antap long maunten na brukim wara. Planti ripot i tok tren i save ron long stretpela hap rot tasol. Olsem na ating bai i hat long PNG long ronim trening.

Ating wanpela gutpela hap tasol long ronim tren em long Lae i go long Nadzab ples balus o go olgeta long Ramu Suga na karim ol suga na bulumakau i go long Lae sili long stua na maket.

Planti studen bai pasim skul long krismas na ol i tingting long go long ples na malolo wantaim mama papa na famili bilong ol tu. Ol studen long teknikal skul na kolej o yunivesiti i save gat nesene! skolaspil we ol i gat balus tiket bilong

go long ples na kam bek long skul. Ol i no save yet long pen na hevi ol wokmanmeri i save bungim na pilim taim ol i save baim tiket bilong balus na sip long potnait pe we ol i hatwok long en. Tasol wanpela taim bihain we ol yet i pinis skul na go wokmani stret, orait ol bai pilim tru wanem kain disisen ol i mas mekim wantaim mani ol i kism long potnait. Na ol yet i ken tokaut sapos ol i ken ron long balus long holide taim o nogat.

Prais bilong balus tiket na tiket bilong sip i go antap i no asua bilong ol balus na sip kampani. Prais i go antap bikos gavman i save sot long mani long risev pasbuk long bikpela beng bilong kantri. Olsem na strong bilong mani i save go daun egensim mani bilong ol arapela kantri. Taim strong bilong mani i go daun, wanem samting ol bisnis na kampani i baim long ovasis kantri, ol i baim bikpela mani moa abrusim prais bilong bipo. Olsem na ol i mas apim prais tu long mekim win mani, nogut ol bai bruk daun long bisnis bikos bai no gat profit.

Sait bilong hevi bilong mani em gavman bilong wanwan kantri i save go pas long en. Na sapos wanem gavman i mekim strongpela na gutpela disisen, kantri bilong ol i save ron gut na stap gut. Na taim ol

lida bilong gavman i mekim rong disisen, kantri na pipel i bungim pen na hevi long laip na sindaun bilong ol.

Hevi bilong prais i go antap long ol kago, balus fea, kaikai, kolos na planti arapela samting moa em bikos kantri i sot long mani. Taim kantri i sot long mani, dispela i soim olsem bikpela beng bilong kantri i nogat mani. Ol mani long beng i go we? Yumi ken sutim tok long ol planti bisnis na kampani i salim mani bilong ol i go ovasis o ol bisnisman i rausim mani na salim i go long ovasis beng, gavman i kism planti dinau tumas long beng na ino bekim hariap, gavman i tromoi mani long planti wok we i no stap long plen o baset na ol dispela projek i no pulim mani, gavman i tromoi mani nabaut na i nogat mani i kam insait long kism ples na planti arapela samting moa.

Olsem na sapos wanpela bikpela hevi i kamap long politikis na ekonom i mani bilong kantri, hevi ya bai i go daun na daunbilo tru na ol manmeri long grasrut bai pilim hevi na pen olsem yumi stori long antap.

Wanpela rot tasol em long yumi straik o krosim ol lida bilong yumi long mekim gutpela disisen na lukaut gut long noken mekim asua we mipela bai kism pen na hevi.

Tok pilai bilong ol pikinini i save moa yet

MASTA WAI i raitim

OL liklik pikinini i save mekim kainkain stail na toktok we yu inap lap nogut tru, amamas o wari na sampela taim krai.

Ol liklik pikinini em ol i moa yet long toktok na pilai na wanem samting i gut-pela long ai bilong ol bai i pulim ol i go tasol. Tasol yumi mamapapa i save stap na go pas long ol long mekim samting i stret we ol i no ken bungim birua o kisim sik o bagarapim bodi bilong ol.


Planti taim yumi save lukim long piksa o EMTV, wanpela program bilong ol Amerika ol i kolim Kids Says Dandiest Things o long tok Pisin yumi tok, ol pikinini i save toktok nabaut.

Long wanpela program mi lukim, bikman i go pas long program Bill Cosby i askim wanpela liklik boi, yu gat sampela enimol long haus bilong yu tu?. Na jiklik boi i tok, yes, mipela i gat ol dok, pusi ket, pisin, pis na susa bilong mi. Oloman, manki ya i tok susa bilong em tu i wanpela enimol. Long narapela program em Bill Cosby i askim wanpela liklik meri, yu kamap olsem wanem?. Na liklik meri i tok, mama bilong mi i givim hap epol long papa bilong mi na em kaikai na tupela wik bihain mi kamap.

Long hia tu long PNG, ol manki bilong yumi i save mekim ol kain kain toktok olsem tu long yumi ol bikpela manmeri. Sampela taim ol manki yet i sindaun bai ol i stori na kainkain toktok bai bruk.

Dispela kain samting i kamap long mi yet tu planti taim. Wanpela taim mi slip tasol dua i op olsem na mi askim liklik pikinini mi long go pasim dua. Tasol em tanim bek na tokim mi, "ol man bai kam stilim tausen mani bilong yu ah. Mi paul olgeta na les long toktok bikos ol arapela lain tu i harim na lap indai long dispela toktok. Long olgeta moning taim ol manki i go long skul, liklik pikinini bilong mi long haus i save wari nogut tru. Na em yet i save kamapim stori bilong em olsem em i save skul long Gerehu Hai Skul. Long olgeta moning, taim wanpela boi bilong Gerehu Hai Skul i save lusim haus na i laik go long skul, mipela bai tokim liklik pikinini ya, olsem wanem, ol wanskul bilong yu go skul nau na yu olsem wanem?. Kwiktai bai em giaman ron i go ausait long haus na tokim dispela Gerehu Hai Skul manki ya olsem, tokim tisa, mi sik na mi no inap kam long skul. Mipela i save lap indai nogut tru long dispela giaman tok bilong pikinini ya.

Wanpela liklik manki Wabeg i save gat kain kain stail bilong em tu. Nem bilong em Laurey. Olsem na wanpela taim wanpela wanwok bilong mi i bin sindaun long



• Antap: Isi long kaikai ya! Maus i pulap na bel i tait pinis tasol tingting i nogut na em mekim save yet long hamarim mao banana.

• Boi nogut hangre pinis na i no givim sans long pinga bilong narapela pore bilong em.

haus i stap long liklik Laurey i kam long bikman ya na tokim em, yu laik lukim wanpela samting?. Na bikman ya i askim, soim. Na liklik Laurey tok gen, yu laik lukim wanpela samting?. Na bikman ya i tok strong long lukim. Olsem na isi tasol Laurey i rausim wanpela poto long poket bilong em na soim bikman ya na em tok, mi ya. Taim bikman ya i lukim poto ya, em lukim poto bilong Laurey Daley ragbi pilaia bilong Canberra Raiders bilong Australia lig. Turangu bikman ya i lap na kisim taim tru long pasin bilong liklik manki Wabeg ya.

Liklik Laurey tu em manki bilong ples na em i save lukim ol bikpela Fuso ka bilong haiwe long Wabeg rot. Em i save olsem olgeta bikpela ka em Fuso tasol. Olsem na taim em i kamap long Mosbi, dispela bikman wanwok bilong mi i bin draivim wanpela liklik Nissan ka na kamap long haus. Kwiktai Laurey i lukim na ron go askim em, ankol, yu draivim Fuso bilong yu a?. Bikman ya holim bel na lap i go long haus bilong em. Wanpela liklik meri Manus na Sentrel i save harim wanpela musik i kamap, em bai krai nogut tru. Bikos dispela musik em feveret bilong papa bilong em. Olsem na taim dispela feveret musik bilong papa bilong em i kamap, em bai krai nating tasol inap dispela musik i pinis na em bai stop krai. Ol lain i save laik painimaut wanem as tru na em i save krai long dispela musik taim em i harim. Na mama bilong em i tok, dispela em feveret musik bilong papa bilong em olsem

na pikinini i save krai.

Tupela liklik meri Sepik i save ringim narapela narapela olgeta moning. Long moning bai narapela i kisim telepon na ringim narapela liklik meri Sepik na askim em, sista prendo, yu toilet pinis o nogat?. Narapela bai tok i no yet, na yu?. Ol biklain i save les tru long tupela liklik meri ya bai ringim narapela long telefon olgeta moning na i no askim long wanpela gutpela toktok tasol sekim sapos narapela i go toilet pinis o nogat.

Long skul, wanpela liklik boi Madang i lusim hap belo kaikai bilong em na long 2 kilok brek long apinun em sindaun long as bilong kokonas na kaikai i stap. Ol arapela wanskul bilong em i wok long pilai i stap na wanpela wanskul manki Sepik i kam klostu long em na sindaun na stori wantaim boi Madang i stap. Em stori olsem 5 minit samting em kirap nogut, em bikmaus na krai wantaim na holim han bilong manki Madang ya na tokim em, olgeta taim mi save kisim kaikai i kam long skul na sevim wantaim yu, tasol nau yu no serim hap kaikai wantaim mi. Taim manki Madang i harim olsem, em krai tu na tokim Sepik, wanem taim yu save givim mi kaikai, maski giaman kon ya. Olgeta arapela sumatin i harim na lap indai tru long tupela manki ya.

Wanpela liklik manki Wabeg em strongpela bateri bilong ka stret. Taim papa bilong em i kam long haus, boi nogut bai kalap i go insait long ka na sindaun tanim ol stia na presim hon bilong ka. Em bai tanim ol redio na presim ol samting nabaut insait long ka mekim krai bilong ka tu wantaim. Taim papa bilong em i

draiv, em tu bai strong long tanim stia. Maski ol i rausim em long ka, em ba krai na strong nogut tru long go long ka na em i mas holim stia taim ka i ron long rot.

Wanpela liklik manki Morobe em man bilong kaikai rais. Maski i nogat rais, em bai straik yet long papamama i mas painim rais na skelim long plet bilong em. Dispela em wanpela hatpela pikinini tru long kaikai rais na em bai rausim ol kaukau, taro, banana o arapela kaikai long plet na kaikai rais tasol. Manki nogut ya. Olsem na papa bilong em i save baim bek rais olgeta foatnait bikos long liklik manki tasol.

I gat planti pikinini long planti hap kona bilong Papua Niugini i gat kain kain stail na pasin bilong ol. Na yumi save lukim na lap o amamas o sore long ol. Planti taim yumi save amamas long ol bikos ol i mekim na yumi pilim olsem laip na sindaun bilong yumi i gat mining. Yumi lap, yumi toktok na yumi mekim ol eksen wantaim ol pikinini bikos laip bilong yumi i gat gutpela amamas pasin i stap.

Tru taim ol pikinini i liklik bebi yet, yumi save hat wok na les long krai bilong ol. Tasol taim ol i kamap tupela, tripela foapela na faivpela krismas, em taim bilong lap na amamas pilai wantaim ol olgeta taim.

Taim ol pikinini long dispela kain mak o krismas i save sik o bungim birua o lusim laip bilong ol long sik samting, bel bilong yumi i save bruk nogut tru. Yumi bai tingim olgeta dispela stail bilong em long toktok na pilai na lap na em i save mekim yumi tu i save lap na amamas. Taim birua i bungim ol, bel na tingting bilong yumi tu i save bruk olgeta.

**FRI BAIBEL
KOS
LONG PAS**

I kam long wanpela pren long America sapos yu laikim fri kos salim nem na adres igo long:

**WOL BAIBEL SKUL
WBS - PNG 12,
P.O. Box 9346,
Austin, TX 78766 USA.**



Tewel kilim selpis man

LONG wanpela ples i gat ol man na meri i pulap tru i stap. Ol i sot tru long kaikai na i hatwok long painim kaikai. Wanpela man namel long ol i no save skelim kaikai, em i selpis tumas na ol man na meri na pikinini i no save laikim em.

Wanpela de dispela man i go painim abus long bus, na em i no painim abus, bilong wanem tewel tru i go.

Man ya i go lukim wanpela prut bilong diwai ol kapul i save kam kaikai long nait. Em i tok, bai mi kam bek long nait na sutim wanpela kapul. Tewel tu i harim pinis na em i go.

Man i go bek gen long haus na stretim bunara na wetim mun long nait.

Taim mun i kirap na em i go, tewel i askim, kandre yu laik go we?

Mi go lukautim kapul long bus. Mi laik kam wantaim yu, tewel i tok.

Tupela i kamap long as bilong diwai na lukim planti kapul i pait.

Kandre yu painim rop na mi goap long diwai, Tewel i tok, mi painim pinis, yu kisim na goap.

Man i ting em i rop tru. Em i kisim na goap long diwai. Em i go antap pinis, na em i putim rop long nek bilong em. Na em i sutim ol kapul i go daun long graun.

Man i harim ol bun bilong kapul i pairap na em i askim. Kandre yu mekim wanem? Tewel i tok, mi bungim ol kapul.

Tasol em i no bungim ol em i kaikaim ol nupela kapul pinis.

Man i pret nogut tru. Em i brukim han bilong diwai na redi long tromoi i go longwe, na em i tok, kandre yu was gut. Mi laik sutim kapul i stap longwe tru.

Man em i tromoi han bilong diwai longwe tru long ples nogut. Nau tewel i ting em i kapul na em i go kisim. Nau wantu man i kam daun na ron-

awe long haus.

Tasol taim man i laik rausim rop em i hangamapim long nek, em i pas. Tewel i kam lukim na man i go pinis nau tewel i singaut, Masel. Na rop i stap long nek bilong man i bekim tok, yes. Man ya em i kirap nogut, na em i laik rausim rop tasol rop i pas strong long nek.


Em i larim rop i stap na i ronawe long ples. Man i laik opim

dua tasol nogat, em i dai.

Tewel i kam na kamautim tupela ai bilong em na em i kaikai.

Ol manmeri i lukim bodi bilong em long moning na ol i planim em.

Stori i kam long ples Rintib insait long Goroka, Isten Hailans



Nem: Thecla Banakoru

Krismas: 18 (meri)

Adres: Yarapos High School, P.O. Box 180, Wewak, ESP.

Save laikim: Go lotu, singsing, ritim baibel, waswas long wara na solwara na save laikim go long skul.

Nem: Brendelyn Wabu

Krismas: 17 (meri)

Adres: Yarapos High School, P.O. Box 580, Wewak, East Sepik Province.

Save laikim: Kaikai buai, wokim fani, stori wantaim ol poro, danis, go hukim pis long solwara na save laikim go long skul long bekim hatwok bilong papamama.

Nem: Jacklyn Mais

Krismas: 17 (meri)

Adres: Home Arts Training Centre, P.O. Box 107, Wewak, East Sepik Province.

Save laikim: Ritim buk, harim gospel musik, lukim TV, mekim fani wantaim ol poromeri, ritim baibel na go felosip na pilai gita.

Nem: Grace Mais

Krismas: 18 (meri)

Adres: HATC, P.O. Box 107, Wewak, ESP.

Save laikim: Mekim fani, na stori wantaim ol poromeri, lukim muvi, serim tok bilong God wantaim ol poro bilong mi, kukim kaikai na go raun lukim gem.

Nem: Kawage Bau

Krismas: 10 (man)

Adres: P.O. Box 7219, Boroko, NCD.

Save laikim: Ritim Wantok Niuspepa, laikim waswas long solwara na raun wantaim ol pren meri na pren man. Na pren wantaim ol kristen man na meri na serim tok na baibel.

Nem: Saimon Yau

Krismas: 16 (meri)

Adres: P.O. Box 7219, Boroko, NCD.

Save laikim: Pilai soka, basketbal, raitim pas wantaim kristen man na meri na senisim present.

Nem: Kerry Mangre

Krismas: 20 (meri)

Adres: Gaubin Chint School, P.O. Box 87, Gaubin Hospital,

Save laikim: Wok long wod, harim tok bilong God na stap tasol long dom. Mi bai amamas long bekim leta bilong wanem manmeri rait long mi.

Nem: Eddie K. Taki

Krismas: 20 (meri)

Adres: Gaubin Chint School, P.O. Box 87, Gaubin Hospital, Kinim, Karkar Island, Madang Province.

Save laikim: Raitim leta long ol prens, rit na harim tok bilong God, pilai spots, stap tasol long dom na go long ples long wiken. Mi amamas tasol long bekim leta bilong husat manmeri rait long mi.

Nem: Born D. Sakano

Krismas: 26 (man)

Adres: Capable Construction, P.O. Box 803, Kimbe, West New Britain Province.

Save laikim: Pilai gita, harim gospol musik, bisi long wok na raitim pas long yu husat i rait i kam long mi.

Nem: Jim Troy

Krismas: 18 (man)

Adres: P.O. Box 153, Bialla, West New Britain Province.

Save laikim: Pilai soka, rit, serim aidias na planti samting moa.

Nem: Wesley Ben

Krismas: 20 (man)

Adres: Hargy Oil Palms Ltd, Area (8) Division (2), P.O. Box 21, Bialla, Kimbe, West New Britain Province.

Save laikim: Raun amamas wantaim, harim musik, harim nius, harim gospol musik, mekim fani, wokim gaden, pilai bal gems, stap longwe long ples, wok mani na waswas long nambis na wara. Na lukautim famili laip

Mi wari bikos mi painim hat long toktok long meri



LAIPLAIN

Dia Laiplain

Mi stap long siti na i hat long mi long painim wanpela meri we mi ken save long en, pren na maritim. Taim mi stap long skul, mi bin ting olsem mi yangpela tumas na mi no bisi long gat gelpren.

Sikspela krismas nau mi lusim skul na mi no traim yet long painim wanpela meri we mi ken wokim pren pasin wantaim.

Nau tasol mi bungim wanpela meri we mi ting olsem em rait wan long mi. Mi laik toktok long en tasol mi save sem na guria.

Bai mi save long en olsem wanem?

NERVOUS

Dia Pren

Tru tru em planti meri tu i save sem long toktok long ol man, wankain tasol olsem sampela man i sem long toktok long ol meri.

Mipela i no klia watpo na yu tok olsem dispela meri em i raitwan bilong yu. Sapos yu wok long painim meri we yu laik maritim, i moabeta yu tingting long dispela. Marit

bilong yu bai gutpela sapos yu na patna i gat planti samting we yutupela i laikim. Na tu sapos yutupela i gat wankain kastam na ol samting we yutupela i bilip long en.

Famili bilong yu bai laikim em? Yu save tu long famili bilong en na yu laikim ol tu?

Yu no inap long save long ol samting pastaim tasol bihain taim yu save long en na toktok long en, em bai yu painaut long ol. Ol dispela samting bai helpim yu sapos em bai gutpela long kamap olsem meri bilong yu.

Long wankain taim tu, noken tingting long marit kwiktam inap yu toktok long en na save gut long en. Dispela kain prensip bai kamap taim yu lainim ol samting

long narapela man/meri na narapela i lainim save long yu tu. Planti manki i save poromanim i no wanpela meri, tasol planti bipo ol i painim raitpela we ol bai maritim.

Yu no givim aut moa infomesen long meri na olsem mipela i no inap long givim tingting long yu long pasin bilong save gut long en. Wanpela samting we yu ken tingim em meri ya tu i mas sem long yu olsem tasol yu sem long toktok long en.

Orait, long namba taim yu laik toktok long en, yu mas isi tasol long en. Olsem smail liklik long en taim yu wokabaut abrusim em o askim em long helpim long karim samting. Ol disepla liklik samting bai soim em olsem yu gat intres long en.

Askim em long ol samting we em save laik wokim. Tok piksa em pilai spot, wok gaden, singsing long kwaia na ol samting moa olsem. Long dispela rot yu ken paiaut olsem yutupela i serim sampela long ol samting na dispela i gutpela as long yutupela long stori long en.

Yu ken painimaut tu long ol wanwok bilong em o taim yu yet i skelim wokabaut bilong em ol samting em i save laikim. Tok piksa em long sait bilong wok o ol arapela pilai drama. Yu ken

toktok long ol dispela samting wantaim em.

Ol wantok na ol hauslain i ken mekim rot bilong yutupela long bungim wanpela arapela. Sampela ol poroman bilong em i ken stap wantaim em na yu ken kisim i kam ol lain bilong yu wantaim yu.

Dispela bai givim yutupela sans long toktok wantaim wanpela arapela na long wankain taim, rausim sem pasin we yutupela inap i gat sapos yutupela tasol i bung na i no wantaim ol arapela lain.

LAIPLAIN

Sapos yu gat hevi, rait i kam long dispela edres: LIFE-LINE, POBOX 6047, Boroko, NCD. Yu ken ringim mipela tu long dispela telipon namba 3260011. Taim yu rait, putim trupela nem na edres bikos mipela bai salim bekim pas long wari na askim bilong yu. Long dispela kolom, bai yumi toktok long ol hevi stret tasol mipela bai ino inap long putim trupela nem bilong yu.

Laiplain

Vengol givim Orogen K156 milien

VENGOL Inkoporet i givim Orogen A\$78 milien (K156 milien) olsem peimen bilong em long sia Orogen i holim insait long Lihir Gol Main.

Orogen long dispela wik i tok aut olsem dispela mani nau i kisim kes mani bilong dispela kampani i go antap long mak bilong A\$128 milien (K256 milien).

Menesing direkta bilong Orogen, Charles Lepani i tok olsem Orogen i hamamas long kisim dispela mani long sia kampani i holim long Lihir Gol Main.

Dispela em i sia mani bilong Ogus pei aut bilong las yia. Mista Lepani i tok olsem Vengol i bin gat tripela mun yet i stap long givim ol dispela mani tasol em i amamas olsem ol i givim kwik taim tru.

Mista Lepani i tok olsem wantaim dispela hap mani na tok sapot bilong gavman Orogen i gat gutpela fiutsa. Em i tok tu olsem dispela kes mani ol i holim, i givim ol strong nau long traim long lukluk long ol arapela invesmen we pastaim ol i lukluk long em. Siaman

bilong Orogen, David Beatty, i kisim dispela sans tu long stretim sampela win tok i bin kamap sampela taim go pinis olsem gavman i laik salim ol sia bilong em long Orogen.

Mista Beatty i toksave long ol Bod memba bilong Orogen olsem gavman i no gat laik long wokim dispela.

"Yupela olgeta bai kilia olsem Orogen i bin kamap long 1996. as bilong kirapim dispela kampani em long ronim ol invesmen wantaim ol

risos projek we gavman i gat bilong bilong ol pipel bilong Papua Niugini.

"Orogen i bin putim 49 pe sen sia bilong dispela kampani long wanpela stok maket long Australia; long pablik long baim, tasol dispela ino bin daunim o bagarapim strong bilong ol dispela ol aset bilong kantri na tu ol pipel bilong Papua Niugini," Mista Beatty i tok.

"Sampela hevi kampani i bungim long sait bilong mani, i bin fosim kampani long traim long lukluk

long ol sampela arapela rot long traim long stretim na strongim dispela wari ol i bin gat," Mista Beatty i tok moa.

Em i tok tu olsem Orogen i bilip olsem 51 pe sen sia we em i gat yet i bikpela samting, na ol i no gat wanpela tingting i stap long salim dispela sia long traim long stretim ol liklik mani hevi ol i gat.

Long dispela as em i tok, em i laik tok kilia olsem gavman bai no nap long salim dispela sia, em i bilong ol pipel na i bai stap.



• Sikspela manesa husat i bin kisim MBA digri long Oxford, Ingran. Ivan Bayagau i bin kisim dispela piksa long lansan we PNG IBM i bin holim las wik long welkamim ol.

Nupela bisnis manesmen skul kamap long PNG

VERONICA HATUTASI i raitim

PAPUA Niugini i gat wanpela nupela skul bilong skruim na kisim save long wok bisnis na manesmen.

Em long Global Eksen Lening Institut (Global Learning Action Institute). Em i namba wan kain bisnis na manesman skul long kamap insait long kantri, edvaisa bilong Eksen lening program wantaim PNG Institut bilong Bisnis Manesmane Winston Jacobs i tok insait long wanpela lans kaikailas wik we ol bin holim bilong welkamim sikspela PNG manesa husat i bin greduet long program.

Em bin tok Sition Gion bai kamap bos bilong dispela institut.

Em i tok ol bin kamapim dispela disisen insait long bung we ol bin holim long Oxford, Ingran.

Sikspela manesa long kantri i bin kisim Mastas Digri long Bisnis Edministresen long Oxford Yunivesiti long Ingran bihain ol i pinisim bisnis na manesas kos ol i kolim long "Eksen Lening program".

Na dispela sikspela i bin wokim gat stret na apim nem bilong PNG

insait long greduesen we ol wanlain bilong ol long 49 arapela kantri long wol i bin stap long en. Na ol bin wokim wankain kos.

Nem bilong sikspela man ya em Ken Kaihah husat i wok wantaim gavman printa, Joshua Uvau husat i wok wantaim Dipatmen bilong Praim Minista, Xavier Victor i wok wantaim Telikom, Kinsley Anakapu husat i wok wantaim Rothmans, Michael Vapirik husat i wok wantaim Kopra Marketing Bod na Issac Silas husat i wok wantaim Paia Sevis.

Dispela ol digri program we sikspela i bin pinisim na greduet long en em PNG Institut bilong Bisnis Manesmen long Mosh, i save ranim. Na ol tisa i kam long olgeta hap bilong wol.

Long welkamim ol long kantri, Institut bilong Bisnis Manesman PNG (IBM) i bin holim wanpela lans long Mosh.

Eksekutiv Dairekta bilong PNG IBM Sition Gion i tok dispela ol greduet em ol nupela lain bilong manesas husat i pinisim ol ki kos program bilong eksekutiv developmen long intenesenel level. Na ol i gat save long manesim ol bikpela

senis long ol program insait long wan wan ogenaisesen bilong ol.

Mista Gion husat i stap long bod bilong Komon Maltinesenel Akademik Bod we i save lukautim ol digri program i bin tok moabeta PNG i putim moa manesa na lida insait long dispela lening program ol i kolim long Eksen Lening Program.

Em bin tok ol dispela manesa bai kamap olsem spesel blesing long ol kampani na ogenaisesen bilong ol.

Em bin tok ekprians long olgeta hap bilong wol i soim olsem ol manesa husat i wokim dispela intenesenel edukesen program i skruim save moa na kamap gutpela moa long wok bilong ol, winim ol narapela wanwok.

Em i tok long neks yia, 10-pela moa manesa bai greduet long wankain kos tasol em bai kamap long Holan.

Edvaisa bilong Eksen lening program wantaim IBM Winston Jacobs i tok sikspela greduet bilong PNG i buin wokim gut stret na ol i apim nem na fleg bilong PNG long taim bilong greduesen long Oxford, Ingran.

Mista Jacobs husat i bin stap long greduesen bilong sikspela man i tok em i amamas long i bin gat man long makim kantri long Global supavaisa, patna, malti akademik na filosofikel rivyu fakalti woksop na namba 74 bung bilong Malti Akademik Bod long Buckingham na Oxford.

Em i tok ol save we sikspela i kisim long program i gutpela na dispela bai putim PNG long mak na save long ol samting we i kamap long ol arapela hap bilong wol.

Na em bin askim sikspela long serim na promotim save bilong ol long mekim laip i kamap gutpela.

Peter Tsiamalili husat i bin olpela seketeri bilong Foren Afeas na nau em i wanpela bikman long Praim Minista Dipatmen i tok humen risos em i wanpela bikpela samting na ol kain kos olsem dispela we sikspela i wokim i gutpela long redim na skruim save bilong ol long pesenel na profesenel developmen.

Em bin tok hatwok bilong ol i kamap long ples klia taim ol i kisim ol Masta setifiket pepa bilong ol long Oxford na nau samting i stap long han bilong ol long eksenim save na skul ol bin lainim long kos progre.

Buka taun kisim gutpela helpim long Seketeriel sevis bilong meri Buin

TAIM ples na sindaun long Bogenvil i wok long kamap orait, ol pipel i wok long painim ol rot long traim helpim ol yet na ol arapela wantok bilong ol.

I no ol man tasol i strong long kirapim Bogenvil tasol ol meri tu wantaim i stap insait long dispela wok.

Wantaim faivpela woklain long helpim em, Rose Pihei i wanpela long ol meri husat i kirapim liklik seketeriel sevis bisnis bilong em long Buka taun.

Em i kolim bisnis ya long RMLSeketeriel Solusen (RML Secretarial Solution). Bisnis ya i operet long Tupirik Biding insait long Buka taun.

Rose i wanpela mama na tu em bin wanpela wokmeri long Distrik Sevis Divisen bilong Bogenvil Edministresen. Tasol taim em i kirapim dispela liklik bisnis bilong em, em i lusim wok wantaim Bogenvil edministresen na em i ranim bisnis bilong em.

Taim ples i wok long kamap orait na em i luksave olsem planti pipel we i karamapim ol memba bilong pablik, ol sumatin na ol skul, ol pravit kampani na ol gavman lain i laikim sevis long seketeriel sait em i kirapim dispela liklik sevis bisnis bilong em.

Na em i save givim ol sevis olsem skening, taipim ol setifiket, printing, baiding na laminating.

Em bin kirapim bisnis ya long Desemba 1998.

Em i gat foapela kompyuta, wanpela kopia na printa.

Rose i marit long Buka Ailan na em gat sevenpela pikinini i kam long ples Kogu long Tobago eria insait long Buin, saut Bogenvil. Em i kisim gutpela sapot long man bilong em long go hetim dispela wok bisnis bilong em.

Em i tok wantaim ol nupela masin na kopia na printa, wok i gro na i gut tasol.

Em i tok planti pipel i laikim dispela sevis olsem printing na fotokoping. Em i tok i nogat narapela sevis olsem long Bogenvil na liklik bisnis bilong em i sevim gut ol pipel tru.

Em i tok bikpela laik bilong em em long inapim laik bilong ol kastoma na tu givim gutpela sevis.

Em i laikim tu kala kopia long printim ol setifiket.

Em no bingo long wanpela kompyuta skul tasol taim em i kirapim dispela bisnis, em yet tu i kisim skul na skruim save long dispela wok.

KANAGE

"Em nau, narapela wik bilong mi ken"



Kanage em bilong Finsafen. Wanpela taim em wantaim sani boi bilong em tupela i mekim save long sapim bonara i stap. Orait sani boi kirap na kisim bonara na em mekim trening bilong em long sutim ol liklik grin palai. Na em ronim ol igo i kam tasol em ino lukim wanpela traipela palai i slip sore aninit long tupela tais bilong lapun papa Kanage na em promanim het bilong blakpela moran na slip i stap. Orait sani boi askim lapun Kanage. Papa mi sutim a, papa mi sutim a, las askim nau, papa olsem wanem yu laik mi sutim a orait lapun Kanage tokim sani boi olsem pikinini yu sutim long laik noken askim mi tumas. Em trening bilong yu. Orait pikinini taitim bonara. Em dabolim wantaim grin palai na blackpela het bilong morang lapun Kanage hap indai na pikinini tek ov long bus olgeta.

**Kossorona Jokers
Lae**

Kanage bin go lotu long wanpela Sande. Kanage bin tromoi ai pinis long wanpela pikinini meri bilong pasta. Taim bilong lotu na pre em wok long tromoi ai long dispela meri yet. Pikinini bilong pasta ya tu wok long tromoi ai long Kanage yet, na tupela wok long givim save long ai i stap.

Taim lotu i pinis, em tokim pikinini meri bilong pasta ya long kam na tupela sindaun stori long kam as bilong wanpela bikpela diwai. Tupela stori i go na em tokim meri long bai tupela i go, tasol meri tok long bai em bihainim plen bilong man antap. Planti taim long wanwan Sande Kanage save askim laik long kisim meri i go long haus bilong em tasol meri ya i save givim seim ansa. Nau long wanpela bik Sande moning, Kanage i plen wantaim wanpela liklik boi na tupela go long ples bilong Pasta na em hatim stori wantaim lewa bilong em na liklik mangi i haik antap long diwai. Taim stori i pinis Kanage i askim meri long go long haus bilong em tasol meri i strongim kona bilong em na tok nogat. Em i mas bihainim plen bilong man antap. Taim i tok olsem, liklik mangi ya i kirap no tok; "Mi man antap na yu mas go long haus bilong Kanage". Taim meri harim dispela tok, lewa bilong em tanim stret bikos em save plen na stap. Liklik mangi ya tasol i wokim na Kanage maritim pikinini meri bilong pasta.

**Michael Kingi,
Mendi, SHP**

Kanage em bilong Simbu na i save stap long Kimbe taun. Turangu Kanage i lapun nogut tru na em i save wokabout wantaim diwai. Wanpela taim Kanage i bihainim rot long Kimbe i laik go long haus nau. Em i wokabout i go na seim taim tupela ka i bam. I no long taim wanpela plis ka kam na plis i askim Kanage; "Wanem samting i rong long tupela ka ya?" Tasol lapun Kanage i no bekim. Nau wanpela plisman bilong Simbu i askim Kanage long tok ples tasol lapun Kanage i no bekim liklik. Wanpela plisman i kirap na



askim Kanage long tok English; "What happen?" Kanage kirap na tok; "One car came this way; and other car came that way and in the middle they break bun". Man olgeta plisman i lap nogut stret long Kanage na tekov.

**Betty Damien
Kimbe, WNPB**

Kanage em bilong Sepik wara na em save skul long Kimbe Hai Skul. Na em i wanpela fani mangi olsem na olgeta tisa i save gut tru long em. Na wanpela taim bagaros ya i no bin go long skul. Kanage i bin go raun wantaim tupela poroman bilong em long bus. Ol i go painim mumut na kukim na kaikai arere long wanpela bikpela wara. Ol i kukim na kaikai pinis na Kanage tokim tupela poroman bilong em long waswas. Em nau ol i sanap antap long wanpela maunten na kalap. Taim tupela poro bilong Kanage i kalap i go daun Kanage i sanap yet. Yupela kirap na tokim Kanage yu kalap na yumi wawwas. Taim bagaros i kalap i go daun stret em i bamim het bilong em stret long traipela diwai. Turangu baga ya kisim taim stret na go long haus. Neks moning Kanage i go long skul na tisa bilong em i askim em. Kanage, why na aste yu no kam long skul? So Kanage i stori long klas.

Yesterday we went to the river and we wash I bump a marmar tree and I question back. Olgeta klas mate bilong em lap nogut stret long Kanage. Kanage sem pipia na tekov long haus i no kam bek long skul.

**Betty Damien
Kimbe**

Wanpela taim Kanage wantaim tumbuna bilong em i go long bus long digim welmami. Taim Kanage wantaim tumbuna bilong em i wok about i go na Kanage lukim lip bilong welmami pinis. Kanage tanim na tokim tumbuna bilong em olsem hey tumbuna mitupela i no kam long wanpela samting, nogat ya mitupela i kam long digim samting ya. Samting ya wel em ya yu lukim! Taim Kanage wantaim tumbuna bilong em i wokabout i go long as bilong welmami. Kanage

Wokabout i go pas rausim basket bilong em na i go bek long katim diwai long sapim long digim welmami long en. Kanage katim diwai pinis na Kanage karim i kam bek na i sapim long digim mami long en. Kanage sapim diwai pinis na kirap gen na singaut long tumbuna bilong em olsem; hey tumbuna sapos yu kam okei yu mas kam isi bikos welmami bilong ol Makam ya em i gat nil i stap antap na daun bilong as bilong kaikai bilong em tu ya. Taim Kanage toktok pinis long tumbuna, em bendaun long pulim laplap bilong em i antap long tais na i laik digim mami. Man! Kanage tu i no werim trausis, nogat tru Kanage pasim laplap tasol na i go long bus long digim mani. Taim Kanage laik sindaun i go daun long digim welmami na tupela samting bilong Kanage i kamaut hariap na tumbuna i lukim stret samting long tumbuna. Na tumbuna bilong Kanage kirap na tokim Kanage olsem; hey tumbuna hau na balus ya no pundaun yet long graun na hau tupela will bilong em i kamaut hariap ya. Kanage kirap gen na tanim na lukluk i go antap na tokim tumbuna olsem em "i mas wanpela samting i faul ya olsem na em i laik tromoi wil i kamdaun long mitupela. Taim Kanage tok olsem pinis na Kanage laik sindaun i go dau na digim tanim na tupela bol bilong Kanage i ron antap long nil blong welmami stret. Man! Kanage kirap nogut stret na singaut. Ayo, mama! Wil blong mi i boluk ya na bai mi kisim arapela we! Kanage karai na rausim olgeta samting i stap long bus na em wantaim tumbuna i go bek long ples.

**Yaun Jay Jangafar
Lae**

Kanage bilong Nuku Distrik long Sandaun provins. Wanpela taim Kanage i lusim ples na i laik go raun liklik long Rabaul. Em i no save liklik long Rabaul taun na Kokopo, nogat tru. Yu save kain man long ples em i no save gut tumas long taun. Nau long dispela taim Kanage i wok long raun antap stap long Rabaul na Kokopo. Em i stap i go i go na em i les long stap long Rabaul nau na em i laik go long Kimbe na lukim ol palm i

olsem wanem tru. Na wanpela taim Kanage i go na askim long wok long plentesin na plentesin manesa i tok orait long em long wok. So taim em i stap em i wok long tupela potnait tasol. Long pes potnait em i kisim K44.00 na em i tok em pinis mi go nau long Kimbe tasol em tingting ken na tok orait mi stap liklik pastaim long narapela potnait ken. Orait taim las potnait stret man Kanage i go stret long sip bris na baim tiket blong Kondor em nau taim em bai i pinis. Nau em i laik go long stoa na baim sampela kaikai long kaikai long sip em i go na baim 1 dasin maggi noodles na i ting em baim basket tasol mangi nogut ya i baim noodles wantaim tupela goldspot.

**Saluator Nambanki
Kimbe**

Paps Kanage em bilong Wewak Trubu bus. Em i marit long meri as ples yet na tupela i gat planti pikinini pinis. Wanpela taim nau em papa Kanage i kalap long PMV ka na kam daun long Wewak taun. Boi nogut ya i raun raun i go na em i sait step long wanpela yangpela meri Urimo. Kain bilong em ya! Kanage kirap ria tromoi hap tok pisin bilong em i go long meri ya olsem. Ai susa! olsem wanem i gat sepes o nogat. Meri ya i harim na tanim na lukluk strong long lapun. Kanage na bekim tok olsem. Paps Kanage lapun na tingting long wip yet. Man Kanage i sem tasol yupela i save Kanage em tok pisin mangi olsem na em i bekim gen olsem. Ai susa em i hat long stopim ya bikos em i pas pinis long blut ya. Semtaim tu em PMV bilong ples i kam stop na paps Kanage tekov long ples.

**Phiip K. Tete
Wewak**

Kanage em bilong Banz long WHP tasol em i no lukim solwara liklik long laip bilong em. Tasol wanpela taim em kam raun raun long Lae na go lukluk raun long Vokopoen. Yu save kain bilong ol Hailans ya bikmaus nabaut nabaut na pundaun. He-ri-ri-ri. Misis Kanage singaut vu-u-u-u-u wagpara mag puned rong wara burade-e-em yupara kam rukim

ma-yao-o-o mina sawa em i go-o-o buku pilonro arire ariap ya ko.

Dickson Pebila

Kanage i bilong Makam velis, long Morobe provins. Wanpela taim em i pulim lain wantaim ol boi na ol i go waswas long wara Makam. Long dispela taim wara Makam i tait na i wok long karim ol hap diwai na ol pipia i kam. Na ol boi i wok long kalap na kisim ol diwai na tromoi i go antap. I no long taim wanpela braunpela palai olsem liklik pukuk i slip antap long diwai na i kam. Na Kanage i kalap long kisim ya nogat, palai i putim tit stret long em. Man Kanage i tirip long wara na singaut i stap. Ol boi i pulim em i kam antap na em i giaman long dai. Orait ol i pasim laplap long 2pela diwai pinis na 4pela man i karim Kanage. Na man em i kisim gutpela filings stret.

Taim ol i kamap namel long rot ol i harim belo i krai, na ol i tok, yupela ol i paitim belo long lotu o man i dai? Ol i tok olsem na tromoi Kanage i go daun, man Kanage i no wet olsem em i pundaun long hat wara na taim em i kirap, em i givim siksti das i kirap winim ol na i go pas sindaun long ples na lap i stap.

**Ben John
Lae**

Kanage em i bilong Maruma long Simbu Provins, na i go lukluk raun long Hagen sow. Tudak nau na em i tingting long go bek long Simbu na em i kukim i go long bus stop stret. I nogat bas long go long Simbu so Kanage i wet 3pela minit i go na wanpela bas i kam. Na bos kru i tol Lae Lae. Kanage i kirap na putim han i go long poket long sakim kilok bilong em. Na taim bilong em i sanap stret makim 5:00 kilok. Man Kanage i lukim kilok bilong em na em save pinis olsem em i late pinis. Kanage i wokabout i go long bas i tok Lae. Lae na em i askim bos kru olsem em i laik i go long Simbu tasol em i gat K2 tasol na em sot long narapela K2. Na bos kru i bekim tok na em tok nava mine yumi ol Hailans ya na kam. Kanage i go sindaun long sit na em i tingting planti long bos kru i tok nava mine long em. Man draiva i spit narakain tru tasol Kanage i no hamamas bas i kam pinis long Kundiawa na bas i stop. Kanage i lusim sit i go klostu long dua na pulim wanpela han long bos kru na tok olsem. Yu gutpela man we yu tu yu nava mine. Na olgeta pasindia kilim skin long lap tasol Kanage i no lap long ol.

**Boby Kuipa
Simbu Provins**

Kanage em bilong wanpela liklik ples Miuaudei insait long Lumi distrik. Wanpela taim Kanage wantaim poroman bilong em wanpela mangi Madang. Tupela i stap long Lumi na i laik kisim balus na go daun long Aitape. Orait taim tupela i kalap long balus na i tekov i go long Aitape, tupela i stori nogut tru na stori tu ya i paulim het bilong Kanage. Taim balus i len long estrip crait poroman bilong Kanage i rausim siale bilong em na i go autsait na Kanage i traim hat tru long rausim siale bilong em i stap i go na paillet i lukim em na askim em hey bikman, whats wrong? Na Kanage i guria na tokim paillet olsem, Mr, this baten mas rasting andia pine hat for mi to. Lisen pren mi the oil hari so IM but some in this ras baten. Taim paillet i harim na lap nogut tru long Kanage na Kanage i pilim sem na tekov long-long i go long ai bilong planti man-meri na pikinini.

**Exlee Ainyis
Aitape Vocational**

KANAGE



Wanpela taim Kanage wantaim tripela poroman bilong en i bin laik kaikai pis stret na tripela i kisim ol spia bilong tripela na bihainim nambis i go na sutim 4-pela pis tasol. Tripela i hangre nau na laik kukim stret pis na kaikai. Taim tripela i wokim long kukim i stap ol plis i kam. Ol raskol tu i bin stil na ol plis i bin wok long painim. Ol kam na askim Kanage na tripela poroman bilong en. Ol askim Kanage wantaim tripela lukluk long ol yet bikos tripela wantaim i no save long tok pinsin. Kanage i tok em save tasol long wanpela liklik hap ol save tok nogat. Tripela poroman sapot long Kanage bai tok. Plis kirap na askim ken pis bilong husat. Kanage na ol poroman lukluk nabaut long ol ken. Kanage kirap ken na tok mi save tasol long wanpela liklik hap ol save tok kisim tasol. Ol plis harim olsem ol daunim spet kisim ol pis na tekov i go. Kanage na ol poroman i kros pait i stap.

**Terry Kaile
Kavieng**

Kanage i bilong Daru na em i go wok wantaim DPI long Morobe, stap i go na em marit long Morobe. Wanpela taim em tokim lapun man bilong em kam na ol stap wantaim. Long wanpela apinun meri bilong Kanage kukim kaikai stap. Nau na lapun mama bilong Kanage singaut i go long tambu bilong em na askim em. Tambu powpow i ya mai, meri bilong Kanage harim olsem em i go long beksait bilong haus na sekim powpow, powpow i no mau. Em kam bek na tokim lapun meri olsem powpow i no mau. Man Kanage i lap i go i go pinis na tokim meri bilong em olsem lapun mama ya i askim yu long daka i no powpow. Long tok ples motu dak ol i kolim powpow.

**Kenny Waup
Lihir Ailan**

Kanage em wanpela lapun man long ples. Wanpela taim em go long stua, tingting bilong em laik baim rais na tin pis, tasol abrus na em tokim stua kipa olsem, pikinini mi laikim wanpela bikpela suga plet wantaim liklik tin pis. Lapun ya kisim na wan tu em i go bek long haus bilong em. Taim em i go long haus papa ya i wokim bikpela paia na kapsaitim suga long pot na bolim, turangu em i wait, na wait, longpela taim, yu save lapun ya em hangre nogut na wokim bikpela paia, tasol paia ya i drain wara long pot. Smok i kamaul long pot. Taim em opim pot na lukim, nogat rais insait long pot, pot ya em emti nating. Olsem na lapun ya i bik maus long em olsem sanguma i kaikaim rais bilong mi, sori tru papa ya ansa pinis na i no save olsem em i bolim suga. Kanage em i no save long rais na longlong.

**Ralda Kari Youna
Mt Hagen**

Wanpela taim tambu bilong Kanage i go lukim em long haus bilong Kanage. Tambu ya em lotu man na laikim tambu bilong em



long bihainim em long go lotu na witesim Kanage long tanim bel. Kukim kaikai i stap na tambu ya kam kamap long haus. Kanage rispektim tambu bilong em na tokim em long kisim kaikai i kuk pinis nau Kanage skelim i go tupela hap long tupela plet. Skelim pinis nau Kanage kirap tokim tambu bilong em olsem: Kaikai ya em skel bilong mi tasol yu save pinis tambu lewa olsem na mi skelim hap i kam long yu. Orait tambu ya kirap bekim tok bilong em na tok; i no yu tingting long givim tasol papa i kam long yu. Orait tambu ya kirap bekim tok bilong em na tok; i no yu tingting long givim tasol papa bilong mi salim gutpela tingting long yu long skelim hap i kam long mi na mi tok tenkyu tru long papa long dispela kaikai. Kanage belhat nogut tru nau em tokim tambu ya na tok olsem orait, papa bilong yu givim yu long em bai yu kaikai na mi yet skelim long han bilong mi na givim long em bringim i kam bek na mi yet kaikai. Kanage mekim save long tupela plet kaikai na tambu ya pilim sem nogut tru nau em tekov i go bek long ples bilong em.

**Jackson Opi Heson
Mendi**

Wanpela nait Kanage laik go long disko na kamap long disko haus em i lukim wanpela naispela meri na amamas wantaim singaut strong na tok; boso I follow or? Meri ya kwik taim kirap na tok, yu go hait long bus, nus bilong yu olsem lenkrusa. Baga nogut ya i sem pipia stret na i go ausait long geit na tingting planti i stap i go i go na pekpek i kilim em nogut tru na i go beksait long haus disko. Bihain em pekpek pinis em klinim as bilong em long gras waia ol blakpela blakpela anis i pulap long em long nait taim. Taim em i klinim as bilong em i stap em i harim olsem ol i singsing sek, sek - sekim em. Olsem na kwiktaim em pulim trausis bilong em i go antap na i go bek ken na saitim kona bilong haus na em yet danis i stap.

I no long taim meri ya i laikim danis bilong Kanage na i kam danis wantaim em i go i go na Kanage i pilim olsem as bilong em i sigarap nogut tru taim ol blakpela blakpela anis i kaikaim tru wantaim musik na meri ya askim em na tok; yu danis gut tru ya. Kanage kirap na tok em stail bilong Holimaiya. Bihain em danis pinis em kam long haus bilong em na paia olgeta.

**Merepo Glimulihe
Goroka**

Kanage bilong PNG na i go limlimbur long Pasifik Ailan long Fiji. I no long taim na meri Fiji i saiso long em. Kanage ya i lus na meri Fiji i no bin gat bel long Kanage, Kanage em tingting planti na kam bek long PNG bilong painim blak pawa bilong wokim meri Fiji i gat bel. Taim em stap long PNG, meri raun wantaim man Fiji yet. I no long taim Kanage kisim blakpawa na go bek long Fiji. Em i gat bel. Kanage amamas stret. Go long haus bilong wantok bilong em na tupela kilim skin long bia. Bihain em tokim wantok olsem. "I amamas, I get my meri gat bel at long last. I spak to no return. If luk baby boy I go for spak moa." I no long-taim nain mun bihain meri Fiji bilong Kanage karim pikinini man. Kanage harim na amamas nogut tru. Em spak na go long haus sik bilong welkamim Junia Kanage. Em kirap na tokim nes bos long wod karim. I go father Junia Kanage and I wanna luk him face. I strong and Junia Kanage arrived. Taim em go insait i lukim olsem face bilong Junia i no luk olsem paps Kanage. Em siksti i go long haus bilong wantok na kra i stap. Wantok harim na askim; hey Kanage; watpo yu kra i? Kanage kirap na bekim olsem. "Mi no save hau na why? Man i planim kaukau long gaden, kaukau i kamap, meri i planim singapore, singapore i kamap, man i planim tapiok, tapiok i kamap, tasol baby na mi planim PNG na Fiji i kamap? Tomorrow I fly bek to my country PNG next de. Kanage fly lusim meri na Junia na

kam bek long PNG.
**Elver Eel
Goroka**

Kanage em wanpela lapun man bilong ples Balimo long Westen provins. Em i wanpela so op lapun man bilong wanem olgeta pikinini bilong em ol i wokmani long sampela hap long PNG. Sampela taim tu em i save givim tok Inglis ol waitman i bin lainim em taim em i wok haus kuk boi bilong ol long ol yangpela skul sumatin long ples. Em nau wanpela gutpela taim Kanage pinis long wanpela kris-mas holidwe olgeta pikinini bilong lapun Kanage kamap long ples. Ol kam wantaim planti pikinini bilong ol mekim na liklik haus bilong lapun Kanage i pulap nogut tru na klostu kapsait. Lapun Kanage i no wari tumas long dispela na em wokim liklik pom aninit long haus bilong em bilong slip. Wanpela apinun nau em kisim olgeta tumbuna bilong em na wok long pilai ausait long haus. Ol pilai i go nau na lapun Kanage laik pispis. Em nau em gijaman pilai "hide and seek" na i go hait insait long ol plawa Bogenvil. Hariap tru em sanap klostu long plawa na autim raba hos bilong wara long plawa. Mekim olsem na pin bilong plawa sutim em stret long hos na lapun singaut nogut tru. Em nau olgeta liklik tumbuna man meri ron i go lukim bubu bilong ol. Mekim olsem nau na lapun Kanage tanim long sait na tok Inglis long ol. "Hey! Don't see bubu's what not, otherwise, you will get the blind." Lapun Kanage i no save gut long nem bilong raba hos long tok Inglis olsem na em i tok "what not." Kain Inglis tasol bilong lapun Kanage mekim na olgeta lap idai na ron nabaut nabaut na singaut "Bubus what not! Bubus not!"

**Anderson Dolesa
Kiunga**

Kanage em bilong Nebiler long Westen Hailians. Wanpela taim em

i go waswas long wara, Nebiler wantaim ol manki taim waswas pinis ol i kukim kaukau na banana ol kaikai i stap. Kanage i harim wanpela bikpela nois na em i lukluk i go antap long skai na em i lukim wanpela balus i kam na pret wantaim na putim lek insait long paia na kirap nogut na go insait long wara na ston brukim het bilong em. Blut i ron olsem wara Kanage lukim blut bilong em yet na kra i na go long haus wantaim ol manki. Misis Kanage lukim lewa bilong em i mak bilong dai em kilim skin bilong em yet na kra i. Pinis kra i em tok long ol manki mi no kaikai blut na lewa karim blut, olsem wanem.

**Paulus Rami
Mt Hagen**

Kanage em i wanpela skul manki long fri skul long Ambunti Akaemi. Wanpela moning em i wokabaut i go long skul na yu save, em i bin man bilong ol dok long raun nabaut tupela, tupela. Long kona bilong rot stret, Kanage i lukim tupela dok i pas na sanap i stap. Bikos Kanage em i liklik manki tumas, olsem i no save bilong wanem na tupela i stap olsem. Kanage i sindaun i stap long klasrum na tisa i askim ol skul manki olsem: Inap wanwan bilong yupela i stori long wanem samting yu harim o yu lukim? Sampela ol manki i stori long ol spakman na ol arapela samting. Kanage tu i kirap nau i tok: Tisa, on my way to school I saw two dogs were joined together. Taim tisa i harim olsem em i traime long karamapim na em tok: I see the point, I see the point. Tasol, Kanage i strong na i tok: No tisa, you didn't see the point, the point is lock. Tisa i sem na em i putim senisim dispela tok na kalap long arapela lesen bilong skul.

**Martin K. Willie
Ambunti**

Kanage em wanpela lapun man bilong ples insait long Morobe Provins. Em i gat tripela pikinini tasol. Long wanpela taim, bikpela guria i bin kamap.

Long dispela taim ol i bin stap insait long haus na ol planti man-meri i kam pulap aninit long haus bilong Kanage. Dispela taim Kanage pasim laplap na slip. Na Misis Kanage kisim tripela pikinini wantaim samting bilong ol na ronowe i go long narapela haus. Taim ol laik i go ol singautim Kanage tasol em i no harim. Taim ol i go pinis Kanage kirap tasol long bet na ron. Em i no save olsem laplap i lus. Tutak na Kanage singaut long Misis. Misis, bengim tos long Kanage na go stret long tripela brata bilong Kanage. Taim Misis lukim olsem em singaut na tok go bek na haitim tripela brata bilong yu na kam. Long moning Misis go na tokim ol manmeri long stori bilong Kanage na ol mekim save long lap indai stret. Mekim na Kanage sem pipia stret na tekov.

**Marina Hone
Madang**

Kanage bilong Morobe Provins. Em wanpela singel man na em save stap long Lae. Wanpela taim em raun i go long taun na lukim wanpela skul meri wokabaut i kam na Kanage kirap na tokim em olsem, susa mi gat laik long yu ya. Yu gat wanem kain tingting. Meri kirap na tokim Kanage olsem. Yu nogat tru ya? Kanage kirap na bekim yes mi nogat olsem na mi askim. Meri ya nogat toktok taim Kanage bekim askim bilong em. Em lus wantaim bodi na tekov.

**Marina Hone
Madang**

Nogat sevis long Abura Wonenara

Dia Edita,
Mi wanpela mangi Wonenara insait long Kainantu Isten Hailens Provins. Mi laik sapotim tok olsem em tru i nogat sevis i go insait long Wonenara na Abura.

Memba bilong Abura Wonenara, Muki Taranupi i no mekim wok. Em i nogat han mak bilong em. Mipela tu i stap yet long tumbuna pasin yet. Em tru, mipela i no save kalap long ka na i go long Kainantu. I nogat tru.

Mipela i save kisim balus na i go long Aiyura na mipela i save kisim ka long aiyura na go daun long Kainantu. Em tru olsem na yu inap long senisim tingting na helpim ol pipel bilong yu na stretim olpela rot

na ol bris i bagarap.
Rot bilong mipela nau bikpela bus i karamapim. Olsem na yu mas baim masin na stretim dispela rot i go long ples na ol pipel i ken lukim ol ka. Plis helpim ol pipel bilong yu long ples.

Em tru taim bilong kempen yu bin brukim traipela maunten wara na traipela bik bus i go i kam long Obura Wonenara. Olsem na mi askim yu long stretim bris na rot bilong mipela.

Sapos yu husat i laik sapotim mitupela orait rait i go long Wantok Niuspepa bai mipela i ken ritim.

**Maino Diriyana
Obura Wonenara**

TOKSAVE KAM LONG EDITA

Wantok i prinim nau let bilong ol manmeri wantaim poto we i soim klia pes bilong yupela. Olsem na yupela ken salim tu poto bilong yupela i kam long dispela adres. **Painim Penpren, Wantok Niuspepa, P.O. Box 1982, Boroko, National Capital District.**

Kagua Erave i nogat sevis

Dia Edita,
Mi wanpela lotu lida long Puli Katolik Misin long Kagua Erave Sauten Hailens Provins.

Mi laik autim wari bilong mi i go long Wantok Niuspepa. Wari bilong mi i olsem, mipela ol pipel long Kagua Erave i nogat gutpela sevis. Stat long 1997 Jenerel Ilekseen i kam inap nau 1999. Ol papa mama pikinini i painim sik ol i save dai, bikos mipela i painim hat tru long kisim gutpela sevis bilong haus sik.

Dispela hevi i wok long givim bikpela hevi long ol pipel bilong Kagua Erave.

I luk olsem i nogat gutpela lida i stap bilong karim ol dispela hvi bilong mama papa long ples. Mipela ol yut lida long Sugu Peris i singaut i go long Gavena bilong Sauten Hailens Provins Anderson Aigiru olsem mipela i no pik, dok. Mipela manmeri i gat laip. Plis inap yu glasim dispela hevi bilong Kagua Erave na helpim mipela.

Yu husat brata o susa i laik sapotim mi o agensim mi, orait rait i go long Wantok Niuspepa bai mi ken ritim.

**Philip Angula
Puli Katolik Misin**

Kolim stret Barupu Lagun

Dia Edita,
Mi laik bekim pas bilong tripela brata bilong ples Sissano em Pitikus Tani, Moses Moti na Morris Pessa. Yupela i no bekim askim bilong mi yet. Askim bilong mi i go olsem:
• Nem Sissano i kam olsem wanem; na
• Wanem mining bilong nem Sissano; Husat i laik egensim o sapotim mi plis rait tasol long Wantok Niuspepa bai mi ken ritim.

**Gabriel Antei
Aitape Arop Wes Kos**

Stretim Aitape taun maket

Dia Edita,
WANPELA samting mi lukim i givim bikpela sevis tru long Aitape taun long planti ol pipel bilong ples na taun tu, we i winim ol arapela sevis long taun em Aitape taun maket.

Dispela sevis i save kamapim gutpela mani bilong Aitape. Ol pipel long ples i save painim liklik mani bilong helpim na stretim sindaun bilong ol. Planti taim tu mi save lukim trangu ol mama i save i gat bebi i save go long maket na slip sapos ol i kam long ples i longwe long taun. Tasol Aitape taun maket i no gutpela.

Olsem na mi askim Aitape Lokol Level Gavman o wanem ol lain i go pas long lukluk long dispela hevi na painim rot kwik bilong helpim. Mekim Aitape taun maket i kamap wanpela gutpela ples bilong salim kaikai na tu bilong slip.

Plis lukluk long dispela hevi na painim rot bilong helpim mipela olgeta.

**Philip A Pais
Aitape**

God i ken helpim yu

Dia Edita,
Mi laik putim wanpela tingting bilong mi long sik AIDS. Ol dokta na ol save man bilong mekim ol marasin i tok i nogat marasin bilong rausim sik AIDS.

Na mi tingting planti, ating dispela sik i kamap long pasin bilong pamuk. Tru ol i no inap painim marasin bilong sik AIDS orait mi gat wanpela tingting bilong helpim ol lain i gat sik AIDS.

Husat i gat sik AIDS, mi askim yupela long go long sios i stap klostu long yu na lukim ol wok manmeri bilong God.

Tok sori long sin bilong yu long God. Nau long dispela taim yu noken wari long sem na dai bilong wanem em i stap ples klia pinis. Givim yu yet long God na larim God i helpim yu.

Tenkyu long ritim dispela pas bilong mi. Yu husat i ridim dispela pas bilong mi, God i blesim yu na i stap wantaim yu. Plis kisim taim long ritim baibel, beten na bihainim laik bilong God.

**Aisa Hureve
Goroka**

Sandaun i gutpela provins

Dia Edita,
Mi laik kisim dispela taim long toktok long ol yangpela pikinini bilong Sandaun Provins olsem, plis lusim pasin bilong smokim spak brus, dringim strongim bia nogut, lusim raskol pasin, raun nating nating na planti ol kain pasin nogut olsem.

Sapos yu stap long Sandaun, plis traim tingim God pastaim na bihain mekim sampela gutpela wok long bus graun bilong yu yet.

Sapos yu stap long narapela provins, plis traim kam bek long asples. Yu yangpela manmeri yu mas save olsem yu i narapela lida bilong Sandaun Provins. Sapos yu bikhet bai husat i kamap lida bilong ples bilong yu na bosim pipel bilong yu.

Nau mi askim ol Sandaun lida long kamapim sampela kain ol ples we bai i stap bilong kamapim ol dispela yangpela pikinini. Kain olsem ol stadium bilong mekim ol kainkain pilai, yut grup, bisnis trening skul, vokesenel skul, strongim wok bilong ol sios na ol kain sevis olsem.

Em tasol na yu husat i laik sapotim mi plis rait i go long Wantok Niuspepa bai mi ken ritim.

**Philip A Pais
Aitape**



Maski tokpait long Sissano Lagun

Dia Edita,
Mi laik bekim pas bilong Moses Muti bilong Sissano na Gabriel Antei. Pas bilong ol i kamap long Septemba 9 long Wantok Niuspepa.

Tupela brata, mi sem tumas long lukim na harim yutupela i kros i go kam long Sissano lagun. Nau mi laik yutupela i bekim dispela askim bilong mi.

Namba wan askim:
• Inap yupela i tokaut klia long mak bilong graun bilong ples Sissano, Barupu na Arop stat long nambis bilong Ottou i kam pinis long Arop. Em graun bilong husat?

• Ol kokonas i sanap long longpela nambis we i stap long nambis em bilong Sissano, Barupu o Arop? na

• Taim lagun i drai, husat bai planim ol samting long en, Sissano, Barupu o Arop?

Plis maski long tok pait. Mi mangi Arop, mi sem long yutupela i kros long lagun. Olgeta manmeri i save Arop i lukautim bikpela hap lagun. Tasol em i no save komplem olsem yutupela arere man. Mi save olsem Arop em as bilong dispela lagun. Barupu i stap long arere na Sissano yu hait insait olgeta.

Nem em samting nating.
Bipo tru Barupu yu nogat. Em Sissano na Arop tasol i stap. Bihain yu Barupu yu kam brukim mipela Sissano na Arop. Na Sissano blut bilong yu i no kapsait long lagun taim ol tumbuna i pait bipo.

Sapos mipela ol Arop i kom-

plen, tokpait, ating bai i stret na nem tu sapos mipela askim long senisim olsem Arop lagun bai stret.

Olsem na tupela brata noken paulim tok pisin bilong yutupela i go kam.

Em plen bilong papa God long putim yumi long ol wan wan ples olsem mi tok pinis na tok stret long hap bilong yu. Noken paulim dispela stori o graun mak bilong lagun bilong mipela ol Arop.

Em tasol na husat i laik rait egensim o sapotim rait tasol long Wantok Niuspepa bai mi ken ritim.

**Kens Pora
Arop, Aitape**

Stretim Vanimo Grin Riva rot

Dia Edita,
OLSEM wanpela pikinini Sandaun insait long Grin Riva Sab Distrik, mi gat bikpela wari long elektoret bilong mi, Vanimo Grin. Wari bilong mi em long rot bilong mipela.

Planti taim ol pipel bilong ol boda ples eria i save kraik long Open Memba bilong mipela wantaim Nesanel Gavman long lukluk na katim mani long wokim rot. Tasol nogat samting i bin kamap inap long 20 yia nau.

Pipel long boda eria nau i karim planti hevi long baim balus. Ol prais bilong ol kaikai, kako na sevis i go antap. Planti ol liklik bisnis i pasim dua bilong ol.

Olsem na mipela ol pipel bilong Imonda, Amanab na Grin Riva bai mekim wanem nau?

Yumi i mas painim sampela rot bilong kamapim dispela boda rot bilong pinisim dispela hevi.

Planti taim yumi save wet long gavman na Open Memba long mekim samting o helpim yumi tasol nogat wanpela samting i save kamap. Olsem na yumi ol pipel yet i mas go pas long mekim samting nau.

Mi gat tingting olsem, olgeta papa graun bilong Bewani, Imonda, Amanab na Grin Riva i mas bung wantaim na sanap long wanpela tingting bilong kamapim rot bilong Vanimo Grin Riva.

Ol papa graun i mas wanbel long salim sampela hap bus graun i go long nupela divelop long katim diwai fri long sait bilong rot tasol.

Taim ol i wokim rot i go ol i ken katim diwai inap long 200 kilomita mak tasol. Mi tromoi dispela tingting bai yupela ol papa graun o memba bilong mipela long Nesanel Palamen i ken skelim na mekim samting.

Em tasol wari bilong mi. Tenkyu long ridim pas bilong mi.

**Mark G Nakmia
Unitech, Lae**

O.P bagarapim Westen Hailens

Dia Edita,
 Mi laik autim wari bilong mi long Wantok Niuspepa na ol arapela i ken lukim. Long Westen Hailens, strongpela bia ol i kolim O.P. i bagarapim sindaun bilong planti pipel.

Mi wanpela boi i stap longwe long Hagen siti, tasol mi kam long rot na long buai maket nambaut mi lukim ol bikpela man wantaim ol mangi na ol meri tu i save holim coca cola ken na spak raun i stap.

Dispela pasin i save stap olgeta de. Na mi no klia long dispela strongpela dring O.P. Ol i kisim long wanem hap na ol i salim na ol man i baim na dring. I nogat wanpela fektori i wokim ol strongpela dring long Hagen.

Olsem na mi putim dispela askim i go long plis dipatmen long lukim na sekim gut. Putim sek poin long Simbu na Lae na sekim gut. Husat wanpela bisnis man i karim ol strongpela dring i kam long Hagen na salim.

Sapos yupela i holim dispela ol man orait, sasim ol, kalabusim ol na mekim save long ol.

Mi lukim olsem planti hevi i kamap long ples bilong mi olsem na mi raitim dispela pas long Wantok Niuspepa bilong kisim sapot na helpim.

Em tasol na husat brata o sua yu laik sapotim mi orait rait i go long Wantok Niuspepa bai mi ken ritim.

Dickson M Hagen

Pangi Pati nogat gutpela lida

Dia Edita,
 Mi wanpela man long Momase rijen we Pangu Pati i gat bikpela sapot. Pangu Pati em namba wan pati tru, na lida bilong en i bin kamap praim minista bilong kantri.

Taim papa tru bilong pati, Sir Michael Somare i lusim pati, i nogat wanpela gutpela pati lida i bin kamap i kam inap tude.

Lida bilong pati na ol memba bilong pati nau i wok long kalap kalap. Ol i skelim wanem grup bai ol i go pas wantaim. Dispela i kamap ples klia long taim Chris Haiveta na ol lain memba bilong pati bilong Pangu i mekim long joinim gavman long las

tupela wik i go pinis. Mi laik tokim Mista Haiveta na ol lain bilong em olsem dispela pasin yupela i mekim em bilong hamamasim yupela yet long Palamen. Ol pipel husat i votim yupela em yupela i lusim ol long tudak.

Mi askim lida bilong Pangu Chris Haiveta long tokaut klia long ol sapota bilong Pangu Pati long kain pasim ol i wok long mekim i stap. Yu husat agensim o sapotim mi, plis rait i go long Wantok Niuspepa bai mi ken ritim.

Moris Baundo Bulolo

Not Flai Memba i stap we?

Dia Edita,
 Mi wanpela mangi i save i stap long ples Pampex long Ningerum stesen long Kiunga Western Provins. Mi save lukim olsem planti taim ol papa mama long ples i save votim ol lida bilong Not Flai long kamap memba tasol dispela ol memba, mipela i no save lukim ol liklik.

Ol papa mama tu i gat bikpela tingting olsem inap long dispela ol memba i wokim rot i go long ples.

Pastaim Kala Swokim i stap kain hevi i bin stap. Wankain long taim bilong Bob Bubac tu mipela i bungim wankain hevi. Sapos yu memba bilong mipela orait kam na mipela i lukim yu. Bringim sevis i kam bai mipela i save yu stap.

Wankain singaut i go long husat man o meri i tingting long resis long dispela sia long bihain taim.

Moses Omi Kiunga

PNG i no sot long Spirit bilong God

Dia Edita,
 Mi laik sapotim toktok bilong Saut Bogenvil Memba, Michael Laimo husat i agensim toktok bilong Pasto Benny Hinn.

Yes mi tu mi no amamas long dispela kain tok olsem PNG i sot long spirit bilong God triwan. Mi laik tok olsem ating Pasto Hinn i ting olsem PNG i nogat ol bilip manmeri i stap.

Pasto Hinn long taim yu skul yet long kamap pasto, PNG i selebretim 100 yia Jubili bilong em long tingim bek yia 1896 taim ol namba wan misinari i bringim Gutnius i kam.

Na long yia 1996 em 100 yia bilong Katolik Sios. Sapos Pasto Benny i ting PNG i sot long Spirit bilong God, mi laik askim yu long nem bilong bikpela Jisas Kraim olsem yu traim long sampela hap bilong PNG tasol sapos yu kam long wanpela provins bilong PNG ol i kolim Is Sepik, bai yu painim aut long yu yet olsem PNG i no sot long Holi Spirit.

Mi laik tok olsem PNG i gat gutpela Holi Spirit bilong God triwan i stap tasol yupela yet ol lida bilong kantri i no daunim yupela yet na sapotim ol pipel long wanem kain lotu wok ol i mekim.

Las tok bilong mi i olsem, pipel bilong PNG lusim ples slip bilong yupela na opim ai na lukluk nambaut na tokaut long wanem samting God Papa i laik mekim.

Yu husat i laik egensim o sapotim pas bilong mi, plis rait i go long Wantok Niuspepa bai mi ken ritim.

Benedict Hepau Wewak

Sapos yu laik salim ol pas bilong yu i kam long dispela nuispepa, Salim i kam long dispela adres:
**THE EDITOR
 WANTOK NEWSPAPER
 PO BOX 1982, BOROKO. NCD.**

Ol Hagen siti sekyuriti kisim tok salens

Dia Edita,
 Mi laik autim bikpela bel hevi bilong mi i go long Hagen siti kaunsel.

Mi wanpela mangi i save raun tumas long Hagen siti na mi lukim olsem ol Interim Sekyuriti long Hagen i no wok gut bikos planti pipia tru i pulap insait long siti.

Ol man na meri i wok long salim buai na smuk insait long siti na planti rabis na buai spet i pulap long siti.

Bilong wanem dispela samting i kamap insait long siti? Ating lukluk bilong mi i olsem, ol Hagen Siti Kaunsel i no baim ol sekyuriti gut na ol sekyuriti i no wok gut olsem na planti ol pipia i pulap.

Sapos ol dipatmen i baim gut ol sekyuriti, orait mi no save olsem wanem na Hagen siti i kamap olsem buai maket.

Hagen siti em i namba tri siti long PNG. Olsem na ol sekyuriti long Hagen i mas wok gut. Ol Hagen siti kaunsel i mas ogenaism ol yet gut na baim ol sekyuriti gut bai ol i amamas na mekim gutpela wok.

Mi bin lukim olsem long 1995, 1996, na 1997 Hagen siti i bin kamap klin moa yet. Tasol olsem wanem long 1998 na 1999. I luk olsem Hagen siti bai i go bagarap olgeta.

Em tasol bel hevi bilong mi na sapos yu husat i laik sapotim mi orait rait i go long Wantok Niuspepa bai mi ken ritim.

Dominic Igila Hagen

Noken yusim God long Kanage

Dia Edita,
 Mi no save amamas long sampela man i save yusim nem bilong God long stori bilong Kanage. Yu husat man i save raitim stori bilong Kanage, plis noken yusim nem bilong Papa God bikos stori bilong Kanage em i no trupela stori. Em stori bilong dispela graun tasol.

God i no man bilong giaman. Em i no man bilong stori nogut na em i no man bilong tok pilai nogut. Na tu nem bilong Papa God i no pilai pilai nem. Em i wokim yumi olgeta na givim yumi win na laikim yumi olgeta.

Olsem na yumi noken raitim nem bilong God wantaim ol tok nogut stori bilong graun. Plis yusim het na raitim stori bilong yupela. Noken larim Seten i yusim tingting bilong yupela.

Yumi olgeta mas save olsem, God i stap antap long olgeta samting na em tasol i holim laip bilong yum. Olsem, yumi mas honaim nem bilong em long gutpela we.

Plis mi tok gen, noken yusim nating nem bilong God long Kanage stori.

Em tasol na yu husat brata o susa i laik sapotim o agensim, yu welkam tasol.

Selith John Tabubil

KANAGE



Ambunti Drekikier nogat gutpela lida


Dia Edita,
 Mi wanpela pikinini Ambunti. Planti taim mi save harim long redio Is Sepik olsem Galo Yumbui na Arthur Somare i wok long tokim ol pipel bilong ol long wanem kain sevis i wok long kamap long ilektoret bilong ol.

Mipela ol Ambunti i paul yet long pasin bilong politikis. Mipela nau i stap olsem ol tumbuna bipo husat i no luk-save long ol nupela senis. Mipela i gat ol gutpela save-man husat i ken tok long wari bilong mipela, tasol mipela i aipas yet.

Olsem na mi askim ol pipel bilong mipela long traim na lukluk gut na votim ol gutpela lida. Maski votim ol man olsem pangal paiawut bai ol i go hait olsem raiurut aninit long sia na singaut yesa tasol olsem frog i singaut long ren.

Mipela nau i stap long 1999 na klostu 2000 yia nau na wanem taim bai mipela i senis.

Ol pipel bilong Ambunti Drekikier, plis tingting gut long yia 2002. Lukluk gut long man na votim. Noken vot olsem long



• Arthur Somare.

glong bilong bipo. Traim na votim man i ken bringim developmen i kam insait long ilektoret bilong yumi. Lukluk gut, makim gut na votim em.

Em tasol wari bilong mi na sapos yu husat brata susa bilong Ambunti Drekikier i laik sapotim o agensim mi bai mi amamas tasol long ritim pas bilong yu long Wantok Niuspepa.

Kisly Gee Ambunti

Sir Mekere i no save long Rainbow Estate

Dia Edita,
 Mi wanpela wokman mi stap long Mosbi Wes ilektoret bilong Praim Minista Sir Mekere Morauta long Rainbow Estate. Na mi stap olsem tupela krismas long dispela hap.

Mi laik tok tru long olgeta manmeri bilong Mosbi Wes na Mosbi Siti na Papua Niugini olsem, tru tumas ol lida na memba bilong yumi i save wok hat na pait long bringim developmen na sevis i go long ilektoret na pipel bilong ol wanwan. Tasol dispela Praim Minista bilong Papua Niugini Sir Mekere Morauta em nogat na nogat tru. Rainbow Estate em wanpela hap kona bilong Mosbi Wes we i gat olsem 2,000 o 3,000 manmeri i stap. Rot bilong ol ka i go insait long Rainbow em nogut na nogut tru. Planti praivet ka bilong ol famili lain i save bagarap bikos rot nogut i mekim. Planti kampani ka i save pret long kisim ol wokmanmeri i go insait long banis bikos rot em nogut tru olsem plentesen rot.

Nogat gutpela strit lait, nogat wanpela helt senta i stap klostu, planti pikinini long Rainbow i save go skul longwe hap tru na kam bek, i nogat progrem bilong bungim ol mama long haus olgeta de long mekim sampela gutpela komyuniti wok long Rainbow eria yet, nogat rot bilong ol yut i painim sampela gutpela samting long mekim, stretim gut wanpela maket ples bilong ol manmeri i salim na baim ol kaikai, sanapim liklik polis stesin na planti arapela moa.

Mi ting ol lida i save traim long bringim sampela kain helpim na sevis i go long ol pipel bilong ol. Tasol ol lain bilong mipela long Rainbow em nogat tru bikos ating mipela i nogat lida ya.

Mi save Sir Mekere Morauta em Praim Minista bilong Papua Niugini na em i gat bikpela wok long mekim na em i nogat taim long ol liklik samting olsem. Mi save em ino man bilong raun long ol hap we win i smel nogut, lang i pulap na das i kirap. Tasol sapos em i ken stap longwe na tromoi han bilong em i tasol i kam long helpim mipela em gutpela liklik. Salim ol wokman bilong yu i kisim helpim i kam givim mipela na yu yet i ken stap long klinpela banis bilong yu.

Em tasol wari bilong mi na husat i laik bekim em laik tasol.

Masta Y2K Rainbow

WANTOK

Askim long klasifaid ads: Miri Aiori Ext. 214, John Iagata Ext. 218

KLASIFAIID



PABLIK NOTIS



NATIONAL STATISTICAL OFFICE

Nesenel Stetistikel Opis i wok long go het yet wantaim ol wok reri bilong Nesenel Populesen sensas. Ol dispela wok bai kamap long ol dispela de.

a) Treining bilong ol provinsel treina

Treining bilong olgeta lokel level gavman mausman bai kamap insait long ol provins. Bihain long ol i kisim treining ol dispela mausman bai givim treining long ol provinsel opisa long karimaut ol wok reri bilong sensas.

Provins	De
1) Westen	Oktoba 18-22, 1999
2) Gulf	Oktoba 18-22, 1999
3) Bougainville	Oktoba 18-22, 1999

b) Wok bilong kisim nem insait long ol taun na stesin

Ol bikpela na liklik stesin long olgeta provins i stap pinis long lis. Ol dispela i no stap yet em long Daru, Kerema, Lae na Popondetta. Ol wok long Lae i stat foapela wiks i go pinis na i wok long go het yet. Wok long ol narapela senta bai stat neks wik.

Westen provins (Daru stesin na ol narapela stesin) Wok bilong kisim nem bai stat long Oktoba 18, 1999.

Gulf provins (Kerema stesin na ol narapela stesin) Wok bilong kisim nem bai stat long Oktoba 18, 1999.

Morobe provins (Lae sili na ol narapela stesin) Wok bilong kisim nem i stat pinis long Oktoba 11, 1999.

Oro provins (Popondetta taun na ol narapela stesin) Wok bilong kisim nem bai stat long Oktoba 18, 1999.

c) 2000 sensas askim tes

Ol sampela askim tes bai kamap long ol ples long lsten hailans provins insait long Goroka na Ungai eria.

d) 2000 sensas provinsel stiring komiti miting

Ol dispela miting bai kamap long Madang na Simbu long Fonde Oktoba 14, 1999.


Wankain miting bai kamap long lsten hailans na Sandaun provins long Fraide Oktoba 15, 1999.

Ol sinia opisa bilong hetkota long Pot Mosbi bai stap long ol dispela miting.

Mipela askim olgeta pipel long helpim long dispela taim. Helpim bilong yupela bai go longpela hap long ol wok reri bilong mekim dispela 2000 nesenel sensas i kamap gut.



Nick Suvulo
Nesenel Stetistisen



John Kalamoroh
2000 Sensas Dairekta

WANTOK NIUSPEPA REACHES THE PEOPLE WHO WANT GOOD VALUE!

Some advertisers tend to underestimate the buying power of the average Wantok Niuspepa reader without appreciating the dynamic attributes of Wantok's audience.

Wantok Niuspepa is reaching 150,000 readers per week. Consider this is more than twice the readership of any other newspaper.

Most read the Wantok word for word. Every advertisement gets the attention it deserves.

Wantok Niuspepa readers are loyal in their product preferences. Price is a concern but familiarity and perceived value guides their buying behaviour.

Advertising in Wantok Niuspepa can influence their buying patterns and create loyal customers of your product and services range.

Wantok Niuspepa is reaching the readers who really matters and it will be to your advantage to educate your target market more thoughtfully.

Wantok Niuspepa can be your alternative point of sale venue in merchandising your product and services. After all, consumer conversion can only come through approaching your target market directly.

ADVERTISING SPACE COST PRICES QUOTED EXCLUDES 10% VAT

Advert Size	Mono	One spot colour	Two spot colour	Full colour
Full Page- 38cm x 7col	K 784.70	K 984.70	K 1,184.70	K 1,584.70
Half Page - 28cm x 5col	K 413.00	K 613.00	K 813.00	K 1,213.00
Half Page-19cm x 7col	K 392.35	K 592.35	K 792.35	K 1,192.35
Quarter Page-19 x 4col	K 224.20	K 424.20	K 624.20	K 1,024.20

Compare Wantok's cost per column cm!
K2.95 per col/cm against the Dailies K7.82 for the same size!!
Volume discount rates are also available on request



SAVE LONG OL RAIT BILONG YU OLSEM CONSUMA

1. TOK I GO PAS

Nesinol Gavman i kamapim Consuma Afes Kaunsil long 1993 long lukautim ol wari na komplem bilong ol consuma.

I gat eitpela (8) Rait bilong ol Consuma em ol i mas save taim ol i go baim samting.

Pastaim long yumi lukluk long ol rait bilong ol Consuma, yumi mas luksave long mining bilong dispela tok Consuma. Consuma long tok Inglis i min olsem husat manmeri o pikinini i spenim moni long baim samting na yusim.

2. RAIT BILONG OL CONSUMA

2.1. Rait long stap gut na noken painim birua.

Dispela rait i lukautim ol consuma long ol bisnis i noken salim ol samting inap long kamapim birua long ol laip o inap long kamapim sik long ol consuma.

Dispela i min olsem ol bisnis i no ken salim ol samting i gat marasin nogut inap kamapim sik o dai bilong ol consuma.

Long ol sevis o wok em ol bisnis i save givim tu. Ol i mas givim gutpela sevis na i no ken givim sevis em inap long consuma i ken painim bagarap. Olsem sapos wanpela bisnis i wokim sevis o fiksik kar bilong yu. Ol i mas fiksik dispela kar gut na ino inap long kamapim birua long draiva o pasindia insait long kar.

2.2 Rait long susim ol samting.

Dispela rait i toksave long ol consuma olsem ol i gat rait long go long olgeta stoa na lukluk long ol prais na kualiti bilong ol samting pastaim long baim.

Olsem sapos yu laik baim Tin Pis na yu go long Stoa A na prais i K2.00, orait yu ken go long Stoa B or C na lukluk long ol prais. Sapos prais long Stoa C i liklik long narapela tupela stoa orait yu ken baim. Taim yu mekim olsem dispela narapela tupela stoa bai lukim na putim prais bilong ol i go daun, long wanem ol i no kisim kastoma.

2.3 Rait long kisim toksave.

Dispela rait i bilong givim ol toksave long ol wanem kain samting em ol consuma i baim.

Sapos wanpela consuma i go long stoa, na i laik baim wanpela samting, em i mas lukluk long prais bilong samting, kualiti, fektori we ol i mekim dispela samting, wanem kain samting i stap insait long peket, tin o botol, i gat ol gutpela marasin long helpim bodi i stap o nogat.

Sapos yu baim ol bikpela samting olsem kar, yu mas lukluk long rejistresen namba, enjin namba, wanem model na ol narapela toksave. Dispela kain toksave mas i stap long ol kain samting olsem televisen na wasing masin na ol narapela ol bikpela samting tu.

Ol dispela toksave i mas i stap long tokples bilong ol consuma i ken klia long en.

2.4 Rait long tokaut long ol wari na komplem.

Dispela rait em bilong ol consuma i ken tokaut long ol wari na komplem bilong ol Consuma Afes Kaunsil.

Taim yu toksave long ol wari na komplem bilong yu em ol inspekta na investigeta bilong kaunsil bai i go aut na lukluk long wari na komplem bilong yu.

Yu ken putim komplem bilong yu sapos yu ting olsem ol stoa o bisnis i sasim bikpela prais tumas o sapos kualiti bilong samting yu baim i no gutpela na i bagarap kwik.

2.5 Rait long tokaut long laik bilong yu long ol konsumo lo na polisi.

Dispela rait i givim sans long konsumo long tokaut long ol rot ol i laikim gavman i kamapim insait long ol lo na polisi bilong ol samting em ol bisnis i save salim insait long kantri, na tu ol lo bilong lukautim ol konsumo.

2.6 Rait long Consuma Afes Kaunsil mas lainim ol Consuma long rait na wok bilong ol.

Dispela rait i givim wok long Consuma Afes Kaunsil long lainim ol consuma long ol rait na wok bilong ol taim ol i go long baim samting, bai ol bisnis i no inap paulim ol.

Ol consuma i mas lukluk long ol dispela samting taim ol i go baim samting;

- (a) Nem bilong fektori i mekim dispela samting
- (b) Wanem samting i stap insait long peket, tin o botol
- (c) Taim o deit bilong dispela kaikai bai i go bagarap
- (d) Wanem kain ol gutpela marasin bilong helpim bodi i stap long dispela kaikai.
- (e) Prais

Sapos yu go baim ol bikpela samting olsem kar, televisen o ol narapela samting yu mas lukluk long ol dispela samting;

- (a) Prais
- (b) Taim we yu yusim samting inap long em no ken bagarap
- (c) Seril namba
- (d) Nem o model bilong dispela samting yu baim
- (e) I gat sevis o spea pats insait long kantri inap long fiksik taim em i bagarap.

2.7 Rait long i stap long gutpela ples.

Dispela rait i bilong lukautim ol consuma long ol i mas i stap insait long gutpela ples we i nogat birua inap long kamapim sik long ol.

Ol consuma i mas lukluk long ol bisnis i no ken kamapim ol wok inap long bagarapim sindaun bilong olsem long bus, solwara, wara, graun na abus bilong ol.

Dispela ol kain bagarap i kamap pinis long ol kampani i kisim diwai na wokim maining long ol sampela ples insait long Papua Niugini.

Sapos yu ting ol kampani i bagarapim ples yu stap long en, yu ken putim wari bilong yu i kam long Consuma Afes Kaunsil.

2.8 Rait long ol besik nits o ol samting olsem haus sik, skul, wara na kaikai.

Dispela rait i tok olsem consuma mas i gat haus long slip long en, go long skul, i gat haus sik long kisim marasin, i gat wara long dring, waswas na kaikai.

Dispela rait i stap insait long mama lo bilong Papua Niugini olsem long olgeta consuma mas i gat kaikai, wara, haus bilong slip, skul na haus sik long kisim marasin.

3. TOKTOK BILONG TINGIM

Nesinol Gavman i kamapim Consuma Afes Kaunsil long helpim ol consuma long ol wari na komplem bilong ol taim ol i go aut long baim samting.

Olsem na sapos husat consuma i ting olsem ol bisnis i paulim em, em i gat rait long i kam long Consuma Afes Kaunsil ofis na putim komplem bilong em.

Yu ken rait, ring o salim fex i kam long Consuma Afes Kaunsil long ol dispela adres;

Consumer Affairs Council

P.O. Box 6394, Boroko, N.C.D. Telefon Namba: 323 1344 Fex: 325 3078
Ples: Watkins Mall Building, Okari Street, Boroko.

Consumer Affairs Council

Momase Regional Office, P.O. Box 1107, Lae

Telefon Namba: 472 6188 Fex: 472 6122, Ples: Vele Rumana - Lae

Consumer Affairs Council

Highlands Regional Office, P.O. Box 1787, Mt. Hagen

Telefon Namba: 542 3001 Fex: 542 3001

Ples: AGC Building

Consumer Affairs Council

Islands Regional Office, P.O. Box 461, Rabaul


Telefon Namba: 982 8620 Fex: 982 8620

Ples: Skowhagen Building

Yu ken lukim ol Kiap long wanwan Distrik bilong yu long soim ol wokman i makim Consuma Afes Kaunsil long kisim halivim.

CONSUMER AFFAIRS COUNCIL (PNG)


P.O. Box 6394, BOROKO, N.C.D. Telephone : 323 1344, Fax: 325 3078



• Tupela susa ya i laik traim masel bilong tupela long apim ain. Dispela spot nau i wok long pulim planti meri husat i ken winim medal bilong PNG.



• Ol pilaia bilong Wapenamada Brothers i soim stail bilong ol long Yunivesiti gren fainel. Tasol sori tumas, yupela mas traim gen neks yia, Medics autim tiket bilong ol.



• Tupela susa ya long Praivet Kampani netbal resis ya i soim kain stail we nau bai kukim Rita Flynn kot bihain long sisen tru bilong Pot Mosbi i pinis. Sapos wanem ol lain husat i laik saptom ol meri, plis mas soim pes na ol meri bai pilai strong moa yet ya.



• Kila i bilong Yellow pages i laik autim bal long Praivet Kampani netbal resis long las Sande. Aninit: Ol bikman i sekhan wantaim ol pilaia bilong Waps Brothers long Yunivesiti lig gren fainel las wik.

OL spot eksen bilong Pot Mosbi we i bin kamap las wiken

Poto IVAN BAYAGAU na RICHARD MADIU



• Yangpela boi ya i soim stail we i save kukim PRL olgeta wiken long skulbois kompetisen.



Wiken Spot Dro

PMSA draw

Saturday 16th October

Bisini 1

0800	R	ICF University Vs Blue Kumul
0920	M1	Verave Vs SPB
1040	M1	WMI Togelu Vs Nisco
1200	M1	Wanzesi Vs YM2
0120	M1	Bau Futz Vs Tawala
0240	P	TST Babaka Vs Cosmos
400	P	Rapatona Vs LBC Defence

Bisini 2

0800	R	Rapatona Vs Telikom
0920	M2	Bavaroko Vs M. Kayaks
1040	M1	City Kings Vs Bao Mita
1200	M1	Bulolo Mocs Vs Nomads
0120	M1	Dobo Murika Vs Pom United
0240	P	Tarangau Vs Momase
400	P	Adau Vs Kurti Andra

University

0800	M2	Cyclone Vs Korian
0910	R	Adau Vs Kurti Andra
1020	W2	Adau Vs ICF University
1130	W2	Kula Vs Tawala
1240	W2	Cyclone Vs IBS PS United
0150	M2	SPB vs W.Heights
300	M2	City Kings Vs Dolos

Inservice

0800	U19	Nisco Vs Cosmos
0910	U19	ICF University Vs Guria
1020	U19	Telikom Vs Pom United
1130	U19	Blue Kumul Vs Bao Mita
1240	U19	IBS PS United Vs M.Gaindu
0150	U19	TST Babaka Vs Kurti Andra
300	M2	Kutu Vs Don Bosco

Sunday 17th October

Bisini 1

0800	R	Tarangau Vs Momase
0920	W2	Cosmos Vs Murat
1040	W1	Guria Vs Naniu
1200	M1	Wanzesi Vs Murat
0120	M1	Bao Mita Vs SPB
0240	P	IBS PS United Vs Cosmos
400	P	ICF University Vs Blue Kumul

Bisini 2

0800	R	LBC Defence Vs TST Babaka
0920	W1	Sobou Vs Wanzesi
1040	M1	Sobou Vs Nomads
1200	W1	Tarangau Vs LBC Defence
0120	M1	M.Gaindu Vs Nisco
0240	P	Rapatona Vs Telikom
400	P	TST Babaka Vs LBC Defence

University

0800	M2	Kutu Vs Dolos
0910	R	IBS PS United Vs Cosmos
1020	W2	Bomana Vs Kula
1130	W2	City Kings Vs Adau
1240	W2	ICF University Vs PS United
0150	W2	Cyclone Vs Pom United
300	M2	W.Heights Vs Muma

Steamship

0830	U19	Nisco Vs M.Gaindu
0950	U19	LBC Defence Vs Bavaroko
1110	U19	ICF University Vs Adau
1230	U19	Guria Vs Pom United
0150	U19	IBS PS United Vs Cosmos
Bye/ff to Tarangau U/19, Tawala (W2), Rapatona (W2)		

Midweek games at Bisini 4:30pm

Monday 18th October

M2	M.Kayaks Vs Naniu B1
M1	Bau Futz Vs Cyclone B2

Tuesday 19th October

M1	Nisco Vs Pom United B1
M1	Bao Mita Vs YM2 B2

Wednesday 20th October

M1	Dobo Murika Vs Sobou B1
M1	WMI Togelu Vs Bau Futz B2

Thursday 21st October

M1	City Kings Vs Bao Mita B1
M1	Sobou Vs Pom United B2

Note: Due to questions been raised against the progressive points ladder, a critical assesment of all points ladders is under progress and so the ladder won't be provided until the next issue of this paper. Clubs not agreeing on the matter are requested to make available their records and submit to Bisini soccer grounds office over the weekend.

NCD VOLLEYBALL DRAW

SEMI FINALS

DATE: 16 OCTOBER 1999.

SIR JOHN GUISE INDOOR COMPLEX COURT ONE - WOMEN'S DIVISION

TIME	TEAMS	D
09.30	Hoppers vs Raukele	WAR

12.30 API PTC vs City Sharks WA

COURT TWO - MEN'S DIVISION

11.00	Scorpions vs Hoppers	MAR
02.30	API PTC vs Elcom	MA

PEPSI LAHI SOCCER DRAW

TELIKOM TRAINING COLLEGE

DAY TIME D FIXTURE

Wed

13/101600 G43 D1 Murat vs KA Midnorth

SIKS STADIUM

Sat 1030	G44	U19-2Tisol vs TTC Bullets
16/101200	G45	W2 Bugandi vs DAL Labu
1330	G46	D2 Arnotts vs TTC Bullets
1500	G47	F2 Shell Unitech vs Bugandi

Sun 0900 G48 U19-1Eastern Star vs Elcom

17/101030 G49 D1 Malabu vs Winner G43

1230 G50 W1 Waliya vs Elcom

1400 G51 C/R SP Holdings Staff vs

1430 G51 F1 Sobou vs Guria

1630

PRESENTATION OF

AWARDS

PORT MORESBY SOFTBALL DRAW

1999/2000 SEASON DRAW

WEEK 2 GAME 2

DATE: 16/10/99

DIAMOND #3

TIME	GRADE	TEAM	
9.00		Wantoks vs Sharks	C
10.30		AB Bears vs Mazda	A
12.00		Norths vs Malangan	A
13.30		Wantoks vs Gazelle	A
15.00		All Stars vs Chebu	A

DIAMOND #2

9.00		Norths vs Malangan	C
10.30		Admiralty vs Gazelle	B
12.00		All Stars vs Sunkist	B
13.30		Admiralty vs Dolphins	C
15.00		AB Bears vs Mazda	B


DIAMOND #1

9.00		Sunkist vs Chebu	C
Dolphins "B" bye			



ZENAG - Gutpela kiau

WANTOK SPOT



Pundari givim K200,000 long wol snuka

DEPUTI Praim Minista na minista bilong Spots John Pundari i givim K200,000 i go long PNG Biliart na Snuka Asosiesen long holim 1999 Wol Snuka sempionsip.

Dispela sempionsip bai kamap long Pot Mosbi we i pulim 36 kantri olgeta insait long wol.

Pundari i tok olsem em i givim bikpela sapot tru long PNGBSA long pulim dispela wol taitel i kam long kantri.



□ John Pundari

Em i amamas stret long Presiden bilong PNGBSA

Raymond Hoada husat i pait hat long pulim dispela sempionsip i kam long Papua Niugini.

Pundari i amamas long ol komiti memba bilong PNGBSA long givim sapot long Hoada husat i grisim gut tru Intanesenel Biliart na Snuka Federesen long winim wol sempionsip.

Samting olsem 36 kantri olgeta bai soim pes long dispela wok sempionsip i kamap long Pot Mosbi.

Dispela sempionsip i pulim ol pilaia i kam long ol dispela kantri Australia, Austria, Belgium, Brunei Darussalem, Canada, Egypt, China, Chinese Taipei, Cyprus, England, Fiji, Finland, France, Iceland, India, Isle of Man, Jordan, Macau, Malaysia, Mauritius, Netherlands, New Zealand, Pakistan, Philipins, Ireland, Singapore, South Afrika, Sri Lanka, Thailand, USA, Wales, Sweden Noten Ireland.

Pundari i tok em i no olgeta taim PNG i save pulim ol kain wol sempionsip i kam long kantri.

Em i tok gavman bilong em i amamas tru long strongim wok bilong spots na laik lukim olsem dispela spot i mas develop na kamap olsem strongpela gem.

Pundari i tok em i laik lukim planti ol man na meri i givim taim bilong ol long pilai spot na kamap olsem profesenel pilaia.

Olsem long soim sapot bilong gavman, NEC i oraitim K200,000 long sapotim PNGSBA long holim dispela wol sempiosip.

Long taim bilong wol sempionsip, ol pilaia bai gat long lukim ol lain kain pasin tumbuna na wok turis insait long kantri.

Namba tu praim minista i tok dispela sempionsip i no pulim ol man i stap klostu we PNG i save wokim bisnis wantaim ol, nogat, em i pulim ol pilaia i kam longwe tru olsem Iceland na Jordan.

"Mi laik mekim bilong tok amamas i go long oge-naising komiti long mekim gutpela wok long pulim dispela tonamen i kam long kantri," Mista Pundari tok

Deputi Praim Minista i tok em i amamas tru na salensim ol pilaia bilong PNG long kamap olsem gutpela mausman bilong kantri long taim bilong wol sempionsip.

Na em i tu i tokaut long skwat bilong PNG em Peter Fong, Graham Baker, Geoff Moss, Simon Lavulo, Roger Ng, Howard Lahari, Alphonse Bade na Chris Schultz. Tim menesa em Doug Kelson.

Westley bai ino inap pilai long Kumul

HENRY MORABANG i raitim

BIKPELA fowat bilong Kumul and Canberra Raiders David Westley bai i no inap pilai egensim Australia Aborigines tim long dispela wik Sarere.

Dispela gem namel long PNG Kumuls na Aborigines bai kamap long Campbelltown, Sydney.

Westley em i namba tri pilaia i tokaut olsem em bai i no inap pilai bikos em bai marit long Sarere long Sen John Katidrel long Pot Mosbi. Arapela biknem pilaia husat bai i no inap pilai em kepten yet Adrian Lam na Stanley Gene.

Gene husat i stap malolo long ples Goroka i tokaut olsem em i no inap pilai bikos em i gat bikpela wok long wokim haus bilong mama bilong em. Arapela samting tu em i laik stap isi na pilim orait gut na joinim nupela klab long neks yia.

Gene em i lusim Hull Kingston Rovers na bai pilai wantaim Gateshead Thunders long Super Lig divisen long Inglan.

Arapela biknem pilaia David Buko i amamas tru long pilai long nesenel tim long Campbelltown bikos em asples bilong Western Suburb klap. Las yia, Buko i pilai wan-



• David Westley



• Adrian Lam



• Marcus Bai

taim klab tasol nau ol i joinim Tigers long fomim wanpela klab tasol long neks yia.

Buko i no winim kontrak long Australia, tasol em i laki long winim long France. Em bai kamap namba tu pilaia bilong PNG long pilai long kompetisen long France.

Olpela namba tu kepten na senta bilong Kumul Richard Wagambie i kamap namba wan pilaia long PNG long pilai long hap. Westley bai maritim Melaine Warrillow - em hap kas Australia na Kerema. Nau em i no stap, kosa bilong Kumul Bob Bennett bai kamapim nupela fowat long kisim ples.

Francis Pegu, Tony Dai, Andrew Norman o James Kops bai kisim ples bilong

Westley. Boi hap Bai ya i save pilai long primia tim bilong Canberra Raiders tasol em i kisim bagarap na i save stap long riserv gret.

Tasol wanpela olpela Kumul Andrew Kuno i no amamas long pasin PNGRFL i mekim long makim tim bilong em. PNGRFL nau i nogat taim na em i kisim planti ol pilaia i wok long pilai long Australia.

Ol profesenel pilaia husat bai soim pes long Kumul tim em Marcus Bai, Tom O'Reilly, John Okul, Stanley Gene, David Buko, Raymond Karl, John Wilshire, William Wilshire, Jim Wilson, Mathew Elara, Alfred Sorongo na Elias Paiyo. Elara husat i save pilai wantaim Gattou Hawks klap long Towoomba Ragbi Lig

kompetisen long Kwinslen. Las yia, ol i makim Elara olsem kepten bilong dispela klap long wanpela spesel miting.

Kuno i tok nau yet ol biknem pilaia bilong Aborigines long NRL olsem Anthony Mundine na Nathan Blacklock i les long stap long dispela gem bikos dispela i no ragbi lig salens tru ya.

Mundine i gat belhevi long i no winim jesi bilong Australia Kangaroo na em i les long joinim Aborigines tim long salensim PNG Kumuls.

Ol arapela Aborigines pilaia i soim laik em Cliff Lyons (Manly) John Simon (Warriors) na Owen Craigie (Newcastle Knights).

Em i Gutpela
Em i Tuna
Em i bilong
PNG stret...

PROUDLY
PNO
MADE



- ◆ Tuna kam long solwara bilong Papua Niugini Stret.
- ◆ 100% tuna mit stret, nogat bun na nogat skin.
- ◆ Planti mit istap long olgeta tin.
- ◆ Nambawan-tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- ◆ Prais inap tru long yu baim.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.